

**NINTH MIZORAM LEGISLATIVE ASSEMBLY  
(SECOND SESSION CUM BUDGET SESSION)**

**LIST OF BUSINESS**

FOR SECOND SITTING ON WEDNESDAY, THE 21<sup>st</sup> FEBRUARY, 2024  
(Time 10:30 A.M to 1:00 P.M. and 2:00 P.M. to 4:00 P.M.)

**OBITUARY**

1. **PU LALDUHOMA**, hon. Chief Minister to make obituary reference on the demise of **Pu K. L. Lianchia**, Ex- Minister.

**QUESTIONS**

2. **Questions** entered in separate list to be asked and oral answers given.

**LAYING OF PAPERS**

3. **DR. VANLALTHLANA**, Minister to lay on the Table of the House a copy of Notification issued under Mizoram Goods & Services Tax Act, 2017 w.e.f 16.8.2023 – 25.1.2024.
4. **PI LALRINPUII**, Minister to lay on the Table of the House a copy of the Annual Report of Mizoram State Commission for Protection of Child Rights (MSCPCR) for the year 2022 – 2023.

**DISCUSSION ON MOTION OF THANKS**

5. Discussion on Motion of Thanks on the Address of the Governor

VANLALTHANTLINGI  
Commissioner & Secretary

\*\*\*\*\*

**HON. SPEAKER** : *Rorelnaah thlei bik in nei tur a ni lo; Mi te leh mi lian inang rengin in ngaihthlaksak tur a ni; Tu mah in hlau tur a ni lo; rorelna chu Pathian ta a ni si a; In tana thu khirh lutuk chu ka hnenah in rawn thlen thin ang a; chu chu ka lo ngaithla thin ang, ' tiin thu ka pe a.*

-Deuteronomy 1:17

Aw le, vawiina *List of Business* tlangpui, kan tihturte ka han chhiarchhuak ang a.

*Obituary* kan nei ang a, kan member zahawm tak leh kan House Leader ni bawh Pu Lalduhoma'n sunna a rawn nei ang a. Kan ex-Minister leh member lo ni tawh, Pu KL Lianchia, tun session inkarah kan chan hlauh mai a, *Obituary* hun kan hmanga ang a. Tichuan, *Zawhna & Chhanna* hun kan hmang ang a, chumi zawhah chuan *Laying of Papers*- hun kan hmang ang. Chutah chuan -

1. Member zahawm takin Dr. Vanlalhlana, Minister zahawm takin, *Notification issued under Mizoram Goods and Services Tax Act 2017, with effect from 16.8.2023 to 25.1.2024* House dawhkanah a rawn lay ang a.
2. Pi Lalrinpuui, Minister zahawm takin, *The Annual Report of Mizoram Commission for Protection of Child Rights for the year, 2022-2023* a rawn lay bawh ang a.
3. Tichuan, kan Governor zahawm takina Thawhtannia House a rawn address chungchang, *Motion of Thanks* te kan sawi ho dawn a ni.

### **OBITUARY:**

Vawiina kan ram hruaitu kal ta sunna hun kan hman tur hi Pu KL Lianchia, Ex-Minister a ni a. Kan House Leader zahawm takin sunna hun rawn hmang se. Pu Lalduhoma i lo sawm ang u.

**PU LALDUHOMA, HON. CHIEF MINISTER:** Pu Speaker, Pu KL Lianchia, ex-Minister, Mizoram hi January Ni 14, 2024 (Pathianni) zinglam dar 12:30 khan Pneumonia natna avangin ama chenna in Electric Vengah kum 91 mi niin a boral a.

Pu KL. Lianchia hi Pu Thanseia Kawilam leh Pi Hrangthluaii te fa niin, February Ni 7, 1933-ah Biatae kuaah a piang a. An unau hi mipa panga leh hmeichhia pali an ni. Pi Sangmawii nen January Ni 19, 1955-ah inneiin, fapa pahnih leh fanu pathum an nei a, tu 15 leh tuchhuan 12 an nei bawh a ni.

Zirna lamah chuan 1944-ah Lower Primary a zo a. Matric leh IA (Intermediate of Arts) hi teacher private candidate-in a exam a, BA hi tha takin kum 1965-ah Pachhunga Memorial College atangin distinction-a pass-in a zo leh a. Kum 1977-ah Mizoram Institute of Education (MIE) atangin B. Ed. tha takin a zo leh bawh a ni.

Pu KL Lianchia hian kum lama naupang te a nih lai aṭangin zirtirtu hna a thawk a, hna a lo thawh tawhna te chu –

- i) 1948-ah zirtirtu, Biate Primary School;
- ii) 1962-ah Clerk (LDA), Mizo District Council;
- iii) 1965-ah Asst. Headmaster, Khawhai High School;
- iv) 1967-ah Headmaster, Chhing Veng Middle School;
- v) 1980-ah National High School, Phullen-ah Headmaster-ah a ṭang leh a ni.

Mizo Union lo din aṭang khan hruiatu hmasate hnung a zui nasa hle a. Kum 1982-ah PC (People’s Conference) Party a zawm a; kum 1984 - Fourth Mizoram Union Territory Legislative Assembly General Election-ah Lungpho constituency aṭangin PC Party ticket-in MLA atan thlan tlin a ni a. Kum 1987 - First Mizoram State Legislative Assembly, General Election-ah a bial ngai Lungpho aṭangin PC Party ticket bawkin MLA atan thlan nawn leh a ni. Kum 1998 - General Election-ah Khawhai constituency aṭangin MPC (Mizoram People’s Conference) Party ticket-in a vawithumna atan thlan tlin a ni leh a. Hemi ṭum hian MNF leh MPC sawrkar intawmah Cabinet Minister niin, Health & Family Welfare Deptt. leh Sericulture Deptt-te hneh takin a enkawl a ni. Amaherawhchu, party pahnihte thawhhona chu a tawp tak avangin, December Ni 9, 1999-ah minister a nihna chu a kalsan ta a ni. Pu K.L. Lianchia hian a hun hnukung lamah pawh ZPM party tan theihtawp a chhuah a, a hun tawp thlengin *Val-Upa Council* Member a ni.

“A kalsan tak a chhungte, a tu leh a fate Pathian thlamuannain chenchilhin, awmpui zel se la” tih hi kan duhsakna a ni e.

**HON. SPEAKER** : A lawmawm e. Tunah chuan Leader of the Opposition, Pu Lalchandama Ralte i lo sawm ang u.

**PU LALCHHANDAMA RALTE, OPP. LEADER:** Pu Speaker, vawiinah Mizo politician-te zinga entawntlak leh ngaihsanawm, chhuanawm tak Pu KL Lianchia sunna thu sawi a lo ngai ta hi a lungchhiatthlak ka ti hle a. Kan House Leader-ina a sawi tak ang khan, he House-ah hian term thum zet mai kan House tizahawmin, ram tana rorelnaah taima taka hun lo hmang a. Sawrkarah *minister* dinhmun a awb bakah, kan House Committee pawimawh ber, PAC-ah te pawh *chairman* a lo ni tawh a. Ram tan, hnam tan, contribution nasa tak lo nei tawhtu a ni a.

Tin, amah hi Mizo zingah pawh palian, inkhaithli, taksa vawng uluk, mi smart tak mai a ni a. Kum 80 zet a nih thleng pawhin khawlaiah han hmuh nikhuaah pawh mi-zahawm a nihna a lang a; neck-tie awrha a awb bakah, neck-tie a awrloh ṭum pawhin a nghawngah scarf hrenga zahawm taka a hun hmang ṭhin a ni tih te keini pawhin kan hmuh ve thin a ni a.

Kum 91 zet mai damin leh vanneihthlak takin a nupui, Pi Sangmawii nen hian kum 69 zet inneiin an han dam dun thei te hi a ropui ka ti a. Chhungkua a enkawlna kawngah pawh fa panga a neih te, eizawna tha tak mai neiin, a fanaute zirna kawngah pawh a chher puitlingin ka hria a. Mizoram Police Service-a kan officer senior te pawh a fate zingah an tel hial hi a ropui ka ti a. He House piah lama chhungkua a enkawlnaah, ‘entawntlak a ni’ tih hi ka han sawi duh a ni.

Tin, a chanchin kan hriat tak ang khan, Biate tlangval ngat, Biate ti-Biate tute zinga mi a ni a. Kan hriat ang hian Biate-ah pawh YMA President kum 11 zet a lo ni a. Tin, amah mai ni lo, an chhungkua hrim hrim hian khawtlangah contribution an nei tha thin hle a. A u, Pu Tekunga - Biate-pa nih tling te, tin, a u fapa, Pu K. Lianzuala pawh he House-ah kan member term hnih zet mai a lo ni a. He ram rorelnaa an chhungkaw contribution hi a ropui hlein ka hria a, vawiinniah hian, ‘chhuantlak an ni’ tih hi ka sawi duh a.

Tin, ka han sawi leh duh chu, zirna kawngah thahnem a ngai hle tih a lang a. Private-in lehkha te zirin, nupui nei tawh chungin a han bei tlah tlah a, BA pawh 1965-ah distinction-ah meuh a passed a. Khatiang khan eizawna hrang hrang Primary-ah te, Middle-ah te, High school-ah te zirtir hna te a thawk a. Trained graduate anih piah lamah zirtirtu association-ah te pawh President hial te pawh niin, a contribution kha a ropui ka ti a, a chhuanawm ka ti tak zet a ni.

A tawp lamah han sawi kan duh chu, amah ina a ngaih pawimawh a sawi fo thin chu - thalaite a ngai pawimawh em em a, ‘thalaite khawvel’ tih hi a tuipei ve a. Zoram thalaite’n awmze nei zawka he ram an kaihhruai hun tur hi a thlir a, chu chu a sawi fo thin an ti a. Tin, a tu leh fate, a chhungte zinga a thuchah pawimawh chu - “rinawmna lo vawng nung thin ang che u; rinawmna hi a pawimawh a ni” tiin a tu leh fate a chah thin a ni an ti a ni.

Chutianga pa-ropui kan kan chan ta leh, sun a lo ngai ta hi a paw ka ti takzet zet a ni. A nupui leh a fanaute, a tu leh fate, Pathianin thlamuanin, awmpui zel rawh se.

**HON. SPEAKER** : Sawi duh dang kan la awm em? Member zahawm tak Pu Vanlalhlana ilo sawm ang.

**PU VANLALHLANA, HON. MINISTER:** Pu Speaker, ka lawm e. Pu Lianchia te nen hian politic-ah party pakhatat kan awm ho thin a. Chuvangin, a hun hnuhnung vawiin a kan hman meknaah hian thu tawi tea han sawi ve ka duh a.

Pu Lianchia hi Kawilam hnam a ni a, a hming bula ‘KL’ tih a dah hi ‘Kawilam’ tihna a ni. Kan ngaihthlak ang khan Biate chhuak a ni a, Biate neitu leh inti-Biate em em mai a ni a; ‘Biate’ tih hi a sawi lar khawp mai thin a ni.

Zirna lamah BA distinction-a a passed hnuah khan Guwahati-ah MA zirin a awm a, amaherawhchu, MA chu a zirchhuak ta chiah lo deuh a ni. Amah hi mi invawng-thianghlim, zu in lo mai ni lo, zuk leh hmuam ti lo hrim hrim a ni; sa pawh ei tawh lo, chutiang mi chu a ni. Mizo-ah chuan kan hriat leh kan hmuh thin angin palian, ngo a ni a, a hmel pawh tha veh vawh tak, ‘Hmanlai Lianchia te pawh kha a hmeltha bik chuang lo ang e’ tih tur khawp a ni a. Tin, thusawi a thiam em em a, tawngkam bungrua mak tak tak, hlimthlak tak tak a nei thin a ni. A zia hi mi huaisen, mi dik leh hlemhle lo a ni a, a huaisen zia sawi dawn chuan thui tak sawi tur a awm a, buai lai te sawi a ngai a; khati lam chu sawi tam ta lo ila. Midik leh hlemhle lo a ni a. Health Minister anih lai khan supplier leh contractor-ten hmuh an tum pawhin a hmu duh ngai lo a ni.

Tin, Minister anih lai khan inleng te chhawn turin hmanraw thenkhat dawhkan (table) te an pe a, minister anih tawhloh hnuah khan a lak kir tir leh vek a; “ka bungrua ni lo hi ka inah a awm tur a ni lo” ti tlat mi a ni. Mirethei, damlo ten a thlawna damdawi leh inenkawlana an hmuh theihna tur a ngaihtuah hle a, a hunlai khan ‘State Illness Fund’ tih te pawh a tichhuak a, amaherawhchu, a hnuah chhonzawm a ni leh ta lo a ni.

A hun hmasa lam kan ngaihthlak ang khan thalai leader, Mizo Union-ah te a ni a, kaihruaitu pawimawh tak a ni thin a. 1982-ah PC a rawn zawm a, a hnu deuhah keiniin kan zawm a, tichuan, party pakhatang kan awm a, a kaihruai, a chherchhuahte kha kan ni ta a ni. Assembly-ah wawi thum lai thlan tlin a ni a. A hun hnuhnung kan ngaihthlak ang khan ZPM-ah a kul a taiah tangin, he party a lo pianchhuah theihna tura tan contribution hlawk tak nei a ni. A thihna hi ram tan channa nasa tak a niin ka hria a. An chhungte Pathianin awmpui se, “Mizoram pawhin mi huaisen leh mi dik kan chan a ni” tih kha wawiin niah ka han tarlang duh a ni e. Ka lawm e.

**HON. SPEAKER** : Midang kan la awm em? Kan awm tawh loh chuan, kan business dangah kan lut ang a. Helai screen-a kan hmuh ang hian, tun tum chu helai bang kil thumah hian a awm a. Khawngaihin Pu Beichhua .. Aw, sawina hun hmang duh kan la awm em ni? E, awle. Sunna hun kan hmang ang a, minute khat ngawi rengin kan ding ang. Min hrethiam teh u, khawngaihin. (*A sunnan minute khat ngawi renga din a ni a.*) I thu ang u le.

Khilai screen-ah khian display a ni a. Aw le, *Zawhna & Chhanna* hunah kan kal dawn ang a. Khitah khian ‘talking time/speaking time’ tih khi a awm a; khi khi kan hmu thei vek ang a, member ten. ‘Hun min pe tlem bik; chumi chu i pe tam bik’ tih te awm thei a ni a. Tin, a lo awm tawh thin nia sawi te pawh a awm avangin, khi khi kan zui dawn a ni. Sawitu pakhat khan rei tak, duh tawka sawi te kha a remchang dawn lo a ni tih kha hria ila a tha ang e.

Tin, thil la tih kim loh kan nei a. Vawiin niah hian Pu KL Lianchia chhungte an lo kalin ka ring a. An lo kal chuan khawngaih takin an awm hmunah lo ding se.... (*Pu KL Lianchia chhungte an ding a..*) Awle, a lawmawm e.

### **QUESTIONS & ANSWERS**

Tichuan, *Zawhna & Chhanna* hunah kan kal dawn tawh ang a. *Zawhna* tam zawk leh zau zawka kan address theihna atana hun tam zawk kan neih theih nan, hengte hi zawm hram tum ni se –

*Zawhbelhna* (Supplementary Question) ah *zawhna* neituin *zawhbelhna* a neih chuan lak a ni ang a. Mahse, hei hi *zawhna* pahnih-khat ni hram se; a theih chuan *zawhna* pakhtatah khung len hram ni se a lawmawm khawp ang. Hei hi hun tam zawk question dang atan zau zawka kan address theihna tura ruahmanna neih a ni a. Member dang pahnih atanga lak kan tum ang a. *Zawhbelhna* zawt tuin an *zawhna* kha *zawhna* tam tak ni lovin, pahnih-khtatah khung tum hram ni se, tih kha a ni a. Tin, sawitu dinglai an awm chuan inzah hram ila, kan sawi hunah kan sawi ve leh mai turah ngai ila, chutiang chuan kalpui kan tum dawn nia.

Tichuan, *zawhna* hmasa ber zawt turin, Tuvawl Bialtu Member zahawm tak Pu Lalchhandama Ralte ilo sawm ang.

***Starred Question No. 1 - Mitthi ruang phurhna chungchang.***

**PU LALCHHANDAMA RALTE, OPP. LEADER:** Pu Speaker, ka lawm e.

Tun Session-a ka *zawhna* a chhuak hmasa ber hi a lawmawm ka ti a, lawmthu kan sawi a ni.

***Starred Question No. 1 - Social Welfare, Tribal Affairs, Women & Child Development Department enkawltu min chhan atan –***

- a) Social Welfare Minister-in Ni 14.12.2023-a Assembly House a hriattirna a puan ang khan, mitthi ruang phurh hi sawrkarin engtik hun atangin nge mawhah a lak dawn?
- b) Budget-ah ruang phurhna hi dah luh (reflect) tan a ni em?

**HON. SPEAKER :** Chhang turin Minister zahawm tak Pi Lalrinpuii, a changtu Minister ilo sawm ang.

**PI LALRINPUII, HON. MINISTER:** Pu Speaker, ka lawm e. Leader of Opposition Pu Lalchhandama Ralte, *zawhna* ka *chhanna* chu –

- a) Sorkarin tunah hian ruang phurh inkaihhraina tur dan a duang mek a. Ngaihtuahna tam tak sen ngai thil a nih avangin, he thil hi cabinet agenda-ah pawh chhawpchuah tum a ni mek a ni.
- b) Ruang phurha hmalak dan tur leh inkaihhruai dan turte hi buaipui mek niin, department chuan budget proposal-ah RE atan ₹1 crore (Nuai 100) kan dah a. Tin, BE atan 2024-2025-ah hian ₹5 crore kan dah a, hei hi kan thelut mek a ni.

**HON. SPEAKER** : Zawhna neituin zawhbelhna a neih chuan ilo sawm ang.

**PU LALCHHANDAMA RALTE, OPP. LEADER:** Pu Speaker, a lawmawm e. Kha, ‘sawrkar-in ruahmanna neiin guidelines te a duang mek’ tih kan han dawng a, a lawmawm khawp a. Tin, budget-ah pawh *token*-in ruahmanna an siam tih te han hriat khan, a thlamuanthlak ka ti a. He House, kan zavaia kan lungrualna tak niin ka hria a. Ka han zawhbelhna chu -

- i) Rin aiin a nghawng leh a kal dan tur hi a hautak dawn avangin, motor hmanna rate tur te hi a ‘km’ anga siam tur a ni dawn nge? Tin, a motor hman tur te pawh kha a thenin pick-up, a thenin bus an hmang thei a; khangah khan mumal deuhin ruahmanna kan nei dawn em?
- ii) ‘Ruang phurh’ kan tih hian District Hospital, *entirnan* – Aizawl, Lunglei, Siaha, Lawngtlai leh Champhai-a thi te kha a phur tel dawn em; Aizawl chauh nge? Tin, phaiah kan mite an lo boral a, chung ruang phurh hawte chu hei hian a huam tel dawn em? tih a ni e.

**HON. SPEAKER** : Chhang turin Minister Pi Lalrinpuii ilo sawm ang. Zawhbelhna dang a awm em? Aw le, Pu VL Zaithanzama, chumi zawhah Pu Lalrinsanga Ralte ilo sawm ang.

**PU VL. ZAITHANZAMA:** Pu Speaker, ka lawm e. Social Welfare Minister zahawm tak chhan atan ka zawhbelhna chu –

Old Age Pension Scheme-ah Central atanga lo kal thin hi State sawrkarin ₹1,000 zelin pek belh thin a ni a, hei hi tihpun tumna a awm em? tih ka zawt e.

**PU LALRINSANGA RALTE:** Pu Speaker, a hmasa berah ka phar va mai a, a chhangtu tur Minister rawn din hma atang khan; Speaker-in min rawn hmu vat hi a lawmawm ka ti khawp mai. Amaherawhchu, hei ka zawh tum ang deuh tho kha Pu Zama, member zahawm takin a rawn zawt a, heti zawng hian kan zawt ang a –

Kan sawrkar, election hmaa kan inzawrhna, tin, kan *Sustainable Development & Reform Policy* (SDRP) ah chiang takin a inziak a. Old Age Pension scheme hi central-

in a kalpui mek bakah, ‘Mizoram sawrkarin thla tin pension atan ₹1,000 a pek belh ang’ tih a ni a. He ₹1,000 hi a dah belh em? Pek belh tumna a awm em? tih kha ka zawhbelhna a ni e.

**HON. SPEAKER** : Chhang turin Pi Rinpuii ilo sawm ang

**PI LALRINPUII, HON. MINISTER:** Pu Speaker, ka lawm e. He House zahawm taka, Member te zawhna chu a indawtin ka han sawi ang e.

Pu Chhantea Zawhna - Motor hmanna rate hi km-wise a siam tum a ni a. Tichuan, Dist. Hospital a thite chauh hi tuna kan ruahman danah chuan kan sawi hranpa lova. Kan ruahman chhinnaah chuan, an thihna hmun atanga Mizote chu mahni in luma ruang inthlen duh kan nih avangin, ‘an thihna hmun atanga ruang chu phurha, an chenna inah phurh thlen ni se’ kan ti. Chutih lai chuan, ruahmanna kan siam mekah chuan, phai lama thite erawh chu kan huam lo.

He House zahawm tak Member Pu VL Zaithanzama zawhna - Social Welfare-ah Old Age Pension Scheme chungchang hi ₹1,000 in tihpun tur a ni a. Pu Rintea zawhna nen khan ka rawn chhang kawp mai ang a; budget-ah pawh kan dah nghal a ni.

**HON. SPEAKER** : Zawhna pahnihaah kan kal ang a. Zawhna zawt turin Siaha Bialtu Member zahawm tak Dr. K. Beichhua ilo sawm ang.

*Starred Question No. 2 - District rang hranga sawhthing lei dan tur chungchang.*

**DR. K. BEICHHUA** : Pu Speaker, ka lawm e. Ka zawhna, Horticulture Minister zahawm tak chhan atan –

“Sawrkarin sawhthing a lei tur hi district hrang hrangah eng tianga lei tur nge ni ang? District Capital emaw, a thartute khua theuhah emaw leisak theih a ni ang em?” tih a ni e.

**HON. SPEAKER** : Chhang turin Prof. Lalnilawma, Minister Horticulture Department changtu ilo sawm ang.

**PROF. LALNILAWMA, HON. MINISTER:** Pu Speaker, Siaha bialtu Dr. K. Beichhua zawhna ka chhanna chu –

Sawrkarin sawhthing hi district hrang hrangah society kaltlangin lei a tum a. Khaw tinah emaw, district hrang hranga society dinna tawh phawtah chuan society kaltlanga lei tum a ni.

**HON. SPEAKER** : *Zawhbelhna - Zawhna neitu Dr. K. beichhua.*



**DR. K. BEICHHUA** : Pu Speaker, a lawmawm khawp mai. Ka *Zawhbelhna* chu –

Tun dinhmunah hian sawhthing lei a ni tawh em? Sawrkarin sawhthing a lei tur hi rate a siam tawh em? Siam ni ta se, kg khatah eng zata lei tur nge ni ang? Tin, Zokhaw lamah chuan nasa takin sawhthing hi an ching a, hei hi kum tawp lama thar hi tam tham deuh ni ta se, kan lei tur chin hi limit siam nge ni, an thar ang ang kan lei thei vek dawn em?

**HON. SPEAKER** : *Zawhbelhna* - Pi Baryl leh Pu Robert Romawia te ilo sawm ang.

**PI BARYL VANNEIHSANGI:** Pu Speaker, Minister zahawm tak chhan atan – Society kaltlanga leitur a nih avangin khaw thenkhatah chuan society hi din tawh sa te a awm a. Kha kha kan ring mai thei dawn nge nia, a thar din kher tur? tih leh, he Society hi nakin lamah kan thlai dang - aieng te, hmarcha te pawh kan sawi a. Khangah khan a thar kan din zel dawn nge, kan ring tlang thei dawn? Thlai hrang hrang emaw, sawrkar hmalak zelna turah khan tuna kan din hi rin tlang theih a ni em?

**PU ROBERT ROMAWIA ROYTE:** Pu Speaker, ka lawm e. Horticulture Minister zahawm takin a chhanna chin kha chu a lawmawm a.

Chutih rual chuan, sawrkar kalphungah hian tih ngaite, tih turte tam tak a awm thin a. A sawhthing rate ZPM-in campaign nana a rate an han puanchhuah, ‘chutiang chuan kan lei ang’ kan han tih ang chi kha sawrkar khan a ring ve mai nge, rate quotation te, rate tender tein sawrkarin a rate a fix? tih lai kha kan zawt duh a. Tin, sawrkarin khatiang taka sawhthing tam a lei khan a hralhna tur ruahmanna engtiangin nge a siam? Hralhna tur Chiang sa a awm em? tih te a ni e. Ka lawm e.

**HON. SPEAKER** : A chhang turin a changtu Minister zahawm tak Prof. Lalnilawma i lo sawm ang.

**PROF. LALNILAWMA, HON. MINISTER:** Pu Speaker, ka lawm e. *Zawhbelhna* kha hetiang hian chhang dawn ta ila -

“Tunah hian lei a ni tawh em?” tih kha - tun dinhmunah chuan sawrkar ruahmanna a siam anga lei a la ni lo.

“A rate a siam em?” tih zawhna kha - a rate chu sawrkarin ‘kg ah 50/- aia hniam tur a ni lo’ tiin a fixed a, a sang lam kha chu duhthusam a ni a. Society-te leh a leitute nen an indawr ang a, khata an inbiakremna ang anga kalpui tur a ni.

“Thar tam se, an thar ang ang sorkarin leisak a tum em?” tih chhanna chu - Budget-ah pawh dah a ni dawn a, budget kan la thlir ho dawn a. Chutah chuan, sawrkarin an thar

ang zah zah an hralh theihna tur, kan minimum 50/- kan fixed rate-a lei dan tur ruahman kha budget-ah pawh dah tur a ni.

Pi Baryl-i zawhna chhanna chu – Society hi Mizoram hmun hrang hranga din tawh sate an awm a, la din lohna khuate a awm bawk a. Chutah chuan, an society dinhmun te kan zir chho zel ang a, rintlak leh rin theih an awm a nih chuan, kan ring nghal ang a. A thar din tulna khua leh a district angah chuan a tul angin hma kan la zel ang.

Tichuan, thlai hrang hrang a lo awm dawn ta a, ‘engtia kalpui tur nge ni ang’ tih zawhna kha, Pu Speaker, heti hian han chhang leh dawn ta ila - Duhthusam chuan Khaw pakhtatah society pakhat ding se, kha khan thlai chikhat chauh ni lo, a vaia lei thei tur, buaipui thei tur Society kha kan ring thei a. Chutih rualin, a thlai te-tea indin an nih pawhin sawrkar nen hma kan la ho ang a, kan thlir ho zel ang.

Kan MLA zahawm tak Pu Robert Romawia zawhna, ‘Quotation a awm tawh em; A rate hi engtia fix nge a chiang sa awm em?’ tih zawhna chu heti hian han chhang leh dawn ta ila –

Quotation hi sawrkarin a chhuah dawn lova, khang society khawtina kan dinte kha a leitu turte nen an indawr ang a, tender te pawh an chhuah ang a, an ngamna rate kha an fix tur a ni mai a, chutiang chuan kan kal ang a.

‘Tunah hian a chiang sa a awm em?’, tih laia hi - Chiang sa a la awm lova. Kan thlai tharte a rawn thara kan seng hunah society te nen la indawr tur a ni a. Sawrkar-ina a tih ber tur chu, a rate kan fixed sa aia hniama an chhang anih chuan, sawrkar a rawn che ve ang tih kha ka chhan theih tawk a ni e. Ka lawm e, Pu Speaker.

**HON. SPEAKER** : Aw le, *Starred Question No. 3 - Zawt turin Tuivawl Bialtu Member zahawm tak Pu Lalchhandama Ralte ilo sawm ang.*

*Starred Question No. 3 - Hmunphiah lei dan tur chungchang.*

**PU LALCHHANDAMA RALTE, OPP. LEADER:** Pu Speaker, *Starred Question No. 3 - Soil & Water Conservation Department changtu Minister chhana tan –*

- a) Sawrkarin hmunphiah lei tura inremna a siampui RR Associates te hnen atangin tax lakna tur provision siam tel a ni em?
- b) Hmunphiah hi a leina tur a ro (dry) rate hi kg ah engzat nge? A hringa leina tur rate siam ve a ni em?
- c) A hringa leina tur rate hi siam ni lo ta se, engvang nge?
- d) Hmunphiah chingtute’n a hralhna kawngah harsatna nasa tak an tawh mek hi sawrkarin a hria em?

Ka lawm e.

**PU LALTHANSANGA, HON. MINISTER:** Pu Speaker, ka lawm e. Hei, zawhna ka vawikhat chhanna tur a ni a, kan MLA zahawm tak zawhna chhanna chu -

- a) Sawrkarin RR Associates-te hi remna a siampui hranpa lova. Mizorama Hmunphiahte sorkar rate bituk aia hniam lova lei a phalsak mai a ni. Tax lakna tur provision siam tel a ni lo. Transit pass pe chhuaktu EF&CC Department hnenah erawh administrative cost kg khatah cheng 1 a pe ve ang.
- b) Sawrkar chuan kum 2024 chhung atan bik hmunphiah ro leina tur rate, Grade A - kg 1 cheng 100/- aia hniam lo; Grade B - kg 1 cheng 80/- aia hniam lo turin a bituk.
- c) A hringa leina tur rate erawh a bituk lo. Hmunphiah hring hi tiro turin hun leh tha tam tak sen buai a ngaih avangin, sawrkar tan a hringa lei a remchang rih lova. Chuvangin a hringa hralhna tur rate pawh a fix ta lo a ni.  
Hmunphiah hi zo leh phaia a thar hun a inang lova. A leitu pawnlam mite'n Vairengte leh a chheh velah a thar tih an hriat meuh chuan, zo lampang ami chu a lo chang hman hial tawh thin a. He a thar hun inang lo avang hian a hring rate siam pawh a tih harsat phah bawk a ni. Market study team te zirchianna atanga thil pawimawh tak pakhat lo lang chu, NLUP hlawhchhamna ber pawh, a hring nen an buaipui tel vang a ni. Hmunphiah hi a buka hralh a nih avangin a hring rei theih nan, a buk rit zawk theih nan tuih chia mai duh pawlte an lo awm a, hetah hian lei leh hralh kawngah inbumna a lo awm thin a. Chuvangin, sawrkar lam atanga a rate bithliah loh mai tha zawka hriat a nih avangin, a hringa leina rate a siam ta lo a ni.
- d) Hria e.

**HON. SPEAKER** : *Zawhbelhna* - Zawhna neitu Pu Lalchhandama Ralte, Opp. Leader.

**PU LALCHHANDAMA RALTE, OPP. LEADER:** Khawngaih takin, hmunphiah chungchang hi kan ram issue tunah chuan a nih avangin kuthnathawktu, hmunphiah chingtu chhungkaw sang tam takte tunah hian lungngaiin an indawm kun a, zawhna pawh tlemin ka han pe thui deuh a nih pawhin min hriatthiamna ka ngen a ni.

Kha, chhanna kan dawng ta a. Sawrkar khan rate bituk, a ro - kg ah cheng 100/-, 80/- tih te a sawi a. Sawrkar rate bituk aiin tunah hian tlawm te tein an lei mek niin hriat a ni a. A roa hralhtute hnenah hian sawrkarin price support a pe dawn em? Tin, RR Associates te kha inremna kan siampui chia lo an ti chungin Minister pahnih - Agriculture leh Soil changtu Minister-te leh Adviser to CM, (marketing) lam changtute'n Joint Press Statement an siamah khan, 'sawrkarin lei tura a sawmte' an ti a, a bik taka an chawkluh RR Associates te hian Mizoram-ah engtia zau nge tun

dinhmunah hian an cover tawha, khawi hmun hmun chin te nge an lei tawh? tih kha ka han zawt duh a.

Pu Speaker, a dawt lehah chuan, Ni 13.2.2024-a ka han sawi Minister pahnihte leh Adviser to CM te khan joint statement an siamah khan, “Society ten mahni remchan dan angin an khuaah a tihral dan lo dap mai rawh se” tih a ni a. Ni 15<sup>th</sup> February, 2024 a ZPM Assembly-ah kan House Leader zahawm tak, kan Chief Minister khan, “Hmunphiah hralh hun chhung te, hei a season a ni a, duh angin kan cover zo hman lova, mahni remchan dan dan ang angin khaw tinin a tihral dan lo ngaihtuah mai rawh se”, tiin a sawi leh ringawt mai a. Hei hi sawrkar kal dan tur a ni dawn em ni? Pu Speaker? Chuvang chuan kuthnathawktu ten an ching a, kan inzuar a, a leina man tur rate kan intuk a; vawiinah thingtlangah an tap mek a ni. Kg ah 120, 130/- a an leite cheng 50-60/- in hralh a ngai a, a hring 60/- man ni te kha 15/- a tih a ngai tawh a. Heti khawpa mipuite an rum lai hian, “an tihral theih dan ang angin lo tiral rawh se” tih hi kalphung tur a ni dawn em ni?

**HON. SPEAKER** : Member zahawm tak Pu Rinsanga Ralte.

**PU LALRINSANGA RALTE:** Pu Speaker, Soil Department Minister chhan atan ka zawhna chu -

Hmunphiah hi tunlai issue a tling khawp mai a, a bik takin kan bialah phei chuan kan eizawna bulpui ber pakhat a ni a. Kum dangah, MLA term hmasaah khan a rate chhiat lai berin a hring kg-ah 40/- ai khan a tlahniam lo a ni. A ro kg-ah leh a hring kg 3 hi a inhen thin avangin, keini bial leh hmun tamtakah chuan a hringa hralh hi kan duh a. Tin, kuthnathawktute tan pawh a awlsam bik a. Chungvang chuan, tun sawrkar, *Enchhin-Sawrkar*-ah ‘a ro nge, kan lei dawn a hring’ tih sawi lovin ‘hmunphiah kg-ah 100/-’ tiin kan inzuar a, a hnuah ‘A Grade -100/-, B Grade - 80/-’ tiin. Chu chu kuthnathawktute’n nghakhlel takin kan thlir a. Vawiinniah hian, a bik takin hmunphiah chingtu mirethei leh harsa tak takte, an chhungkaw dinchhuah vena tur, an fate sikul kalna tur leh an chhungkaw mamawh leina tura nghakhlel taka a rate thaa lei tuma kan thlir lai hian, kum dangah 50/-, 60/- a hringa an lei lain, vawiinniah Vairengte-ah 15/- te a ni. Hei hi “kan sawrkar kalphung a fuh loh deuh vang em ni aw” ka ti a. RR Associates te kan han be rema, lei tura kan han tih hian, department lam te nen tum dang, hun danga an lo kalpui dan te kan zir chiang em? tih hi ka zawhna pakhatna a ni a.

Tin, ‘tax holiday’ tiin ropui takin ram mipuite hriatah kan puang a, sawrkarin, kut hnathawk tan fel ber, tha ber ang maiin ‘tax holiday’ tiin kan puang a, mahse transit pass kg-ah 1/- kan lak sak leh si a, hei hi tax tho a ni. Chuvang chuan, hmunphiah rate a chhiat em avangin transit pass te hi lak tawh loh dan a awm em? tih hi ka zawhna pahnihna a ni a.

Tin, ZPM Assembly-a kan House Leader thusawi nichina kan Leader of Opposition-in, “hmun hla leh kilkhawra mite kan inlei hman lova; RR Associates ten hlawhfa tur an inhmu zo lova”, tih a rawn sawi a kha, wawiinni hian Vairengte leh a chheh vel hi hmun hla a ni em? Khawi atangin nge hmun hla leh kilkhawr chu kan teh? tih hi ka zawhna ni bawk se. Kum dang zawng zawngah Vairengte leh a chheh vel, *entirnan* - Saipum, Saiphai, Vairengte tlang dung zawng zawng hi hmunphiah tamna bawr ber a ni a, henglaiah hian leikhawm thin a ni. Chumi hmunah pawh chuan wawiinniah hian lei tur kan inhmu zo mang ta lo hi a pawl khawp mai.

Tin, ka zawh pakhat leh chu hei hi a ni a - Support price a ni a, a rate a chhiat tak em avangin cheng vaibelchhe 110 SEDP pawisa thlaithar lei nan kan dah ta a. Chu cheng vaibelchhe 110 atang chuan kan lei sak thei mai lo em ni? A rate a hring la siam chiah lo mah ila, cheng 30-40 talin sawrkar hian kan lei sak thei em? tih kha ka zawh belhna a ni e.

**HON. SPEAKER** : Pu Malsawmtluanga ilo sawm ang.

**PU V. MALSAWMTLUANGA:** Pu Speaker, ka lawm e. Kan Minister zahawm tak chhan atana ka *Zawhbelhna* chu – Tunah thlai thar leina rate duana hi engtik atanga hman tan tur nge? Ka lawm e.

**HON. SPEAKER** : Zawhna kha pahnih chin (a zawhna neitu lo khan) kan ti a, pahnih an awm tawh a, engtin nge kan duh dan? Kan la leh dawn nge? A nih leh pakhat i la leh ang aw. Zawhbelhna - Pu Muanpuia hi a pharna a rei tawh riau a, ilo sawm ang.

**PU LALMUANPUIA PUNTE:** Pu Speaker, ka lawm e.

Tuna thlai thar kan leina tur hi budget hlui MNF sawrkarin engah maha an ngaihsak loh hnuhnawi kha a ni a, chu chu sawrkar hian ngaihsak ve kher tur a ni em? Kan budget siam a la ni lova, chuti chung chungin kan CM khan khati zat kha kan dah a ni a; khami chhungah khan MNF sawrkar kal ta ina enga tan maha an tih loh pawisa tling khawm sa cheng vaibelchhe 110 a pek belh atang khan kan ti thei em?

**HON. SPEAKER** : Awle, chhang turin Minister zahawm tak Pu Lalthansanga ilo sawm ang.

**PU LALTHANSANGA, MINISTER:** Pu Speaker, ka lawm e.

Hei, hmunphiah hi lei turin sawrkar thar hian kan inruahman a. Kan Opposition Leader zahawm tak Pu Chhantea zawhna kha – RR Associates te hi hmunphiah lei tur hian kan biakpawh theih awmchhun an ni a, kumin hi eng emaw ni tehreng ni, hmunphiah lei tur

hi an lo kal miah lova, an awm lova. Chuvang chuan, RR Associates te nen agreement pawh ni lovin, inhriathiam tawna angin kan siam a. Kan inbiakremna no. 4-naah pawh khan, ‘hmunphiah lei duh dang an lo kal dawn a nih chuan, an lo kal thei ang’ kan ti a. A rate hi grade-a then a ni a, Grade A (A ro) - 100/-, Grade-B (A hring) - 80/- kan ti a. Chutiang chuan, anni pawh experience an la nei lo hle a, an lo kal a, an han ti dawn a, rin aiin an hmalak dan a lo dik tawh lova; chutiang chuan harsatna an rawn nei chho a. Chuvang chuan, sawrkar ang pawhin theih tawp kan han chhuah a, hmun hrang hrangah lei tur pawh kan han en zel a. Tunah pawh hian a lei tur hi Tlabung lama Taj Company anni a. Tin, Dampa, Mamit District lamah chuan Gala Company te tunah hian an lut tan a. Chutiang chuan tunah hian RR Associates te hian hmar lam tlangdung lamah hian an lei mek a ni.

Tin, nichina kan sawi tawh ang khan, “hmunphiah chungchangah hian sawrkar hian support price hi in pe dawn em?” tiha kha – Sawrkar pawh hian support price hi pek kan duh viau a, amaherawhchu, Sawrkar dan anga kal dawn chuan heng item hi Sawrkar file a kala, notified a ngai a, chumi hma chuan a theih loh a ni; chu chu vawiinnia kan harsatna a ni a. Chuvang chuan, kan House Leader zahawm tak, kan Chief Minisater pawhina ‘a rem ang anga’ tihna laia kha, kha zawk kha a ni a. Kan hriat theuh angin December Ni 8 ah he Sawrkar hi a lo piang a, holiday, krismas holiday te zawng zawng han paih vek phei hi chuan thlahnih emaw chauh hi kan la sawrkar a ni a, kan la inruahman fel hman lova. Kum 2024-2025 chhung te hi chu preparatory budget-ah kan hmang ang a, 2025-2026 ah hi chuan lei kan tum ang a; rate fix-in leh society pawh a nih angin a kal tawh ang a; Society registration pawh tunah hian awlsam zawka ti turin tunah hian kan Co-operation Minister-in tan a la a, hma a la mek a ni.

Chutiang chuan, tunah hian hmunphiah lei dan tur hi ruahmanna kalpui mek a ni a, kan market study team ten uluk takin an zir a. (Ka han khaikhawm deuh a ni; a mal mala react chuang lo khan) khatieng khan tunah hian kan kal chho mek a ni a. Kuminah hi chuan a theih theih angin tihral mai ni se kan han tihna te pawh, Bagha-ah khuan old stock hi a lo tam tih te hriat a ni zela, chuvanga lo kal lo niin an sawi a ni. Chu chuan vawiih hian harsatna min thlen a. Sawrkar hmasa kha a malsawm hle a niang hmunphiahah. Chutiang khawp chuan khuta an lei zawng zawng kha tihralna an la hre mang lova, Bagha vel atanga rawn lei thin te pawh chu chu an ipna chhan a ni tih te pawh kan lo ral hriat ve a ni. Chuvang chuan, heng zawng zawng hi sawrkar chuan a hria a, heng harsatnate pawh su kiang turin tunah hian theihtawpin tan a la mek a. Heng ‘support price’ kan tih, kan leina rate ang, nichina Serlui bialtu MLA zahawm takin, ‘hei hi a tih theih em? Tunah hian 20-30/- vel a ni a, 100/- in ti si a’ han tih te pawh kha, tih kan chak khawp mai. Amaherawhchu, sawrkar dan anga kalpui a nih loh avang khan kan la ti thei lo a ni.

Hmunphiah kan lei chungchangah hian theihtawp kan chhuah a, chu theihtawp kan chhuahna chu tunah pawh hian buyer an rawn inhawng tan a. Tuna RR Associates te hi

Haryana-ah khuan an in based a, heta tang hian a bulk-in UP leh a chheh velah an thawn chhuak thin a ni.

**PU LALRINTLUANGA SAILO:** Pu Speaker, *Point of Clarification* - Kan Minister zahawm takin a chhannaah khan, 'MNF sorkar kha a vannei mang e, hmunphiah tihral chungchangah khan; nikum lama thar kha Bagha-ah old stock a la tam' a ti a. Sawrkar hmasa khan Serlui bialtu zahawm tak nen kan zuk kal a, old stock a awm lova. Tuna harsatna tak chu, sorkarin a rate in bithliah a, 'kan la dawn tih' avangin sumdawng an rawn lut ta lova, lak leh theih si lovin ka bialah pawh Hmunphiah ro kg-ah 120-135/- thlenga lei thin kha, wawiinah 55/- in an hralh thei lo a ni zawk a. Chuvang chuan, sawrkarin a bithliah hi 'a tifuh lo hret em aw' tih kha a ni a. A chhan chu, khami rate anga indawn lova, engkim mai sawrkar kalha privatisation anga kalpui leh mai kha a tha zawk lawm ni?

**PU LALTHANSANGA, HON. MINISTER:** Sorkar hi a 'facilitator' tur chauh a ni a, Society-in hei hi a kalpui ang a, Society-in a kal dan tur engkim a ruahman ang a. A chhan chu, pawn lampanga buyer ten an duh duha a rate an rawn fix tawh lohna tur a ni. Kalphung fel taka kal turin sawrkar hi a inpuahchah mek a ni. Kan reporter ten an zuk hriat dan min rawn hrih a ni a. Chuvang chuan, kan hriat danah chuan 'old stock a awm a ni' tih kha a ni a.

Chuvang chuan, hemi chungchangah hian kumin, tun transitional period-ah hi chuan min lo hriatthiam pawh kan dil nghal a, nakum lamah chuan min duh khawp lohna zawng zawng hi ka rawn tihpuitlin hman kan tum tawh ang.

**PU ROBERT ROMAWIA ROYTE:** Pu Speaker, *Point of Clarification* kha ka dil si a. Pu Speaker, a pawimawh em a, Minister zahawmtak te thusawi laia inrawlha eng emaw zawngin min lo ngai lo hram ula, tin member ka nih angin *point of clarification* kha kan dil thei a ni.

Hmunphiah chungchang hi a nihna takah chuan SEDP atana sum sawrkar hmasain a dah thlap, SEDP programme kha chu kal zel sela chu hmunphiahah hian mualphona thleng lo tur a ni. SEDP atana sum sawrkarin a dah thlap, allocation pawh a tihfel, Planning Deptt-ah Finance Department pawhin phalna a pek tawh, a dawngtu tur pawh Mizoram dung leh vangah chhungkaw singruk thlanchhuah tawh, chu pawisa chu Hmunphiah lei nan sawrkar tharin a it tlat a. A document pawh Finance Deptt-ah ka dil chhuak a, MLA ka nih angin, kan privilege te a nih angin min pechhuak a, a lungchhiat thlak khawp mai. Chuvang chuan, SEDP kha MNF kan sawrkar tirhin a kal mek a, a kal ang angin SEDP kha kan chhunzawm zel, keini chuan; financial year laklawhah SEDP sum kha thildangah kan pawt peng lo. Mahse, tun sawrkarah chuan, SEDP pawisa ₹1,15,000 leh ₹1,11,000 kha thlai thar lei nan an ti a. A thlathar leitu lam te,

(supplier dangte, Society lam te pawh a ni ang) an la inpeih si lova, kan mualpho a nih hi. Chuvang chuan, tih loh loh tur tih hi chu ram rorelnaah pawh mualphona a ni hi.

Tunah hian chhungkaw 60,000 SEDP dawng tura an hming pawh lakkhawm vek tawh, chutiang tur atana lo inhmakhawsuiha chhungkaw ruahmanna pawh lo siam tawh te an pawisa tur chhuhsak a ni a, an hminga pawisa allocation leh expenditure sanction pawh awm vek tawh, personal claim hial a ni. Chumi kan tih avang chuan, hmunphiah rate hi kan tisual a, a chhe ta a ni. Pu Speaker, ka lawm e. (**Pu R. Rohmingliana:** Pu Speaker, *Point of Clarification* - tuna a sawi laia a sawi mai theih chuan..)

**HON. SPEAKER** : Khawngaitakin Member zahawm takte khan min hrethiam ula, point of clarification kan tih zel chuan zawhna dang kan ti hman lo ang.

**PU LALTHANSANGA, HON. MINISTER:** Pu Speaker, ka lawm e. I rorelna a zahawm e. An tang hle mai, ka vei lama mite. A lawmawm a, tan awm pawh a ni a.

Nia, an lo tih vek tawh SEDP pawisa kha keini khan kan hre vak chuang lo. Tin, chumi rual chuan, sawrkar hmasa Rretailer-te, SASCI sum te pawh hi anihna takah chuan kan kaltlang tir deuh vek a ni. SEDP teacher te pawh March thla thleng sawrkar hmasain a lo tih kha, kan kaltlangpui pawh a ni. Chuvang chuan, kan ngilnei khawp mai. Sawi ve duh ila chuan sawi tur ka hre khawp mai. Sawrkar hian mualphona a nei lova, MNF a sawrkar chiah a, an sawrkar tukah khan Zarkawt retailer chu an ban nghal tawp. Keini chuan kan ti ve lo, kan ngilnei khawp mai. *Kalphung-thar* a ni a, chuvang chuan, Pu Speaker, hmunphiah chungchangah chuan policy a kan lo neih rate kha kan tarlang a ni. Tun 2024, 2025, 2026, 2027 ah chuan, kan neih leh neih lohah, tuna *point of clarification* an rawn sawi hrang hrang kha chu kan la chhang dawn nia. Tun hunah hi chuan Pu Speaker, sawrkar anga kan tih theih loh a nih vangin kan la ti lova, thlansate an lo la nei a nih phei kha chuan, chung thlan sate pawh chu ‘sawrkar angin, dan angin an kal em’ tih te pawh kan la ngaihtuah ang a, chungte pawh chu Session lehah te pawh Chiang zawkin kan chhang turah ngai ila. Tun leh tun hunah hi chuan kan theihna zawng zawng sawm khawma tun hi kan thlenpui rih a ni a. ‘Kut-hnathawktute tan hian kan ding reng dawn a, kan ding zel dawn baw’k’ tih kha ka chhanna a ni e. Ka lawm e.

**PU LALRINSANGA RALTE:** Pu Speaker, ka zawhna kha khawngaihin min chhang hram se ka va duh em. Ka zawhnaah khan - ‘Sawrkarin *tax holiday* ropui takin kan puang a, transit pass hi a rate a chhiat lai pawh hian kg-ah 1/- kan laksak a, hei hi ngaihdam theih a ni em?’ tih kha. ‘Transit pass la lo mai ila, tax holiday sorkarin kan puang ta rau rau a, kg-ah 1/- la lo hian kut-hnathawktute hi, tunah hian a season a rei tawh lo baw’k a, an ngaihdam theih mai em?’ tih kha ka zawhna a ni a. Kan House Leader hi ka ring taw’k a, Hmunphiah hralhna hi chu kan hmu vat ang; Sundar Ali-a zui tur tlangval fel tak pahnih vel a tir vat turah ngai ila.



**PU LALTHANSANGA, HON. MINISTER** : ... An awm lovang; Kamrula te kha an awm dawn ve lo, keinia chuan. Chuvang chuan, khati lai kha chu lo buai lo ila. Tichuan, ‘*tax holiday*’ kan ti a. Amaherawhchu, hemi transit pass pek turah hian Forest danah hian administrative cost hi a ngai ve hrim hrim a ni. A chhan chu, Forest Deptt. chu *Concurrent List* a ni a, central nena inhne tlat a nih avangin. Chuvang zawka tunhmaa 7/- an lak thin te, chutianga rate sang zawka an lak thin kha sawrkar hian tunah hi chuan a theih ang tawka hniamin transit pass-a administrative cost pawh hi a la a ni tih kha ka chhanna a ni e.

**HON. SPEAKER** : Aw le, kan House Leader zahawm takin ban a phar a, khawngaihin lo hrethiamin, ilo sawm teh ang.

**PU LALDUHOMA, HON. CHIEF MINISTER:** Pu Speaker, ka lawm e. Thlaithar pali lei turin kan intiam a, a rate pawh mipuiah kan puang a, chutah chuan hmunphiah hring hi chu kan telh lo hrim hrim a; kan telh ngai dawn bawk lo a. Chung chu tun Budget Session zawhah Financial Year thar atanga kan tih tura kan puan a ni.

Amaherawhchu, kan han sawrkar hlim khan, vote lei nana sawrkar hmasa ina pawisa a lo ruahman ningnawi kan hmu a, “Thlaithar lei nan hmang hlauh teh ang, hei hi chu,” kan ti a. Tichuan, “thlai thar pali kan lei ang; tun atangin thlai thar kan lei nghal dawn” tih mipuiah kan puang a ni. Tichuan, thlai thar dang pathum chu kan rate aia sanga leitu an awm avangin buaipui a ngai lo; pawisa pawh sen a ngai lo. Hmunphiah pawh chutianga tih chu kan tum a, kan rate anga lei duh a awm a; in sawi ang khan RR Associates an ni a. Chu chuan an lei mai tura kan ngaih laiin, rin aiin an lo che thei lova, manpower an lo nei lova. Kan beisei an phak lova, kan chesual a ni. Chu chu a chhan ber chu a ni. Chuvang chuan, ‘mahni buai buaiin lo buaipui mai rawh u; sawrkar hmasa lama an tih dan ang bawk khan lo ti leh rih mai rawh u’ kan ti a ni. Nakum lam atang erawh chuan area-wise in tih a lo ngai a ni tih hi kan zirchhuak tawh a, tha zawkin kan siam thei tawh ang. Tunah rih hi chuan support price pek tur sum kan nei reng nain, pe dawn ila, an lo inhralh nel nual tawh a, record a awm si lova. Tin, hmun tinah Society a ding bawk si lo. Chuvang chuan, tuna han pe tur chuan a buai nuai tawh a, a ngaihna a awm lo a ni. Chuvangin, ‘a nih nih nimai teh se’ kan ti a.

Tin, pakhatat chuan, old-stock a awm tih kha kan thu dawn a ni a... (**Dr. K. Beichhua:** Pu Speaker, hun a tawp tawh si a, engtin nge; i phalna lovin chhunzawm theih a ni dawn em?) Ni e; hun a tawp a, I phalna kan dil a nih chu...

**HON. SPEAKER** : Ni e, engnge House ngaihndan le? A sawi laklawh a, kan sawi zawh tir law law mai dawn mi ni ang? (*House-in a sawi chhunzawm a remti a..*)

**PU LALDUHOMA, HON. CHIEF MINISTER:** Aw le, ka lawm e.

Tichuan, old stock a awm a, chu chu kan harsatna a ni tih hi sawrkarin kan hriat dan a ni a. Chu bakah advance-a lo indawr, hmunphiah man lo inpe lawk eng emaw zat an lo awm a; 70/- in an lo inpe lawk thluah mai a ni. Khang khan pawisa an dawng tawh. Chuvang chuan, pawisa petu hnenah khan an hralh lo thei lova, chutianga laklawh neite chu an lo awm a. Tin, a hring lei tura vai lo kal tur lo dang deuh pawl leh lo vau deuh te pawh an lo awm a ni. Chuvang chuan, kuminah hian vaiho an lo lut than ngam lova, chung te pawh chu kan buaina belhchhahtu a ni a.

Tin, a royalty sawrkar hmasain a laksak thin kha, “anni hi eizawmna ngelnghet la nei lo an ni a, chhiah chawi tlak an la ni lo e; *tax holiday* eng emaw chen pe ang” kan tia kan puansak a ni. Royalty kan free a; Transit pass pawh hi free kan han duh a, mahse transit pass tel lovin Vairengte thlang lamah a tlang theih lo a ni. Chuvangin, awl kan duh lo ni lovin, lohtheihloh avangin kan ti ta a, kan theih tawk kan chhuah a, rilru tha kan pu a. Hmunphiah chingtute hi Opposition bial deuh vek an ni a, “dawm kan an ngai a nih hi, theihtawpin tan ila teh ang,” kan ti a. Chuvang chuan, khatiang zawng khan hma kan la zawk a ni e. Nakum kumthar atang chuan a area-wise in fel takin buatsaih a ni tawh ang.

#### **LAYING OF PAPERS:**

**HON. SPEAKER** : Aw le, tunah chuan, *Laying of Papers*-ah kan kal ang a. *Pakhatna* - Dr. Vanlalhlana, Minister zahawm takin, “*Notification issued under Mizoram Goods and Services Act 2017 w.e.f. 16.8.2023 – 25.1.2024*” hi House dawhkanah rawn lay se.

**DR. VANLALHLANA, HON. MINISTER:** Pu Speaker, i phalna leh he House zahawm tak remtihain, “*Notification issued under Mizoram Goods and Services Act 2017 w.e.f. 16.8.2023 – 25.1.2024*” hi ka rawn lay e.

**HON. SPEAKER** : A copy sem ni se. (*A copy sem a ni a.*) Kan chang kim em aw?

*Pahnihna* - Pi Lalrinpuui, Minister zahawm takin, “*The Annual Report of Mizoram State Commission of Protection of Child Rights 2022-2023*” House dawhkanah rawn lay se.

**PI LALRINPUII, HON. MINISTER:** Pu Speaker, i phalna leh he House zahawm tak remtihain, “*The Annual Report of Mizoram State Commission for Protection of Child Rights MSC, PRC for the year 2022-2023 relating to Women and Child Development Department*” chu ka rawn lay e. Ka lawm e.

**HON. SPEAKER** : A copy sem ni se. (*A copy sem a ni a.*) Kan chang kim maw? Aw le, a lawmawm e.

**DISCUSSION ON MOTION OF THANKS:**

Tunah chuan, “*Discussion on Motion of Thanks*” hun kan hmang ang. Thawhtannia kan Governor thusawi chungchang *Motion of Thanks* member zahawm tak Pi Baryl Vanneihsangyi rawn move tak kha kan sawi ho dawn a ni. Hun hi engzat nge kan inpek ang le? Member pakhat thusawi hun atan Minute 5 nge minute 10? (*Minute 5 tih rawtna a awm a..*) Minute 5 maw? Aw le, Member pakhatin minute 5 zel kan sawi ang a, minute 4 a nihin warning bell ka rawn hmet ang a, minute 5-ah kan tawp dwn nia. House leader leh Leader of Opposition-te kha kan pe tam deuh dawn a nih kha.

Tunah chuan motion move-tu member zahawm tak Pi Baryl Vanneihsangyi sawihawng turin i lo sawm ang u.

**PI BARYL VANNEIHSANGI:** Pu Speaker ka lawm e.

Hei, Governor zahawm takina he House-a a sawi kha kan ngaithla tlang a. Tichuan, a copy kan nei a. Hei, a lawmawm khawp mai a, mahni hnam tawngin; Mizo tawng leh sap tawnga chhiar tur a awm a. Kan in lamah pawh kan zir tlangin ka ring a. Ka han chhiar ka han chhiar a; ka han keu a, ka keu nawn apiang hian kan lawmin, kan hlim tawlh tawlh emaw tih mai turin a thu a tha em em mai a. A zawng zawng hian sawi sen a ni dawn lova, amaherawhchu pawimawh ka tih zualte kan tarlang ang a.

Mizoram mipuite hian sawrkar kan neih, sawrkar a pian atang khan duhthusam kan nei thin a, ‘sawrkar tha; sawrkar chak’ tih te, beiseina kan nei sang thin khawp mai a. Chu kan beisei thin ang chu he sawrkar tharah hian kan hmu dawn niin a lang a. Governor thusawi bultannaah khan, kan chhiar vekin ka ring a, sawrkar thar lungphum a rawn tarlang a. (Pu Speaker, i phalnain ka han sawi nawn lawk ang a.) Chu chu, “Sawrkar chak, langtlang leh rinawm; harsatnate sukiang tura rang taka hma la thin leh mawhphurhna la ngam Sawrkar” tih kha a ni a. Heta mawhphurhnaah hian *responsibilities* mai bakah *accountability* te pawh a ni ang a; chutiang sawrkar chu helaia a rawn ziah danah hian kan din dawn niin a lang a, a lawmawm khawp a. He kan lungphum tihhlawhtlin leh, heta kan inngah tlat leh nghah tlat loh chu ‘a member-te mawh a ni’ tih kan hriat ve thung a tha awm e.

Tichuan, a sawi zelnaah khan, “kan ramah hian he ram chhunga intodelha tihchangtlun bakah, India ramin kum 2047-a tihhlawhtlin tum a neih kha a rawn tarlang a, chutah pawh chuan kan State hi sector lian tak ni ve tura min chona kan hmu a. Chu chu, tuna kan ngaihtuah chuan, kum 23 lo awm tur chhunga kan hna tur min pe niin a lang a. He chona hi lian tak leh harsa tak angin lang mah sela, kan ram mipui tana hmasawna, raltiang min kaipui tura min nawr-kaltu lian tak a nih ngei ka beisei a, chutiang chuan Member-te pawhin kan hman thiam a tha awm e.

Tichuan, *hmasawwnna* a ri tam ta hle mai a. ‘Hmasawwnna’ tih kan sawi a, chu chu, a zung kan en chuan, vawiina kan thut khawm chhan *Budget Session* hi a ni a. Pu Speaker, i remtihhain ka lo chhiar lawk ang a –

Governor thusawi phek 2-naah khan, ‘*Budget hian a tum ber chu khawtlang leh sum leh pai hmasawwnna atana thil tum hrang hrangte tihlawhtling tura theihna, resources kan neih hrang hrangte hman tangkai a ni a. Budget tin hian kuthnathawktute mahni kutkawiha eizawngte, sumdawngte leh eizawwnna dang hrang hrangah hmasawwnna boruak tha siam saka; mi thenkhat tan chauh ni lovin, mipui zawng zawng tan hmasawwnna thlen a tum tur a ni*’ a ti a, kha khan a hrilhfiah Chiang Hlein ka hria. Kan budget nakin lawka kan pharh tur hi dik tak, rinawm tak leh fair taka kan hman chuan, ram leh mipuite tan hmasawwnna nasa tak a thlen ngei ang tih ka ring a. Tin, chutiang tur chuan eiruk leh hlemhletna laka ta kan invawnhim a ngai a. Kan budget hian kan ram tan rah duhawm chhuah tura fimkhur taka kan hman thiam bakah, kan peipun thiam pawh a pawimawh awm e.

Tin, phek 4-naah kan hmu a. Pu Speaker, i remtihhain helai tawite hi han tarlan ka duh a. Paragraph hnihnaah khan, ‘*Thua sawi mai a tawh lova, a taka hmalak a ngai tawh a ni*’ a ti a. Kha kha, he mi bu pumpuiaah hian ‘a tha lai ber han thlang teh’ ti ta se, he lai tlar hi kan thlang furin ka ring a. A chhan chu, thua sawi hi a lo tam tawh a, a rei tawh a, a taka thawh a ngai tak zet zet a ni. Tin, chutah chuan kan kalpui hmasak tur kan rawn dah a. ‘Fiscal stabilization’ tih te, ‘financial consolidation’ tih te kan sawi uar ta hle mai a, thil thar a ni tawh lova; kan sawifiah tawh lo mai ang a. Hei hi kan inngahna pakhat a ni a. Tin, kan thil tum hmasa a ni a, kan policy hmasaah a rawn tarlang a, a thain, a finthlak hlein ka hria a ni. A chhan chu, ‘*bultanna*’ kan tih mai, a sap tawnga a ‘*foundation*’ kan tih hi a ngheh tak tak loh chuan, a chung lam atang hian a chim te a awm leh thin a. Chuvang chuan, he foundation nghet tha kan neih hi a pawimawh em em a. Heta tang hi chuan kan economy nihphung leh kalphung hian awmzia a nei leh zual ang a, kan tum ram min thlenpui ngei kan ring a ni.

Tin, a phek dangah khan kan hmu a, (a vai vaiin ka sawi lo mai ang a). Kan ramah investment ti tura tan lak a ngaih zia kha a rawn tarlang a. A chhan chu, kha kha kan ram sum leh pai tihpunnan leh kawng hrang hrangah ‘*ease of doing business*’ te pawh tih ‘a tha a ni’ tih te pawh a tarlang a. Hemi kawnga hmala tura *Mizoram Sustainable Investment Policy, 2024* din a ni hian a tak taka he sawrkar hian hmalak a tum zia a lantir Chiang Hlein ka hria a, a nghahhlelawm tak zet zet a ni.

Tin, Agriculture hi, Governor sawi ang khan, Pu Speaker, “kan eizawwnna leh economy hmasawwnna inngahna pakhat a nih angin, kan sawrkar chuan agriculture leh a kaihhnawih sector te hmasawwnna a ngai pawimawh ber ang” a ti a, chu chu a ber tur tak ni pawhin ka hria a. Tin, thlai tharchhuah leina tur inkaihhruaina ‘*Operational*

*Guidelines for Agricultural Assurance Fund*’ pawm a nih te pawh a rawn tarlang a, hei hi ram mipuite pawhin kan nghahhlelh em em a ni.

Tin, thlai thar han sawi takah chuan, tuna kan discuss zawh takah khan hmunphiah chungchang kha a rawn lang a. Hei hi ZPM - Market Study Team ten an tarlan, pheh 25-naah khan, (Pu Speaker, chhiar lovin tihian ka sawi mai ang a). He hmunphiah hi February thlaa thar thin a nih avangin, Budget Session kan neih hun tur kan ngaihtuahin sawrkar hian hma a lak hman a rin loh avangin sawrkar hian study team te thurawn angin tuna December atanga January leh tun February ah hi chuan kan kenkawh dan tur kha kan tarlang lem lo a ni a. Amaherawhchu, ‘budget thar atangin’ tih kha a ni a. Chuvang chuan, vawiinah hian *a buana hmain kan kherh* ni te pawhin a lang a. Helaiah hian sawrkarin hmalak dan tur mumal tak a nei a, kan Leader te pawhin an sawi tawh a, kan ngaihtlak tawh kha. Khang kha a takin a lang dawn chauh a A tihna tur leh a leina tur te, a kalphung tur te tun budget-ah hian kan pharhin, kan sawi tlang dawn chauh a ni.

Tichuan, Pu Speaker, a tawp lam ka thleng mai ang a. Heng kan sawi takte bakah hian road sector hnuaia project tihchangtlun te, road technology hman tangkai tumna te pawh a rawn tarlang a; ‘infrastructure lamah hmasawna enfiah tur; a vil tur din a ni’ tih te pawh kha kan hmu a. Hei hi a pawimawh em em a. building lianpui pui leh eng eng emaw kan han sa a, kan han din a, assets kan neihte hi a nih dan tur anga hman loh a tam em em a. Hluihlawn emaw, thawm that ngai, sawrkar sum hek taka siam that ngai a tam thin avangin, he infrastructure vil tura *Mizoram State Project Monitoring Committee* kan CM kaihhraina hnuaia din a ni te hi ram mipuite kan hlim a. Kan hmui, hmai mai ni lovin, kan thinslung chhung takin kan hlimin kan nui a ni.

Tichuan, thalaite tan hmalak tumna kan hmu a. Tin, zirna kawnga hmalak tumna rawn chhawpchuah kan hmu bawh a. Pu Speaker, Tourism chungchang te, ruihhlo dona kawnga hmalakna te sawi chhunzawm a chakawm khawp mai; chutih rualin member dangte tan hun ken a thain ka hria a. Tichuan, heng zawng zawng tiama mimal taka keimahin ka ngaih pawimawh chu, ‘*Mizo hnam nihphung, nun dan leh khawsak dan humhalh leh vawrh lar*’ tih hi a ni a. Governor thusawi leh ziaka kan hmuh ang khan, ‘ram leh hnama min siamtu hian a rel sual lo’ tih kan tarlan a ngai a. Kan pian chhuahpui nihna leh kan hnam nunphungte hi hnam dangte tana entawntlak, zir tlak leh thangtharte chhawm nun tlaka kan hnuchhiah a pawimawh hle a. Keini lo hi kan ram leh hnam min humhalh saktu tur an awm loh avangin, inlungualna leh inhriatthiamna te, inhmangaihna leh inthlawp-tawna nena kan insuih ngheh tlat hi a pawimawh a. Khawvel hmun danga cheng kan Zohnahtlak unau-te nen pawh insuihkhawm leh zai rela, hei aia nasa zawka sawrkarin hmalak a tumnaah hian kan lawm tak zet zet a. Theihtawp kan chhuah dawn a ni.

Tin, heng zawng zawng tihlawhtling turin mipuite pawhin kan sawrkar kan thlawp that a pawimawh awm e. He sawrkar thar hian malsawmna tam tak dawng se la; sawrkara beiseina nghattu mipuite tan chhanna leh innghahna tlak sawrkar lo ni zel turin duhsakna ka hlan a ni. He *Motion of Thanks* hi House zahawm tak hian min adopt sak turin ka ngen e. Pu Speaker, ka lawm e.

**HON. SPEAKER** : Member dang sawi duh kan la awm em? Member zahawm tak Pu VL Zaithanzama i lo sawm ang.

**PU VL. ZAITHANZAMA:** Pu Speaker, ka lawm e. Vawinah hian lawmthu han sawinawn te pawh ngaiin ka hria a. Kan Governor thusawi hi Assembly vawi 9-na, 1<sup>st</sup> Session-ah khan ‘Mizo tawnga lehlin ni ve tawh se’ tih rawtna kha ka nei a. Pu Speaker, ka rawtna min tihpuitlin sak avang hian ka lawm tak zet zet a ni. Tun hmian Budget Speech te sap tawng veka tih a ni thin a, tunah chuan Mizo tawngin kan lo nei ta a. Mizo tawng leh hnam humhalhna kawngah hma kan sawn zel ka beisei a. He Rorelna In sang hi chutiang tur chuan ka han ngen bawka a ni.

Pu Speaker, kan sawrkarin kuthnathawktute hmasawmna siamsak tin zawna budget a kalpui hi ngaihnam ka ti a, lawmawm ka ti a. Mi thenkhat tan chauh ni lo, mi zawng zawng huapzo, mipui-sawrkar siam tura hmalakna a rawn sawi uar hian min tilawm a ni. Thingtlang hmun hrang hranga hmelhriatte ka han biak kualin, kuminah hian kum dang zawng aiin thlawhama an la zau a. Kan unau zo-khuua mite’n hnathawh an tum tak zet niin ka hria a. Heng hi kan budget hian nasa lehzuala thawk turin a fuih zel ka beisei a ni. Sawrkar ve leha remchang ang anga thawk buan buan lova, sum leh pai dinhmun sawh nghehna hun atan kum khat kan han hmang tur te hi fuh hmel hlein ka hria a. Agriculture leh a kaihhnawihthe hmasawmna ngaihpaawimawh te hi a lawmawm a. GSDP-a thawkchhuak thei Agriculture lam hian tun kum lamah 26% chuan a thawhchhuah belh zel beisei ila.

Council of Ministers thukhawmin Cooperative Society te pawimawhna a rawn hria a, thlai thar leina turah hmanruaah hman tur thu kan han hriat te hi a lawmawm ka ti a. Farmer-te hmasawmna hmakhua ngai taka sawrkarin hma a la tur hian hmasawmna ngialnghet a thlen ngei ka beisei takzet a ni.

Mizo hnam nih phung, nun dan leh khawsak phung te humhalh leh vawrh lar ngaihpaawimawh a ni tur hian min ti lawm takzet a. Kan hnam, kan sakhua hi vawnhim a tul tak zet zet a ni. Khawvel hmun hrang hranga cheng Mizo-mipui zawng zawng inpumkhatna ngai pawimawhtu sawrkar kan nei hi lawmawm ka ti a. Kan mipuite tana an eizawmna kawngah tanpui thei tur policy ‘*Bana kaih policy*’ kan han siam te hi a phurawmin, mipuiin an nghakhlel tak zet zet a ni. Hmasawmna pawimawh leh lian tham enfiaha vil tur ‘*Mizoram State Project Monitoring Committee*’ din a ni te hi te hi a tha tak zet a, kan hmalakna zel turah pawh kawngro a sut ngei ka beisei tak zet zet a ni.

Pu Speaker, kawlphehtha siamthat leh sem darhna kawnga ruahmanna thar siam a ni hian beiseina eng min neih tir a, kan neih chhun ang angte duh tawka tam ni lo mahse, a sem darh kawngah te hian ruahmanna fel a ngai tak zetin ka hria a, chutiang lam kan Minister-in an ngaipawimawh tur hi a lawmawm hlein ka hria a ni.

Environment tichhe lo zawnga hmasawna kalpui ni tur te hian min tilawm a ni. A bik takin, ruihhlo min tibuitu tirem tura sawrkarin thahrui a thawh tur te hian min ti lawm tak zet a. State sum leh pai tha lo hian erawh kan vaiin min nghawng a, thuthlukna harsa tak a tul chuan kan siam a la ngaih hun pawh a thleng maithei e. Mawhphurhna la ngam tur sawrkar rinawm ni tura Governor ngenna te hi a zahawm ka ti a. Mawhphurhna la ngam, thuthlukna harsa pawh siam thei turin min ngen a, min thlangtu mipuite hre reng chung a thutlukna siam a pawimawh zia min hrilh avang hian fimkhur a ngai hle. Pu Speaker, kha kha ka sawi theih chin ni rawh se. Ka lawm e.

**HON. SPEAKER** : Pu H. Ginzalala ilo sawm ang.

**PU H. GINZALALA** : Pu Speaker, hun min pek avangin ka lawm e. Kan Hon. Governor thusawi hi wawi eng emaw zat ka chhiar chhuak a, a tha khawp mai a, a lawmawm ka ti a. Governor speech awm tawhah chuan a tha pawl tak a nih ka beisei a, a phurawm pawh ka ti a; a hmasa in lawmthu ka sawi duh a ni.

Point by point in ka zia a, tlema zawng ka sawi ve hman turah ngai ila. Phek 2-na, paragraph 2-na te kha ka chhiar a, a thlamuanthlak ka ti a; a chhung thu erawh ka chhiar chhuak lo mai ang a. Pu Speaker, kan thalaite tana eizawna te leh kuthnathawktute tana eizawna tur ruahmanna felfai tak budget-ah hian a awm tur thu te kha a rawn sawi a ni. Helaiah hian thil pahnih ka han sawi ang a – Pakhatnaah chuan *eizawngtu* a awm a, pahnihnaah chuan *a eizawna* a awm bawka ni. Kan sawrkar kal tawhah te scheme kan nei nual tawh a, MNF sawrkarah te, Congress sawrkarah te pawh a ni a, scheme hrang hrang – MIP te, SEDP te, NLUP kan tih ang chi te pawh kan duang thin a ni; a tha khawp mai. Amaherawhchu, a approach hi tun tuma kan approach nen hian a inang dawn lo ni hian ka hria a.

Nichina ka sawi ang khan, *a-eizawna* a awm a, *eizawngtu* a awm a ni. He kan approach ah chuan *a-eizawngtu* zawka hi sum leh pai emaw, eng emaw therhlo pek kan tum vak lo a ni. A eizawna zawk hi pek kan tum a ni. A awmzia berah chuan, *eizawngtu* sum kan pek hian *eizawngtu* na na na chuan a ei zo thin. Nuai khat emaw, nuai hnih emaw pawh pe ila, a ei zo ang. Amaherawhchu, a eizawna zawka kha kan tanpui zawk tur chu a ni. Chuvangin, kan approach hi a inang lo khawp mai a. *Eizawngtu* ni lovin, *a-eizawna* zela kha, chu chu ‘Bana kaih Policy’ hian a tum a ni a. Chuvangin policy dang kal tawh te lakah chuan a that ka han ring viau mai a.

Tin, a sawi leh dang pakhat - ‘*All section of the population*’ te a rawn ti a. Pu Speaker, i phalnain; mi zawng zawng huapzo a nihna kha a ni a. Kan economic activities-ah hian a te ber atanga a lian ber thlengin activities an neih theih dan tura hi he speech hian a rawn sawilang niin ka hria a, a lawmawm khawp mai a. Kan hriat ang khan China te pawh an policy khati kha a ni a, ‘*mass production*’ a nihna ai mahin, ‘*product by the mass*’ ang zawngin an kal a ni.

China ka han sawi kai ta sa sa baw k a; small business hian contribution 60% of GDP hi an nei thei a ni. Chutiang bawkin job (employment) chungchangah pawh hemi ‘small business’ kan tih te hian 79% lai an hauh phak a ni. Chutianga kan kal tur hi a lawmawm khawp mai a.

Tin, a dawt leh ah chuan, ‘*The Mizoram Sustainable Investment Policy, 2024*’ pawh hmanni lawk khan Cabinet khan kan pawm a ni a, a lawmawm khawp mai. Amaherawhchu, pawn lam atanga investment kan hiplut dawn a nih pawhin, fimkhur a ngai khawp mai a, kan local entrepreneurs te tan ruahmanna kan siam tel hi a ngai khawp mai a. China te kan sawi tawh a, China pawhin a ti thin. Amaherawhchu, dan an nei a, ‘China tlangval kaltlang lovin’ tiin Dan an siam thin a ni. Chutiang chu a nih avangin, he Governor Speech hian local entrepreneurs te humhalh an nih tur thu a rawn sawi hian thla a timuang khawp mai.

Pu Speaker, power generation lamah te hma kan lak tur thu te kha a rawn sawi lang a. Manipur lama kan unaute nena hma kan lakna atana tha deuh mai a awm a. Tuivai te hi kan khuap thei a nih phei chuan inland-water transport hi tam tak a awm thei dawn a. Phuaibuang, Ngopa bulah kan khuap anih pawhin Churachandpur lamah thui tak a li chho dawn a ni; chutiang chu anih avangin political lamah Mizote administration khata kan la awm thei lo deuh anih pawhin, economically in ‘*Greater Mizoram*’ hi a la awm thei turah ka han ngai a ni. Pu Speaker, ka lawm e.

**HON. SPEAKER** : Pu Rasik Mohan Chakma ilo sawm ang.

**PU RASIK MOHAN CHAKMA:** Kan Governor lawmthu sawina *Motion* a rawn sawinaah kha kan ngaithla a, vawi tam tak ka chhiar chhuak tawh a. A thu ah khan lawm lohna tur ka hmu lova, a lawmawm vek baw k a. Mahse, a thu a that em em rualin, ‘tisaah chang thei ngei sela’ tih hi member zawng zawngte duhdan leh Mizoram mipuite duhdan a ni.

Chuvangin, ‘*Kalphung-thar*’ kan ti baw k a, kan dinglama thute pawh khan; political will nghet tak nen hengte hi tihlawhtling turin chakna te, remhriatna te an neih theih nan Pathian hnenah pawh ka dil a, ka tawngtaipui baw k a ni. Amaherawhchu, kan Governor thusawi kha a that vek rualin, thahnemngaih thilah eng emaw sawi duh ka nei a. Pakhatnaah chuan, investment chungchang a sawi hi Mizoram dinhmun ngaihtuah



hian keima phak tawkah tunhma atang khan duhkawp lohna hi ka nei a. Kan economy hi (ka tawng tu huatthu ni suh sela) ‘contract economy’ ni berin ka hmu thin a. Sawrkara contract dil kual leh phai ramah thil thar chhuakah agent leh distributor te neiin dawr te hawna, Mizoram mipuite hnena hralh chhuah; a bak eng emaw sawhthing, hmarcha te tunhma British hovin India ram an awp laiin raw materials an la a, finished product an la a, a aia to deuha an zuar ang kha, kum 75 India Independence nih hnu leh Mizoram State kum 38 a nih hnu pawh hian hetiang hi kan la ni reng a ni.

Chutih laiin tun tumah erawh chuan investment chungchang a lang hi, pawn lama investment kan tih hian engnge kan hlawh ang? Mizoram-a kan mi hausa ten company lian tham an nei si lova, company lian tham kan state-a kan neih si loh chuan employment generate tak tak hi a har a ni. Pu Speaker, khatiang kha kan tih ngam dawn chuan, khatiang kan tih rualin indigenous entrepreneurs, local te hamthatna en reng chungin pawnlam atangin kan company investment hi tih tir tam ang u tih hi ka mimal ngaihda a ni. Chutiang anih chuan nasa takin employment kan generate ang a, Mizoram atangin raw-materials mai ni lo, thil hralhchhuah kan nei thei dawn bawk a ni. State zawng zawngah Sikkim thlengin an mahni state-ah thil an siamchhuak a, state dangah pawh an hralh thei hial a; Mizoram-in hetiang kan neih erawh ka hre lo; ka hriatna a zim anih chuan thudang ni sela. Squash te kan siam a, a tui em em a, fruit squash te phairamah kal ila, lei tur a awm lo; Tripura-ah pawh lei tur a awm lo; Silchar-ah pawh lei tur a awm lo. A quality a tha em em si, khawilai takah nge kan fail tih kha zir chiang ila; mahni ringawt chuan tunlai khawvelah sang tak a thlen theih loh. Kan theih loh, kan thiam loh kha midang thiamna chhawrin keimahni thatnana hmang tura rilru siam hi a tul tawhin ka hria a ni. Chuvangin, investment kan sawi uar em em lai hian keimahni ram chhunga mite pawhin investment kan phal loh zel chuan engtingge kan economy hi kan kalpui theih ang tih hi kan sawi duh a.

Pu Speaker, road infrastructure hi kan siam a, a tha a. Mizoram-a buaithlak ka tih em em chu - kan siam a, kan enkawl zui lo. Maintenance culture-ah hian kan chhia niin ka hria (**Hon. Speaker:** Minute 7-ah aw..). Kan area-ah pawh kawng tam tak kan siam a, Kukurduleya - Ugalsury PMGSY kawngah hmannah kan kal a, Pu Speaker, motor chhung atang pawhin vangvat kan kai thei; chuti khawp chuan maintain loh a ni. Khangte kha a ni a, maintenance culture hi nei tha ila. Infrastructure kan siam a, kan enkawl zui lova, kan enkawl zui loh lutuk chuan a tharin siam a ngai thin a, chuvangin expenditure a sang duh em em a ni.

Tin, Pu Speaker, “Mizo identity kan humhalh ang” tih kha a awm a, a tha lutuk a. Chumi rual chuan, mahni hnam identity humhalha, improve-a, kan promote chuan a tha a. In hriat theuh angin, Chakma ka ni a, Mizoram-ah minority culture leh traditionalist em em kan neih Mara te, Lai te pawh an awm a (**Hon. Speaker:** A lawmawm e..) minority-te duhsakna, an tradition leh culture humhalh tura dah ngei a nih kan beisei lain, a ruk takin ngaihthat lohna min siam lek lek a ni. Chumi rual rual chuan, District Council-te

hi kan hriat angin hmanah kan House Leader ngei khan, “District Council-te hi tha takin kan enkawl ang a, direct funding lam pawh kan ti ang” a ti a. Mahse, tun tum budget hi policy matter tak tak a ni a, Governor speech-ah hian lang sela chuan duhthusam a ni a. Engpawh nise, policy kal zelah chuan khangte kha min duhsak ngei turah, *Kalphungthar Sawrkar* a nihna angin min telh ve ngei turah ka ngai a ni. Ka lawm e.

**HON. SPEAKER** : Pu W. Chhuanawma, Member zahawm tak ilo sawm ang. A pharna a rei tawh khawp mai.

**PU W. CHHUANAWMA** : Pu Speaker, ka lawm e. Governor Speech - *Motion of Thanks* ah hian sawi ve thei tura ka awm hi ka lawm hle mai a. Thil tam tak sawi chak em em ka nei a, Entirnan - development thil a hun taka zawh loh te, quality control leh ‘*Bana-kaih Policy*’ tih te kha han sawi ka chak em em mai a. Amaherawhchu, khang kha chu ka sawi tam lo ang a. Tuna ka sawi duh chu, kawng chungchang thu - inkalpawhna kawng ngaih pawimawh a nih tur thu, helai vel hi ka lawm em em mai a.

Kan bial atanga Aizawl kal tur hian Aizawl an kalsan vang vang phawt a, eng emaw chen hnuah Aizawl lam hawiin an inher rem leh chauh thin a, *U-turn* anni phawt thin a ni. Chuvangin, tun tumah hi chuan chutiang ang chu a bo tawh turah ka ngai a. Tuichangral - Vangtlang, Rianglei, Chalrang, New Chalrang, Khawhai, Sialhawk, Lungtan hote khi Khawhai leh Chhingchhip inkar kawng kan tihpuitlin hunah chuan zingkarah an thlai tharte an rawn hralh ve hman dawn a. Tuipuiral - Vangchhia, Sazep, Leithum, Vanzau, Bungzung, Zawngtetui hote khian Tualte emaw, Vangtlang emaw, Rianglei emaw, khawi emaw ber atanga an rawn pawh khian Khawhai leh Chhingchhip inkar kawng hi an rawn zawh thla ve ang. Anni pawh darkar 5 vel, ni khatah (kal lam leh haw lam belkhawmin) an save thei dawn a ni. Chutiang chu a nih avangin, kawng a pawimawh em em a. A bik takin Tlangpui phe chu an khua an chhuahsan a, lehlam an hawi phawt a, an tlan vang vang a, rei tak hnuah Aizawl lam an hawi tan chauh thin a ni. Chuvangin, an mamawhna a sang si a, term hmasaah khan Khawlailung nen an inkar, Vanva Lui leh Lungva Lui lei dawhna tur hi sawrkar hmasaah khan ₹100 lakh an hmuh thu min hrilh a ni. Amaherawhchu, ‘kha nuai 100 kha a bo leh ta daih mai a, kan hmu leh ta si lova’ an ti a, (Nuai 100 bo chungchang hi a lar angreng viau mai a.)

Tichuan, anmahni an mangang si a, nikum inthlan dawna *Model Code of Conduct* te a rawn awm hnuah khan an mangang khan, “Hawh u, a khua hian lei hi i dawh mai teh ang u” an ti a. Tichuan, kei pawh min rawn sawm a, Conduct Rules-in a phuar tawh avangin ‘ka hming lang lo turin i thawhkhawm ang u’ an tihah khan, ‘ka hming puang lang lo ula, kan ti dawn nia’ kan ti a, keini pawh.

Tichuan, Lei chu (he House ah hian han hrilh ka chak em em chu) kan dawh ta mup mup mai a ni. Tunah hian In-150 vel khua khian tun thla chhung hian Varva Lui lei dawh hi kan zo hman ang a, kan zawh hman loh pawhin March thla bul an kai tawh ang.

A pakhat zawk Lungva Lui hi dawh leh tho a ngai dawn a, hei erawh hi chu he House hi han hriattir ka duh chu - Sawrkar hian min tihsak thei se. Khi kawng Champhai - Lunglei kal zawng zawng hian thala lui a daikai theih lai chuan an tlan zung zung thin a ni; a hnai em em ringawt mai a ni. Chuvangin, helai hi a pawimawh em a kan sawifiah a nih chu.

Tin, han sawi leh duh ka neih chu - Tourism chungchang hi. Tourism ah hian khawchhak lam hi kan pi-pute sulhnu tamna hmun a ni a. (Pu Speaker, minute khat lekah ka zo hman dawn lo tlat mai.) Mak deuh mai chu, 'Mi-lu la Hnam' kan tih Khawhai ah khian mi-lu an lak tawhna hmun, a hnunung ber a awm a ni. Khitah khian historical village din a chakawm khawp mai. Chu mi-lu an lak hnunung ber chu 1892 vel kum kha a ni. Tin, khilai hmun khi, kan Pathian hi 'Pathian nung a ni' tih a lanna hmun pawimawh tak a ni bawh a ni; 'engatinge ni Khawhai khi naupang zirlai bu ah te hian a lo chuan loh aw' ka ti hial a ni. Khawhai ah khan Kristian tlemte an awm a, an lal Zataia khan a tihduhdahna, a elhsen nan khan Chawlhniin lo a hal tir a, khua a kang tel ta vak mai a... (Pu Speaker, reilote lawk) Tichuan, khua chu a kang a, a kang zo dawn ta a. 'Pu Saiduha' an tih mangang khan a buhzem ah a tlan lut a, a tawngtai ta ringawt mai a ni. Tichuan, mei alh hlawm hi arbawm tiat tiat hian a invawm kal thlawk fua-fua mai a, chuti chung chuan buhzem chiah chu a him ta a ni; Khawhai hi a tel loh phah ta a ni. Tichuan, Khawhai chu buh chi tur te an nei a, teh lohin a awm ta a, khi lai hmun khi. 1920 vel bawr kum a ni, chu chu. Tichuan, khi hmunah khian kan Pathian hi 'Pathian nung a ni' tih lanna hmun hlu tak mai a lo nihna nen; tin, Tamdil tiat deuh thaw dil mawi leh ropui, tha taka kan chei chuan tourists hip em em tur vek mai hmun a awm a ni. Chu chu, he Rural Tourism tihchangtlunna tur leh helama hmalakna tur kan hmuh hian, khi lai hmun hnih khi pawimawh ka ti hle mai. Pu Speaker, chu chu ka sawi duh ni se. Ka lawm e.

**HON. SPEAKER** : Member zahawm tak Pu Clement Lalhmingthanga i lo sawm ang.

**LT. COL. CLEMENT LALHMINGTHANGA:** Pu Speaker, ka lawm e. Hun tiam chinah khan thuawih deuhin sawi zawh ka han tum ang e. Kan Governor zahawmtak speech chungchang kha kan khel tur a nih angin, hetah hian ka rawn concentrate deuh ang a.

Kan Governor zahawm tak thusawi zinga bengverh deuh pakhat chu - *Viksit Bharat, 2047*; Pu Speaker, i remtihna, 'Developed India, 2047' tihna a ni mai a. Hemi chungchang thua India ram independent a nih hnua, a kum 100 tlinna tur denchhena khawvel ram dangte lakah pawh 'developed nation' tia hriat ve a nihna tura tana hma a lakna chungchang a ni a. Hemi tihlawtlingtu tur zingah kan 'Mizoram State pawh hi a nih ve ngei kan tum a ni' tih a rawn sawi chhuah te hi a challenging in, a lawmawm ka ti a, heta tang hian rilruah chona sang tak mai a rawn siam bawkin ka hria a. Tin, chumi

tihlawhtling tura kan mamawh, kan hmalakna tur agriculture te, industry te leh thalaite themthiamna (entrepreneurship) lam tihmasawn tura sawrkarin theih tawp a chhuah tur thu sawi te hi a lawmawm ka ti a.

Chutih rualin, kan ram, harsatna lian tak tawk mek hi situation *challenging* em emah kan ding mek a. Kan ramin sum tam tak kan ba a, tin, sum lakluhna (revenue source) kan nei tha si lova, kan expenditure lah a sang chho zel bawk si a. Kan pawisa puk a tam zel bawk si avangin, post-devolution revenue deficit grants kan dawn te central atangin a kiam phah zel bawk si a. Chutih rualin, private sector atanga investment a tam bawk si loh laiah hian keimahni inrelbawlna tur atana kan sum indaihlohna a pung zel ta a ni. Mahse kan Governor zahawm takin heng harsatna sukiang tura investment lamah hma lak zel a nih tur thu a sawi hi, a thlamuan thlak hle a ni. Tichuan, economic policy kalpui tur hian a tirah chuan medical treatment ang deuhin reilote chhung hrehawm deuh hlek lai pawh tawrh a ngai thin a, future atana hlawkna leh hamthatna tur a nih dawn avangin, reilote hrehawm lo tawrh pawh ni dawn se, chu chu tuar ngam tura sawrkarin huaisen taka hma a lak tur thu a sawi te hi tha ka ti hle.

Tin, kan economy tichangtlung turata sawrkarin investor tam zawk leh tha zawk a sawm luh theihna tur atan “*ease of doing business*” kan siam tur a ni. Kan Council of Ministers ten an pawmpui thlap *Mizoram - Sustainable Investment Policy, 2024* hi a thlamuan thlak hle a ni.

Tin, tuna kan education policy thar national level-a *National Education Policy, 2020* kalpui dan turah te pawh central-in a tih ang diak diak ni lem lova, ‘keini culture leh kan khawsak phung mila kalpui tur a ni’ tih a puan te hi a lawmawm hle a ni. Tin, Tourism lampang hi keini chuan kan sum lakluhna hmunpui, revenue source kan neih that awm chhun te a nih avangin, “tourism lampang hi kan promote a ngai a ni” tih a rawn sawi te hi a pawimawh a.

Tichuan, ka lo intiam angin hun bawhpelh loh kan tum ang e, ka lo intiam tawh si a. Chuvangin ka duhtawh ang e. Ka lawm e, Pu Speaker.

**HON. SPEAKER** : A va lawmawm ve. Pu Rohminga i lo sawm teh ang. Chumi zawhah chuan, Pu Papuaia kan sawm ang a. Tichuan, kan House Leader leh Leader of Opposition kan sawm ang a, kan duhtawh mai dawn nia.

**PU R. ROHMINGLIANA:** Pu Speaker, ka lawm e. Hon. Governor thusawi hi a ropui hle mai a. Hei, a bu in kan han hmu a, kan han chhiar chhuak a, thu tha tak tak a inziak a. A hmasa berin Pu Speaker, (i phalnain) helai a bultanna tawite hi chhiar chhuah ka duh a, tha ka ti khawp mai a.

“Kan sawrkar chuan inrelbawlina chhawng hrang hrangah Sawrkar chak, langtlang leh rinawm, harsatna sukiang tura rang taka hma la thin leh mawhphurhna la ngam Sawrkar rinawm nih tlat kan tum, tih vawiin hian kan sawi nawn leh a”, a ti lai tak hi tha ka ti khawp mai a. Kan Minister te pawh hian an office bangah te tar se, an luh hlim hian Bible an chhiar zawhah hei hi chhiar ziah se a thain ka hria. Hriatreng tlak niin ka hria a, helai hi ka fak takzet a. Tichuan hei, minute 5 lek hun kan nei a, ka han kal deuh puat puat ang a.

A pahnihna-ah chuan, Pu Speaker, helaia a thusawi tam takah hian, sawrkar sum fir taka hman chungchangte a rawn sawi lang a. Awmze nei taka sum hmanna te, kumkhat tal chu sum leh pai dinhmun sawhngheh nan hun a ngaih thu te a rawn tarlang a. Tin, hetilailah hian, thusawi mai ni lova, a tak taka hmalak a ngaih tawh thu a rawn tarlang bawk a. A tam thei ang ber thawhchhuah neih sawrkarin a tum thu te, ruahmanna leh fimkhur taka kal a tum thu te a rawn tarlang a, a tha khawp mai a.

Amaherawhchu, sawrkar kengkawhtu lam te hian he thil tum tha deuh rawn inziak laia hi ‘eng angin nge kan kalpui?’ tih laia hi kan chian a ngai fo in ka hria a. Tun hun reilote sawrkar hun thla hnih emaw lek chhung hian compare-na hrang hrang kan han nei ve thin a. Sawrkar liam ta, MNF Party siam sawrkarah khan Sorkar Office pangngai bakah post siam belhnaa senso hi kum khat chhung hian ₹338 crore chuang hlek niin a lang a. Tun thla hnih chhung atana han siam belh, thil tam tak han awmah hian tun sawrkarah hian ₹1,123 crore chuang hret kum khat chhungin a kal dawn niin a lang tlat mai a. Sawrkar kal ta leh tun sawrkar han tehkhin hian kum khat chhung hian ₹784 crore chuang vel hi a kal tam zawk dawn niin a lang bawk a ni.

Helaia a thusawi hi a pawimawh viau rualin, a taka kan kalpui loh hi ka hlauh avangin helai sum senso chungchang, sawrkar hmasa leh tun sawrkar tharin a senso awm kha ka han tarlang ve hrim hrim duh a. Chuvangin, inrenchemna lamah hian, helaiah hian tha takin a rawn sawi na a, kan kal tak tak loh ka hlau deuh hlek a, helai a thusawi hi ka han tarlang ni ta se la.

Tichuan a point dang leh ah chuan, helaiah hian thil tha deuh mai hmuh ka nei a. A zavai hian a that rualin, a tha zual ka tih bik ka han highlight ni ta sela. Pu Speaker, i phalnain helai tawite hi ka han chhiar leh ang a –

February Ni 5, 2024 Council of Ministers thukhawmin a pawmpui “*The Mizoram Sustainable Investment Policy, 2024*’ hi kan economy sector hrang hrang investment hipna kawnga hmalakna pawimawh tak a nih ngei ka ring tlat a ni” tih lai hi tha ka ti khawp mai a, ‘Ni ngei teh se’ tiin ka rawn comment a ni. Pu Speaker, helai hi, sawi tur a tam hle mai. Agriculture chungchang leh Gross State Domestic Product 26% chungchang te pawh nichinah kan sawi a. Hmunphiah chungchang te pawh han zawh

ve ka duh viau rualin, hun kha a awm ta ngang si lova. ‘Hmunphiah, Grade A leh Grade B engtingnge an clarify ang?’ tih lai ringawt pawh kha sawi tur tam tak awmin ka hria a.

Tin, ‘Society’ tih ringawt hian Primary Society te, State Level Society te tam tak a awm a. ‘Society’ tih ringawt hian, Fish Farming Society te kha an lei tir dawn em ni, ‘Society’ tih kha clarify a awm lova? Chuvang chuan, helai a inziak atang pawh hian thil pawimawh tak clarify tur tam tak a awm a ni. Tin, Primary Level Society ho khan sum an nei dawn lova, ‘state in engtiangin nge a zu pek dawn?’ tih lai ang chi te pawh kha han zawh ka chak viau a. Amaherawhchu hun khan min daih lova.

Pu Speaker, a tawp berna atan, helai a tawp berna hi ka han quote law law lawk i la. Inrualkhai tak a thingtlang lam leh khawpui lam kalpui tumna a awm hi tha ka ti a. Hei, thingtlang lam, keini Thorang bial te chuan khawpui kan pha lo em em mai. MLA - Local Area Development fund inang puta kan dawng ringawt te hi a dik ka ti lova. Chuvang chuan, GPC te pawh hian ngaihtuahna uluk deuhin min hmansak ula. Hei North-II area, Ramhlun ‘N’ ah ka awm a, sawlaiah chuan North-II bialtu MLA tan chuan ₹150 lakh hmanna tur hi a vang tawh viau mai thei a, keini Thorang bialah chuan a tam lutuk. Aizawl bial tan ₹150 lakh in pek chuan, keini thingtlang ho chu ₹700 - 900 lakh inkar vel tal min pe ve teh u, hengte hi inrualkhai taka a kal theih nan.

Tichuan, helai Governor Speech hi a tha ka ti e. Pu Speaker, ka lawm e.

**HON. SPEAKER** : A lawmawm e. Nichin khan sawi duh kan la awm leh awmluh ka zawt a, Pu Papuaia leh Pu Rohminga chauh kha phar ka hmuh avang khan “kan House Leader leh kan Opposition Leader kan sawm ang a, kan duhtawh dawn nia” ka han ti mai kha a ni a. Khami ka sawi hnu khan kan phar leh ta nual si a, kan sawi zel dawn nia. Kan sawi vek thei turah ngai ang; nileng kan nei alawm maw le.

Tunah Member zahawmtak Pu Papuaia i lo sawm ang.

**PU LALRAMLIANA PAPUIA:** Pu Speaker, ka lawm e. Kan Governor Speech-a lawmthu sawina *Motion* hi sawizui a chakawmin, a nuam hle dawnin ka hria a. Vawksa duh tak ten a tuizia an insawisiak tur ang deuh hi niin ka hria a. Chuvang chuan, sawi pawh a phurawm hlein ka hria a ni.

Sawitur tam tak awm zingah a point hmasa lama a lo sawi - inthlan hnuhnung bera mipuiin beiseina sang tak nen danglamna hmuh tuma inthlan kan zawh fel tak hnuah kan sawrkar pawhin chu mipui beiseina chu tibeidawng lo tura hmalak a tumzia a rawn sawi atang khan a lawmawm hlein ka hria a. Tin, sumpai dinhmun kan harsatzia hrethiam taka, amaherawhchu tan kan lak a ngaih si zia a rawn sawinaah, *damdawi tui mang lo pawh kan damna atana kan mamawh zia* tehkhin thu a rawn sawi te kha kan

ram nihna leh dinhmun dik tak a hrethiam hlein ka hria. Chuvangin, heng thu a rawn sawichhuak te pawh hi lawmawm ka ti em em a.

Tin, Governor thusawi hi han chhiar nawn han chhiar nawn hian a ropui ka tihna leh lawmawm ka tihna em em chu, a fun kim hlein ka hria a ni. Socio-economic leh Political ah kawng hrang hranga kan ram dinhmunin a mamawh em emte rawn hrutin a fun kim tha em em mai a. Mizoram, kan dinhmun agriculture a inngat anih zia te a hmu chiang a. Chuvang chuan Agriculture leh a kaihhnawih sector ngaihpaawimawh a nih tur a rawn sawi lang te kha. Nichina kan ngaihthlak tak ang khan, keini loneitu leh kuthnathawk tamna bialtu ni tan hi chuan a lawmawm lehzualin ka hria. Kha a thusawi lai te kha lo hrethiam chuan kan bial chhungah pawh lawmin kut kan ben ngei ka ring bawk a ni. ‘Anmahni ngaihsaktu tur sawrkar a ni dawn a ni’ tih a rawn sawichhuak te hi a lawmawm em em a ni.

Tin, chu mai a ni lova, State Level Agency kal tlangin an thawhrah te leisaka buaipuitu tur din a nih tur thu a rawn sawi lang leh te hi lawmawm ka ti em em bawk a ni. *Hand-holding Policy* chungchang a lo sawi te kha, Central a scheme leh programme te nen kal rual thei tura mumal tak a ruahmanna siam a nih dan tur a rawn sawi te kha a finthlak hlein ka hria a. Sawrkar-laipui nen kut insuih ve leh chhawnga hmasawna hnathawhna kawngah kan kal rual thei tur te, ruahmanna a rawn sawichhuak te kha a lawmawm hlein ka hre bawk a ni.

Tin, Road Sector lamah khan, kan ngaihthlak tak ang khan project-te tihchangtlun, ngaihpaawimawh a nih tur thu te a rawn sawi a. Tin, tunlai thiamna leh thil tharte hmanng tangkaia, heng road project kan neih ang te pawh hmalak a nih tur thu a rawn sawi te kha a tul takzet a, khang te kha a lawmawm hlein ka hre bawk a ni.

Tin, ka lawmna deuh pakhat leh chu, eco-tourism chungchang leh rural tourism chungchang te a rawn sawi chhuak kha a ni a. Lunglei South bial te saw thingtlang tete-te kan nih laiin hmun thengthaw leh nuam tak tak, tourist hote pawhina an pan duh tur hmun tam tak nei kan ni a. Tun dinhmunah Sairep Tlang te pawh kan it em em thin a, sawrkar lama kan hotute pawhin min hriatsak dawn ni te pawhin kan hria a. Sawng lai hmun te pawh saw eco-tourism atana hmun tha tak tur a nihna angin tihhlawhtlin theih ni ta sela. A hmun hma a remchana, a nawm mai piah lamah thingtlang leh khawsak harsa zawkten eizawna tur remchang, kha hmun pan tute avang te pawh khan an neih theih phah dawn a. Heng te hi hmalakna tak tak nena kalpuia tihhlawhtlin thuai thuai a nih hun a nghahhlelhwamin ka hria a. Kan Governor-in a speech-a a rawn tarlang hi ka lawm hle bawk a ni.

Tin, sawi tak ang khan, a thusawi hian a fun kim em em a. Khawtlang, ruihhlo avanga buai chungchang te, ngaihsak an nih dan tur te, anmahni buaipuia he sual, khawtlang min tibuaitu tih reh a nih theihna tur atana thapui thawh a nih tur thu a rawn sawilang

te pawh hi a lawmawm a. Tin, a tawp lama a rawn sawilan lawmawm deuh pakhat chu - Mizo hnam, ram chhung leh pawna Zofate, India Danpui hnuaiah lungual taka insuihfina kan khawsak ho dan tur ngaihtuah a nih tur thu a rawn tarlang te hi a lawmawm em emin ka hria a. Chuvangin, he thusawi, sei lo taka karah fun kim tak maia socio-economic leh political thila kan ramin hmasawna atana kan mamawh kawng hrang hrang a rawn huam tel thei hi a lawmawm ka ti a. Chuvangin, he lawmthu sawina *Motion* rawn putlul hi pawmpuia, ‘adopt ngei ni se’ tiin ka thlawp thu ka rawn sawi bawka ni e. Ka lawm e.

**HON. SPEAKER** : Aw le, Member zahawm tak Pu H. Lalzirliana i lo sawm ang.

**PU H. LALZIRLIANA** : Pu Speaker, ka lawm e.

Kan Governor-in House address-a a thusawi vawiinah kan sawiho a. Hei, a line-by-line hian ka chhiar a, YouTube lamah ka ngaihtla bawka, thu tha hlawmkhawm niin ka hria a. Tin, a move tuin a rawn move thiam bawka, kan adopt sak ngei dawn bawka niin ka hria a.

Heta word rawn hman, ka rilru leh ngaihtuahna late zinga mi a then then han sawi ka duha chu - page hmasaberah hian, “...*My government shall make every effort to be true to the mandate*” tih laia hi a pawimawh a. Vawiinah hian kan Sawrkar thar mipui hmaah kan inzuar a, theihtawpin thil chi hrang hrang, tiam chi hrang hrang nen, chu chu vawiina Governor speech hian, he, “min thlang tling tute hi an beiseina hi kan ti dik dawn a ni”, tia a rawn thuaahnih hi a lawmawm ka ti a. Hei hi engtik lai pawha kan vawn tur ni ta sela.

Tin, heti lai, phok 3-naah hian, “... *I know that mere words are not enough*” tih pawh hi a ropui hle; “*thu chauh ni lovin, tisaah i chantir ang u*”, tih a ni a. Tichuan heti lai phok 4-naah, “...*Boost the overall socio-economic growth of the states*” a ti a. Heti laia investment kan han tih turah hian, “kan kawng, kan hmalakna tur hrang hrangte hi kan zavaia kan economy a thanna tur atan, state pumpui thanna tur atana programme siam a ni” han tih ang chi te; tin, “capacity-building programme kan ngai pawimawh ang” han tih te, tin, “priority on welfare programme and services to the weaker and vulnerable weaker section of the society” han tih te, heng te hi a ropui a, a lawmawm a ni.

Tin, Investment Policy - *The Mizoram Sustainable Investment Policy, 2024* kan han duang tur te, chumi approved a ni tawh te hi a ropui a. Chu chuan he state-ah hian ram pawn atanga lo kal, businessmen-te, entrepreneur-te, company, private leh PSU te pawh huamin he ramah hian business kan ti dawn niin ka hria a, chu chu a lawmawm ka ti a. ‘Business-marketing’ te kan han ti a, a buk thelh hian kan thelh thin ni tein ka hre ve thin. Mizoram-a business marketing kan han tih hian khulai Silchar leh Bagha vela



Marwari pali-panga ina an rawn ngaihven loh chuan kan business a tawp deuh titih ringawt mai a ni.

*Vapi*, Gujarat-a khaw pakhata an product chu, keini India hmarchhak tawp thleng thleng a rawn thleng thei. Keini kan tharchhuah te, kan siamchhuah ve te Silchar vai Marwari pahnih-pathum ina an rawn khar duhloh chuan, ‘no marketing, no business’ a ni ringawt mai. Vawiinia hian business kan sawi a ni emaw, marketing kan sawi a nih pawhin, hei aia nasa zawka a reality check kan neiha, deep study kan neih a ngaiin ka hria a. Chu chu he kan investment policy-ina min hruai thlen tum pawh nisela ka ti hle a ni.

Vawiinia hian, a sawi chauh nilovin, kalphung thar tak tak, a tha-mi hi Zoram mipuite hian kan beisei a ni a. Sawi pawp pawp, rik pawp pawp ringawt ni lovin, he mipuiina min beiseina kalphung thar tha-mi ngei kan zawrha hi he sawrkar hian a kal chhohpui hi ka duhthusam leh ka beisei a ni.

He Governor speech hi overall-in a ropui a, *kalphung thar* a nihna ang ngeiin; Hei, kum 5 chhunga Budget Speech ka lo ngaihthlak tawhah chuan a pawmna-awmin a quality a sang khawpin ka hria a, a lawmawm ka ti a. Chuvang chuan, *adopt* ngei turin ka rawn support ve a ni e. Ka lawm e.

**HON. SPEAKER** : Min lo hrethiam lawk ula. Hei, kan server hi a down lawk a, chuvangin time kha manual-in kan maintain leh lawk dawn a ni.

Tunah chuan, Member zahawm tak, Pu Jeje Lalpekhlua i lo sawm ang.

**PU JEJE LALPEKHLUA:** Pu Speaker, ka lawm e.

Governor Speech ropui tak kan nei hi a bikin ka lawmna tizualtu a niin ka hria a. Helaiah *Kalphung-thar*, sawrkar thar kan han nei a, hetiang speech ropui tak kan han nei zawm leh nghal hi a ropui ka ti khawp mai a. Tin, he a speech-ah hian ka ngaih pawimawh leh ropui ka tih ber mai pakhat chu - page no. 2 hi; Pu Speaker, i phalnain han tihlan ka duh a.

“Vawiina kan thupuan tur hian naktuk chanchinbu headline a chang dawn em tih chu kan ngaih pawimawh hmasak ber tur a ni lo. Tun aṅanga kum reiloteah ‘Mizoram-ah danglamna duhawm zawk a thlen ang em’ tih a pawimawh zawk a ni” tih hi a ropui khawp mai a. Vawiinia helaia lo thute pawhina kan ngaih pawimawha ka duh chu – Kan ram hi kan ta a ni a, khawi emaw, khawi ram, state-pa emaw lo kalin min siam that sak dawn lo; “keimahni hi a siamthatu tur kan ni” tih hi inhre thar ila ka duh a. Hetianga thu ropui tak, hmalakna tur ropui tak a rawn sawi te hi ropui ka ti a.

Tin, ram changkang tehna pawimawh ber pakhat chu - *Inkalpawhna tha* hi niin ka hria. Helaia speech-a a rawn sawilan, kawngpui tha kan neih a rawn ngaih pawimawh thu te a rawn tarlang a, hengte hi a ropui ka ti khawp mai a. Tin, keini hi South Tuipui Bial lam kan ni a, helai hmunpui Aizawl atanga kan inkalpawhna kawng hi NHIDCL ten tunah hian an khawih mek a ni a. Keitum leh Serchhip inkar kawng te saw kan tlan khu rum rum mai a. Hengte hi chak zawk leh rang zawk a hma an lak theithe pawh hi a lawmawm viau dawnin ka hria. Heng te pawh hi titheitu zawkte pawhina hma chak zawka min laksak tur te pawhin vawiinah hian he House-ah hian kan sawi lang duh a.

Tin, helaia rawn sawilan - khawpui lam leh thingtlang lam hmasawna inkhuangrual turin theih tawp a chhuah tur thu a rawn sawilang te pawh hi ropui ka ti a. Kei hi thingtlang khua, chhungkaw harsa tak atanga piang leh seilian ka ni a. Harsatna mihringah a lo thlen hian a hrehawm zia hrechiangtu ni vein ka inhria a. Tin, kan bial hi bial rethei tak kan ni a. Mi harsa te te awmkhawm kan ni a, kut-hnathawka eizawng kan tam a. Governor-in hetiang kawnga hma la tura a rawn sawi lang te pawh hi a ropui ka ti a. Tin, mi-lian leh mi-te (ti mai ila) inkar tuna a zauh tawh zia te pawh hi a nitin, a nitelin kan hrethar awm e. Henga hmalak a nih tur thu te a rawn sawilang te pawh hi a lawmawm ka ti a.

Tin, helaia ka thalai puite, a bikin lekhathiam tak tak, eizawna hna chungchanga buaina tawk tam takte ka hnenah an rawn thlen ve thin a; a bikin social media - instagram te, facebook te kaltlangin message te pawh ka dawng ve thin a. An beidawng em em a, a then phe chu mahni intihlum duh hial khawp, chutiang dinhmun a dingte pawh chu kan awm tawh a ni. Chuvang chuan, helaia Governor hian anni tana entrepreneurship leh self-employment lama dah pawimawh anih tur thu a rawn sawilang te pawh hi a lawmawm ka ti a. Ka thalai puite tan hengte pawh hi thu lawmawm tak a niin ka hria a.

Tin, helaia an rawn sawi lan, (ka sawi tawh a) khawvel ram changkang kan tehna hi kan kal a, hmun hrang hrangah. Kei hi chu inkhel-mi ka ni a, khawvel ramdang hmun 25 chuangah inkhel avangin ka kal tawh a. Khawvel hmun danga tourist an hipna hmun pawimawh tam takte kan kal kualnaah hian, kan ram pawhin kan lo neih ve hi a tam a ni. Amarawhchu, ramdang mite hip tura kan phochhuah tawk loh te pawh a awm a. Hemi chungchanga hmalak tur thu a rawn sawi te pawh hi a lawmawm viauin ka hria a.

Tin, keini kan bialah South Lungleng, hmun nuam lutuk te pawh kan nei a. Sawng te pawh saw a department changtuin hma a lak tur thu a rawn sawilan tawh te pawh kha a lawmawm ka ti a. Tin, Purun Tlang, Mizoram-a tlangsang ber dawttu te kan nei a, sawng te pawh saw tun aia han cheibawl leh chei that te han ni ta sela khualzin mite hi nasa zawkin kan hip dawn niin a lang a, heng kawngah pawh hma a lak tur thu a rawn sawi te hi a lawmawm ka ti a.

Tin, a tawp berah chuan, ruihhlo chungchang hi han sawi lawk ka duh a. A lawmawm ka ti a, ruihhlo do kawnga hmalak tur thu a rawn thailang hi. Vawiinniah hian kan in-chhung a la rawn luhkhung lo a ni thei e; naktukah kan in-chhung min luhkhung hunah chuan a hrehawm titu ber chu kan la ni dawn. Vawiina hun tha kan neih chung hian sawrkarin hma a lak tur thu a sawi, hemi duhtawkw lovin a ram mipuite hian ruihhlo do kawngah hian nasa zawka sawrkar hmalakna te lo thlawp turin he House kaltlang hian vawiinniah kan sawi duh bawkw a.

Tin, ka han belh leh lawk ang a. Hnam inpumkhatna, Zofate chungchang a rawn sawi a. Hei hi a tawngtu ka ni a, inkhelin hmun hrang hrangah kan han zinkual a. Mizo fate awm tawhnaah chuan min support-na a tha em em a. A bikin kan unau puite, state dang mite min awahna em em a ni a. Hmun hrang hrang kan zinnaah, kan hotel ah te an lo kal a, kan inkhel ennaah Mizo thuam hrang hrangte in an rawn inthuum a. A then chuan khuang nen theihtawp chhuahin min rawn support a. Mizo kan nihna hi a mak an ti a, kan inunauna te; hetiang kawnga kan inunauna, lungruaw zawka kan kal nan te leh ruahmanna fel zawk neia Mizo fate inlungruawna hetiang kalpui tur a nih thu a rawn thailang te pawh hi, kei hi a tawngtu leh a hlutna hrechiang tu ka ni a. Heng chungchang a rawn sawilang te pawh a lawmawm viauin ka hria a.

A tawp berah chuan, Governor Speech - *Motion of Thanks* hi 'ka thlawp e' tih kha ka han sawi duh a ni e. Ka lawm e.

**HON. SPEAKER** : A lawmawm e. Aw... Nakinah kan la teh dawn nia; hun awm deuh se. Tunah hian Governor Speech - *Motion of Thanks* kan discuss a ni a; Pu K. Laldawngliana, Member zahawm tak i sawm ang.

**PU K. LALDAWNGLIANA:** Pu Speaker, ka lawm e.

Sawi tur tamtak a awm a, minute 5 chauh kan ti si a, a inchhirawm hle mai, helam atang chuan. Amaherawhchu, kha, kan hmaa miten tha tak takin an sawi tawh a, tam tak ka sawi loh mai a thain ka hria a. Kan Speaker zahawm tak phalnaa hetiang thusawi leh thei tura hun tha ka nei hi, a hmasa berin Pathian hnenah leh bial mipuite chungah lawmthu ka sawi nawn ve leh a ni.

Kan Governor zahawm tak thusawi hi han chhiar han chhiar hian leh, ka speech ngaihthlak tawhah chuan a aia tha hi a awm ang em aw ka ti a. A thu hi a sap tawng pawhin, a mizo tawng pawhin a tha vek mai a, paih tur hi a vang khawp mai a; 'A tha em em vek a ni' tih kha thuhmaah kan sawilang tel duh a.

Pu Speaker, kan Governor zahawm takin thuhmaa a rawn sawi hi ka rilru a hneh hle mai a, han chhiar lan ve leh ka duh a, I phalnain - "Kan sawrkar chuan inrelbawlina chhawng hrang hrangah sawrkar chak, langtlang leh rinawm, harsatna te sukiang tura

rang taka hmala thin leh mawhphurhna la ngam sawrkar rinawm,” tih hian ka rilru a khawih hle mai a, hei hi a taka a hlawhtlin ngei ka beisei tlat a. Kan hotute, kan House leader te leh kan minister-te tan a tam thei ang ber tawngtai a pawimawh hle a ni.

Hei, nikum lam khan a mimal te, kohhran ang te leh chhungkua ang te pawhin nasa takin ram roreltu tur kan dil a. Chutah chuan Pathianin kan tawngtaina te chhangin kalphung thar, mipui sawrkar, ZPM Sorkar kan tawngtaina a lo chhuak hi a lawmawm ka ti a. *Mipui-sawrkar* anih ang hian ‘kan beisei a sang hle a ni’ tih kha helaiah hian sawilan anih avangin, hei hi kan sawilang tel leh duh bawk a.

Ka ngaih pawimawh em em mai chu - *vision* hi kan nei thin a, amaherawhchu, a tak thei lo tur neih vak ai chuan, a tih theih tur tlemte fel tak, tihhlawhtlin tur, kan rama kan mamawh ang chi neih mai hi Pu Speaker, kan ram hian kan mamawh tawh hle hian ka hria. Hei, Viksit Bharat-in Developed India, 2047 ruahmanna hetiang a awm tura a rawn ti hi tihhlawhtlin ngei theihna turin keini pawh hian hei kan term kum 5 chhung hian kan theihna zawng zawngin, kan thiamna zawng zawngin, rilru seng takin contribution chu kan neih ve a tul a ni tih hi kan sawilang tel leh duh bawk a.

Tin, budget chungchang hi kan sawi fo thin a. Budget hi Governor-in a rawn sawi ang hian, mipui tan rinnain budget kan siam hi a ni mai a. Chuvang chuan, he kan budget siam pawh hi mipui tan a tak taka tihhlawhtlin a nih theihna turin kan pass a pawimawh hle a ni. Kan sum leh pai dinhmun hi kan hre tlang a, helaiah hian inmawh inmawh vak hi a tul ta lovin ka hria. Inrenchem a, a rulhna solve dan tura kan tan tlan hi a pawimawh hlein ka hria. Tin, sawrkar hnathawkte leh mipuite pawhin inrenchem hi kan zir a pawimawh hlein ka hria a. Sawrkar hnathawkte pawh kan entitlement bak kan la a nih chuan, in submit ngam ila thain ka hria a. Chuvang chuan, inrenchem thei ang bera kan tan ho, mipui leh sawrkar hnathawkt zawng zawng bakah keini Legislators te pawh hi a tul hle a ni. Sawi tur tam tak a awm a, sawi sen pawh a ni lova. A thu mai hi chu tha tak hian a sawi theih a, a taka ti turin tawngtainain hun kan hmang chho zel turah ngai ila a thain ka hria.

Tin, sawrkar tawh zawng zawng hian kan policy-ah hian agriculture hi pawimawh em ema kan neih a ni a. A hlawhtlinna hi a tlem thei lutuk a, farmers te tan hian a tak taka, a hmuna tihlawhtling thei turin hmanruaah Cooperative Society te kan hmang dawn an ti a. State Level Agency hrang hrang te hi a taka hmana, party induhsakna lam ni lovin, a tihhlawhtling theitu tur thlan chhuaha, enfiah ngei ngei a tul a ni tih kha ka sawilang duh bawk a ni.

Tichuan Pu Speaker, kan duh tawk mai ang a. Ka tawng muang deuh hlek a, ka hritlang nen; ka duh ang zawng zawng kan sawi hman lova. Kan Governor Speech-a *Motion of Thanks* hi ka pawmpui a, ‘tha ka ti hle a ni’ tih kha ka sawi theih tawk ni mai rawh se. Ka lawm e.

**HON. SPEAKER** : Minister zahawm tak Pu B. Lalchhanzova i lo sawm ang.

**PU B. LALCHHANZOVA, HON. MINISTER:** Pu Speaker, ka lawm e.

Kan Governor Speech - *Motion of Thanks* sawi theia ka awm hi ka lawm hle a. A thusawi pumpui hi han sawi kim vek chak mah ila, phok 4-na i phalnain, ‘*Ease of Doing Business*’ tih lai hi han sawi zau ka chak a, kan ram mipui tan pawh thil tul tak niin ka hria a.

Chubakah, “*Mizoram Sustainable Investment Policy, 2024*” Cabinet-in 5<sup>th</sup> February, 2024 khan a lo pawm tawh bawk a. Hemi ‘*Ease of Doing Business*’ chungchang hi tunhma atanga kan ram tana ka lo vei, ka ngaihtuahna tam tak ka lo sen ve thinna a ni a. Ministry of Commerce & Industry, Govt. of India in 30<sup>th</sup> June, 2022-a *Ease of Doing Business* tih tha state 10 a tar chhuahte chu - Andhra Pradesh, Gujarat, Telangana, Haryana, Karnataka, Punjab, Tamil Nadu, Himachal Pradesh, Madhya Pradesh leh Maharashtra-te an ni. Hengho hi *Ease of Doing Business*-ah hian ‘engtia che tha nge an nih’ tih ka han chhiar a, ka han zir chiang a, a then then ka’n la chhuak a. Chungah chuan, land dispute - ram leilung intihbuaina chi hrang hrangte rang tak takin an lo chingfel thin a. Micro, Small, Medium size Enterprises ‘MSME’ kan tihah te an che tha em em a. *Quickest sanction approval* thil reng reng, miin thil an dilin rang tak takin sawrkarin a chingfel sak thin a. Chu chu vawiin nia kan CM lo ni ta Pu Lalduhoma pawhin ‘*Right to Public Service Act*’ tih a lo aupui thin, khatiang chi kha a ni.

Tin, *Forward Thinking Business* – sumdawwna an state chhunga tha taka a kal theih nan theih tawpin, rang takin sawrkarin chak takin ngaihtuahna a seng thin tih a ni a. Chubakah chuan, *Single Windows Clearance for Various Sectors* - sumdawwna ti duh reng rengina registration tih kual ngai, biak kual ngai tam deuh mai ang chi te hmun khata tihfel mai theih te kha an lo kalpui tha em em mai a. Tin, *Land Bank with Land Booking Capacity*, industry leh eizawwna eng eng emaw ti duhte tan sawrkar khan land bank tha tak takte a lo nei a, khangah khan ram te a va hman mai theih thin a ni. Hetiang te hi *Ease of Doing Business* leh *Mizoram State Sustainable Investment Policy* hnuai, khami chhunga awm tho kha an lo ni nual mai a. Hei hi kan state tan Governor-in a rawn sawilang hi tangkai taka kan hman chhoh hi tulin ka hria a.

Pu Speaker, ka ngaihtuah thin a, miharsa tete te an dinhmun zir chianga kan kual venaah, khawpui ringawt pawh hi han en ta ila, vawk vulh duh te, ar vulh duh te, handloom lam han ti duh te, chawhmeh zuar duh te pawh a ni ang a; dawrkai duh, taxi driver, two-wheeler taxi driver, etc te tan khan sumdawwna an kalpui duh hian, ‘tu ber nge an va dil anga, tu hi nge nu leh pa chan changa an va tlukluhna tur’ tih lai te hi kawng a bo hle a, a manganthlak ka lo ti rei tawh viau mai. Chuvang chuan, Governor

speech-a lo lang hi he Sawrkar lo piang ta hian a ngai pawimawh a. Hei hi, hetiang lama harsatna tawh, manganna tawh thinte tan *zalenna dar vawtu* a nih ngei ka beisei a ni.

Chubakah Pu Speaker, ka rilrua awm thin chu, sawrkar hian (eng sawrkar pawh lo ni se) sumdawngtu tute pawh hi, eng sumdawna pawh hi ‘sawrkar puihna tel lova ti theih lo a ni’ tia he sawrkar hian, “May we help you; may I help you?” tia, heng sumdawna kalpuitu hrang hrangteah hian, ‘sawrkar hi harsatna thlentu a ni zawk thin mai lo maw’ tih ang chi te pawh hi ka lo ngaihtuah ve thin a ni. Sawrkar hi harsatna thlentu ni lovin, ngaihdan nei ve thiam lote pawh ngaihdan hrilha, idea pea, awlsamna thlentu a lo nih ve theih hi kan ram tan hian tul ka ti em em thin.

Tin, Mizoram State - *Sustainable Investment Policy*-ah hian heng sector hrang hrang a ngaihpawimawh te hi Pu Speaker, ka han chhiar chhuak hram teh ang –

Industrial Infrastructure Maintenance Fund (IIMF) te chhawp chhuah a ni dawn a. Agri & Horti te, Food Processing te, Bamboo te, Education and Skill te, Handloom and Handicraft te, Information Technology, Music and Entertainment, Nursing and Hospitality, Power and Renewable energy, Ropeway, Sport, Textile, Garment and Tourism, Transport and Logistic Hubs. Hetiang velte hi rawn tar chhuah a ni a. Khang kha kan state ah hian sumdawn awlsamna, mitin tana eizawn awlsamna a lo awm theihna tura he kan Governor zahawm takin a rawn chhawp chhuah hi tha ka ti a, *Motion* hi ka rawn thlawp a ni e. Ka lawm e.

**HON. SPEAKER** : Tunah Member zahawm tak Pu T. Lalhlimpuia i lo sawm ang.

**PU T. LALHLIMPUA** : Pu Speaker, ka lawm e.

Kan Governor nimin lama a speech hi a zavaiin han chhiar ila, a chhungah hian *rangkachak* tam tak awmin ka ring a. Chumiah chuan lailang vek dawn ila, lailang vek tur a tam hle dawnin ka hria a. Tun tumah hian ka ngaihpawimawh, a thusawia tha ka tih em em rawn tarlan ka duh a, ka rawn ding ve a ni

I remtihain, Pu Speaker, phok 4-na ah khan, “micro-economic level-a environment tihchangtlun a ngai a. Hmasawna vawng nung turin ram chhunga hmasawna hrang hrangte kan tihchak a ngai tel bawh a. Hemi tur hian fiscal prudence ngaihtuah chung zelin insiam that ngaite chak takin kalpui tur a ni” tih kha a ni a. Thusawi huai ni ringawt lova, a taka hmalak a tul thu te, chumi tihlawhtling tura sawrkar sum budget ruahman leh hmanral dan tur fimkhur a ngaih thu kha a rawn sawi bawh a. Heti lai fiscal prudence chungchang thu te hian ka ha a hawlh ve deuh a, chulai te chu han tarlan lawk ka tum a.

Hemi phenah hian thil tam tak a awm thei hian ka hria a, *fiscal prudence* a rawn tarlan danah hian Mizoram sum enkawl thuah State sawrkar mawhphurhna len zia hi a sawi phenah hian a awmin ka hria a. Budget allocation pawimawh zia te, fiscal policy mumal zawk, sustain zawka kal pawimawh zia te, chubakah state sum hman ral te, sum lakluh lam taxation thu-ah leh state tihchangtlunna tura sum pek thu ah te fimkhur a tul em em a. Chu chuan ‘Mizoram economy mumal leh ngialnghet zawk, sustain zawk a keng tel em’ tih te; chu mai bakah hriselna thu-ah ‘kum tam daih infrastructure kan dah tel em’ tih te pawh hi, helai thu kar te hian a rawn reflect niin ka hria a.

I remtihna Pu Speaker, ka’n tarlan duh chu - nikum 13<sup>th</sup> February khan kan CM-in budget pharhin, kum kal ta 2022-2023 budget estimate leh actual budget kha kan hmu a, a data-ah tam takah a awm a. Khata *actual budget* leh *budget estimate* inthlau lutuk te kha kumin budget-ah hi chuan han inhnai theih ni ta sela tih te rilruah a awm a.

Tin, Department thenkhat - Police te, UD & PA te, PHE te, Electricity te ah chuan budget estimate leh actual budget te kha a zia viau a, a variance kha 10% hnuai lam a ni a, a bak thenkhat kha chu a inthlau em em mai a ni. Chungte chu ngaihtuahin, tun tum sawrkar thara budget - *fiscal prudent* a sawi chungchangah hian budget kan pharh turah mumal zawka nakin 2025-26 budget te pharh hunah kan han en let ang a, chuta demawm lo tura sawrkarin hma a la tur hi a lawmawm ka ti a. Chutihruah chuan, keini ho pawh hian kan ngaihtuah a; wawiih hian he sawrkar tan hian khelmual siam nge tha anga, agriculture link road (kawi tak ni lo, chho tak pawh ni lo) tih te ngaihtuah a tul em em a.

Tin, Lunglei lam bik mawhphurtuah min han ruat a. Lunglei - Thenzawl road chungchang buaipuitute ka han zawt a (kal pahin); hei hi thil .....

**HON. SPEAKER** : Hei, morning session hun a lo tawp ta a, dar 1 a ni a. Member zahawm tak hi sawi zo law law se kan ti nge? (*House-in a sawi zawm a remti a..*) Aw, sawi zo law law rawh se aw.

**PU T. LALHLIMPUA** : Pu Speaker, ka sawi zo a ni mai. Chuvang chuan, he ZPM Sawrkarin research base anga budget a han pharh tur kawng hrang hranga kan han ti hi lawmawm ka ti a. Kan Governor in he thu, helai paragraph-a a tarlan hi a ropui ka ti a. “Vawiih hian he speech hi ka thlawp a ni” tih kha ka rawn sawi a ni e. Ka lawm e.

**HON. SPEAKER** : A lawmawm e. Hei, morning session a lo tawp ta a, dar 1:00 a lo ri a. Kan chawl lawk ang a, sawi tur kan la awm nual mai a, afternoon session-ah kan chhonzawm leh dawn nia.

*Recess (1:05 PM)*

**2:00 PM**

**HON. SPEAKER** : Aw le; nichin first session-ah khan Governor Speech chungchangah discussion kan nei kha a ni a, kha kha member sawi duhte kha sawi kal lai mek kha a ni a. Tunah a dawta sawi tur Pu Lalnghinglova Hmar, Minister zahawm tak ilo sawm ang.

**PU LALNGHINGLOVA HMAR, HON. MINISTER:** Pu Speaker, ka lawm e. Budget Session-a ka tel vawikhatna a ni a, he hmuna ka din theihna tura min duhsaktu Aizawl West-II mipuite leh Pathian chungah lawmthu ka sawi a ni.

Tun tumah hian kan Governor thusawiah lawmthu sawina hun kan nei mek a ni a; ka rilrua thil lo awm chu, thil danglam tak kan tawng niin ka hria a. Thlai thar lei chungchang, chawhma *Zawhna & Chhanna* hunah khan kan han sawi ta a. Kan titi pawh a dang ta a, kan inhnialna te pawh a dang ta a, ‘A ki a dang ta daih mai’ tih ka rilruah a lo lang a. Chu chu kan Governor thusawiah khan a lang a ni.

Pu Speaker, i phalnain - “Agriculture leh a kaihhnawih sector a ngaipawimawh ber ang” tih kha a lang a. Chu chu February Ni 5, 2024 Council of Ministers meeting-ah khan ‘*Operation Guideline for Agriculture Assurance Fund*’ tih kha pawm a ni a. Chutah chuan - Aieng, Hmarcha, Sawhthing, Hmunphiah lei dan tura kha pawm fel tawh a ni. Tichuan, he House zahawm takah hian Pu Speaker, budget te pharh a la ni ang a, chutah chuan hun rei tak chung kan hotute’n an lo aupui tawh, ‘*Budget-ah dah*’ tih chu a takin a lang dawn ta a. Chu chu, tun tum kan Larsap thusawiah khan a rawn lang chhuak ta bawk a, hei hi a lawmawm ka ti hle a ni.

Chutihruah chuan, kan sum harsatna te pawh a rawn sawi lang a, *Post Devolution Revenue Deficit Grant* a tlem tual tual thu te, tin, chhiah atanga sum lak luh a tam tawk loh thu te kha a thusawiah tarlan a ni a. Hemi chungchangah pawh hian, GST lakah te pawh tan a ngai. Tin, ‘private sector atanga investment a tam tawk lo’ tih kha kan Larsapin a tarlang a, chumi sukiang thei tur leh, chumi pui thei tur chuan February Ni 5 veka Council of Ministers thukhawmin, kan Larsap thusawia lang ang hian, ‘*Mizoram - Sustainable Investment Policy, 2024*’ chu a lo pawm tawh bawk a. Chutah chuan, investment hiptu tur (Member zahawm tak Pu B. Lalchhanzova khan a sawi lang zawk tawh a) 10 kha a rawn dah a. Khatah khan Pu Speaker, a chunglama 4 kha kan en chuan, a) Agriculture & Horticulture (helaia mi bawk kha a rawn tarlang leh a ni). b) Food Processing c) Bamboo a ni a. Tin, Maute pawh hi kan Sawrkar hian Mizoram-a awm sa hman tangkai dan hi a zir chho zel dawn a, chumi zir chuan Member zahawm tak Prof. Lalnilawma pawh a lo han vak chhuak tawh a ni. Tichuan, d) Education & Skill tih te



a ni a. Pu Speaker, kan luh chilh vek hman loving; chuvang chuan, kan duhtawk ang a, khami bikah kha chuan.

‘Road Sector Project tihchangtlun ngaih pawimawh’ tiha kha, Pu Speaker, kan Larsap thusawiah khan a lang baw k a, a lawmawm hlein ka hria a. Member zahawm tak Pu RM Chakma khan *maintenance culture* neih a that thu kha a sawi a, a lawmawm hlein ka hria a, a rawn sawia kha; “lirtheia chuang chung pawhin vangvat kan kai” a ti a Kha kha kan hun hma deuh a ni a, han siamthat theih ni se a lawmawm dawn hle mai a? Engpawhnise, i sawi anga, Member zahawm tak Pu RM Chakma rawtna *maintenance culture* kha, kan PWD Minister zahawm tak Pu Vanlalhlana hian, “rinawm takin, eirukna tel lovin ka bei dawn a ni” a ti a. Chutah chuan, kawng sial mai ni lovin, a enkawl zui - *maintenance culture* a kha rawn tilang thei turah ngai ila Pu Speaker. Chu tak chu tun tuma kan Larsap thusawiah hian a rawn lang chhuak tel baw k a, a lawmawm hle a ni.

Tin, a tawp bera tana ka sawi duh chu, (keimahni chan department te chu ni danga sawiah khek ta ila) kan Larsapin kan chhehvel leilung humhalh a pawimawh thu a sawi laia hi a ni a, chutah chuan, *climate change* leh *global warming* chungchang a sawi lang a. Pu Speaker, i phal chuan minute khat lekah ka zo vang.

Heta a rawn sawilanah hian thil pawimawh em em awm ta chu – “kan environment hi kan humhalh loh chuan...” tih a ni. Amaherawhchu, hei hian ken tel a neih chu, hmasawna ruhrel din tur hian a chang chuan rel kawng sial a ngai; a chang chuan kawngpui sial a ngai; a chang chuan hydel project din a ngai. Chutiangah chuan environmentalist-te nena thu han inhnial deuh bap bap te pawh a awm ang. Amaherawhchu, Pu Speaker, Mizoram tana tha ber tur, a pahniha kai kawp si hian a kal theih ka ring a, chu chu kan Larsap pawh hian thiam takin a rawn bilh tel niin ka ring a. Hengte avang hian kan Larsap thusawia lawmthu sawina hun ka han hmang hi a tha ka ti a, lawmthu ka sawi a ni e.

**HON. SPEAKER** : Minister zahawm tak Pu F. Rodingliana ilo sawm ang.

**PU F. RODINGLIANA, HON. MINISTER:** Pu Speaker, ka lawm e.

Rinna mita kan thlir, beiseinaa kan nghah helai chhung rorelna sangah te kan han thu ve thei hi Pathian leh bial mipuite bakah Zorama min tawngtaisaktute avang a ni tih hi ka Chiang a, lawmthu ka han hrilh hmasa a.

Hei kan Governor thusawi hi a ropuiin, a lawmawm ka tih chu - tumahin “*a ngaihnawm lo*” tih kan sawi lo kha a lawmawmin ka hria a. Vawi 2 - 3 chhiar chhuak

kan veilama mite pawh an han awm kha he policy *tihlawhtlingtu* niin ka hria a, a lawmawm lehzualin ka hria a.

‘Sustainable Development’ a han ti ta a; a hma chuan ‘Mizoram Investment Policy’ a ni a, a ‘sustainable’ lai hi kan policy ah khan kan uar khawp mai a. Kan project siamte hi sustainable lo tak tak te a awm a, chuvang chuan, hetiang a *Sustainable Investment Policy* a han awm hi a tha ka ti a.

Tin, thil han sawi zau deuh ila, Pu Speaker. G20 ah khan a hmingin ka han tel ve a, khawi khawi atang te emaw chuan min han phone let leh a, Embassy hrang hrang atangtein – “in hospitality chu a tha; amaherawhchu, in State-a rawn luh vena tur kawng in lehkhaah kan hmu ve ngai miah lo mai a, State dangte chuan ‘hei hi in rawn tih chuan, hei hi kan pe ang che u ang a, hemi policy ah hian in rawn lut ang’ tih te hi a ni a. Nangni chuan policy phakhatmah awm lovin min sawm a” an ti a ni. Chutiang an rawn luh ve theihna tur kawng kan han hawng te hi a lawmawm ka ti a.

Tin, power kan intodelh tur thu a rawn sawi a, amaherawhchu, waviinnia kan hman mawlh mawlh tawh, mipui ten a zar kan zo tawh a rate tisang lova, electric bill Department-ina kan chai laih laih lai hi han sawilan ve mai mai ka duh a.

Hemi intodelh tur hian hma nasa takin kan la a, Zoram chhung leh pawn mai ni lo, khawvel pawna investor te pawh. He sawrkar hi a ngialnghet a, he sawrkar hi kan Chief Minister rinna avangin investor te pawh kan dawr sen loh kan hmu a. Kan Chief Minister hi kan sawrkar mai ni lo, ‘sawrkar dangte pawhin an lo ring hle a ni’ tih ka hria a, a lawmawm khawp mai a. Project hmasaa a hlawhchhamna kha tunah chuan kan hlawhchham dawn lovin ka hria a, power chungchangah hian.

Infrastructure maintenance fund chungchang hi Pu Speaker, a pawimawh khawpin ka hria a. Infrastructure tam tak kan nei a, sum tam tak siamin ro kan din a, mahse luah lovin tunah hian tam tak a awm a. Hengte pawh hi tuaihnua, kan ram ro atana siam hi a pawimawh khawp maiin ka hria a.

Tin, chu lovah chuan, Pu Speaker, i remtihna han chhiar leh ta ila – “Mizoram State Project Monitoring Committee’ an ti a, project monitoring hi a ngai khawpin ka hria a, Pu Speaker. A chhan chu, project kan siam lai hian ‘kan ramin kan mamawh em’ tih lam aiin, ‘hetah hian sum a tam em’ tih lam te pawh he monitoring committee hian thlir se a thain ka hria a. Tunah hian kan ramah rohlu tak tak, sum tam tak senga kan din hnimin a bawh lek-luk hi a tam em em mai a ni. Chuvang chuan, a project pawh hi kan monitor ngun a ngai. Hei hi ‘sum siamna atan a ni ringawt em’ tih pawh hi kan ngaituah ngaiin ka hria. Chuvang chuan, he committee hi kan CM meuhin a ho a nih chuan chak takin a kal ang a, he ram tan *malsawmna* mai ni lovin, kan tu leh fate thlenga chhawrtlak

project hi kan ngaihtuah a ngai tawhin ka hria. Sum siamna tur ang lek leka project kal thin hi Monitoring Committee a lo awm loh vang te pawh a ni ang.

Chuvangin, vawiinah hian monitoring a awma, kan project monitor tu turte kan han neih te pawh hi a tha hlein ka hria a. Chu mai ni lovin, he monitor hian a hnu thlengin vil nawn thei se; a project lai mai ni lo, a tawp thleng a vil bakah a hman zui dan tur thlengin Pu Speaker, helai atang te pawh hian lo monitor ula a thain ka hria. Monitoring hi a pawimawh em em mai a, chuvang chuan, project tam tak, sum tam tak luan ralna, ramin a chhawr miah loh hmun tam taka awm hi chhawr dan tangkai zawk leh hlu zawk, he ram tana malsawmna ni tura helai atang te, hmun dang atang te pawh; kan zavaia kan tanruala, he ram zim te hi mite rawn tlawh tlak, mite'n, 'engtin nge an tih bik' an rawn tih thei tura siam tur hian, he *Motion*, kan Larsap thusawi atang hian inlungualna min pe hi a lawmawm ka ti a. Chuvang chuan, thinlung thar, ngaihtuahna thar nen he ram siam tur hian kan zavaia tan ho a tul zia kan hria a.

Tunah chuan politics-a intlansiakna a lo tawp ta; a thleng hmasa kan ni ta a. Lehlama thute pawh hian vawiinah chuan inpawhna tha tak nen he ram siam tur hian ke kan pen tlang niin ka hria a, a lawmawm hle mai. Nimin tawngtainaah te pawh opposition awm chuang lovin stage khatah kan han lam tlang te kha he ram tana thil chhinchhiah tlak niin ka hria a. Chungte chu a lawmawm em a, Pu Speaker, ka han sawi a ni e. Ka lawm e.

**HON. SPEAKER** : Member zahawmtak, Pu K. Beichhua sawm ang.

**DR. K. BEICHHUA** : Pu Speaker, ka lawm e.

Kan Governor speech hi a tha ka ti a, a ropui ka ti a, kum 10 kan lo kal tawhnaa 'speech tha ber' ti ilar ka tihsual ka ring lo a ni. Kan sawrkar hmalak tum dan te leh kal a tum dan te, a thusawi hrim hrim *present tense* a ni lova, *future tense* veka a sawi hi a ropui hle a, a tak ram pawh kan thlen ngei ka beisei a. Chutih lai chuan, hunin a la hril turah ngai ta ilar.

Pu Speaker, hun a tlem a, ka han sawi zung zung ang a. Budget-in a tum chiang takin a rawn sawi chhuak a. A thusawia tha ka tih deuh mai chu, (nichinah Pu Jejea khan a rawn sawi tawh a) "vawiina kan thupuan tur hian naktuk chanchinbu headline a chang dawn em' tih chu kan ngaih pawimawh hmasak ber tur a ni lova, 'tun atanga kum reiloteah Mizoram-ah danglamna duhawm zawk a thlen ang em' tih hi kan ngaihtuah tur ni zawk rawh se" a tih hi, tun financial year chhunga thu ropui ber niin ka hria a ni, Pu Speaker.

Tin, "Sawrkar laipui atanga kan sum hmuh post-devolution deficit grant a tlem tial tial a, private sector atanga investment hmuh kan nei tam bawk si lo" a rawn ti a, a dik viau

a ni, hei hi. Hengah hian kan harsatna te a rawn tarlang a, hei hi a dik viau a ni. ‘Kan economy than ai hian kan social life hian min than khalth em aw’ tih tur hian kan Zoram dinhmun hi a ni tlat mai a. Hengah hian inzir tur kan ngah hlein ka hria. Sawrkar ringawt kan rilruah hian awm lo se, mipui lam te pawh hian ‘inzir tur kan nei a ni’ tih hi kan hriat a pawimawhin ka hria.

Tin, sum dinhmun that loh zia a rawn sawi a, tu pawhin kan hre vek a. Chungah chuan a siamthat dan tur te pawh a rawn sawi chhuak a ni. “A siamthat nan thutlukna harsa leh huaisen tak siam a ngai dawn a ni” a ti a; ‘*huaisen*’ tih hi a rawn sawi uar khawp mai a. Pu Speaker, kan Governor zahawmtak hian kan sawrkar hi *huaisen* vak lovah a ngai ta em maw ni ka ti deuh rum rum a, vawi 4-5 a rawn sawi chhuak a ni. Fiscal consolidation hi sum leh pai hmanral inhrekna hmang chauhin a thleng thei lova, sum lakluhna nasa taka ngaihtuaha, tihpun a ngaih zia a sawi bawk a ni. Chuvang chuan, hetah hian rilru kan sen a pawimawh hlein ka hria a. I dinglam kan ni emaw, i veilam kan ni emaw, ‘nangni; keini’ kan ti tawh tur niin ka hre lova, tuna kan sum dinhmunah hian chuan.

Tin, economy siamthatna kawngah hian *damdawi hmanga tihdam* nen a rawn tehkhin a. Vawilehkhata tihdam thut theih a ni lova, damdawi hmanga zawi zawia tihdam ngai angin a rawn tehkhin a. Kei chuan damdawi hmanga tihdam a theih tawh pawhin ka hre lo; ‘major operation a ngai a ni’ ka ti, Pu Speaker. kan sum dinhmun, tuna kan Zoram dinhmun hi. Chutiang tur chuan kan Zoram dinhmun hi kan hotuten vei ta se a pawimawh hlein ka hria a.

Tin, “tunah hian thutlukna khirh tak tak siam ngai mai thei dinhmunah kan ding a ni” a ti a, ‘chu *thutlukna khirh tak tak* chu enge ni ang aw’ tih ngaihtuahna nasa takin min siamsak a. Kan sum harsatna hi a namen lo tual tual a, kan social life hian economy a than khalth ta nge ni; hei hi sawrkar lo kal tawh te thiam loh nge; ‘a tute zawk hi nge thiamloh kan chantir ang’ tih lai hi kan inzawhna tur ni se a a thain ka hria.

Tin, “Economy than dan leh investment than dan a inzawm tlat a, investment hip hi tun dinhmunah hmanhmawh thlak tak a ni” a tih hi, hei hi a dik hlein ka hria a. Hengah chuan a ram mipui pawh hian hawi her leh kan rilru pawh kan tihzau deuh hleka, mi hausakna te, mi-thiamte thiamna te kan lo chhawr thiam vea, ‘he ram tan engtingge kan hman tangkai theih ang’ tih rilru kan put hi a va han hun tawh tak em!

Tun dinhmuna kan state-a thingtlang lam eizawna ber chu agriculture te, AH & Vety te, horticulture te, fishery hi a la ni chiahin ka hre lova. Hengah hian sawrkar hian ‘khawnge’ tiin, theihpatawp chhuahin tang ta se; chu chu thingtlang lama kan mi leh sa te mamawh ber niin ka hria. (Pu Speaker, engpawh nise, hun tawi te ka dil belh che a. Group leader te chu tlem chuan an pek tam deuh thin kha maw le....)

Pu Speaker, tichuan, Sawrkar hian policy thar, ‘hand-holding policy’ a nei a, a ropui ka ti a, a hlawhtlin ngei pawh ka duhsak a; Pu Speaker, duhsakna ka hlan bawk a. Chutihruah chuan mipui lam pawh hian inzir tur (nichina ka rawn sawi tawh ang khan) kan nei a ni. Sawrkarin eng tianga policy tha lo nei pawh ni se, a mipui-mimirin kan zir loh chuan kha policy tihhlawhtlin kha thil har tak a ni thin a ni. Mi-taima leh rintlak tak tak kan awm lai hian, kan ramah hian hna thawk tha peih lo, politics-a therhlo eng eng emaw zawnga eizawn tum te pawh kan awm tih chu tlang hriat a ni a, heng te pawh hi kan kalsan a tulin ka hria a.

Tin, Pu Speaker, Sawrkarin *connectivity* a ngaihpawimawh hi thil dik a ni a. Connectivity tha awm lovin ramin hma a sawn thei lo tih kan Chiang a, hetah hian beiseina sang tak he Sawrkarah hian kan nei bawk a ni.

Tin, kawlphehtha lamah theihtawp chhuaha hmalak anih tur thu a rawn sawi bawk a. Kawlphehtha hi sawrkar tin hianin an sawrkar phat atangin *kawlphehtha-tha* siam hi kan tum a ni vek a, mahse vawiih hian, “*beating around the bush*” tih ang deuhin luite leh eng engemaw neuh neuhah hian kan kual kan kual a. Engatinge Chhimtuipui megawatt 46 pechhuak thei awm reng saw kan tih mai loh? Engatinge sawlai ah sawn kan in concentrate mai loh? ‘A awmna hmun sawn kan hotute lung a len lo deuh nge’ tih ngaihtuahna te pawh min siamsak a. Chuvang chuan, heng te pawh hi rilruah neih ta ila a tha awm e.

Vanneihthlak takin *National Education Policy, 2020* an lo duang tawh a, hei hi mihausa leh miretheite zirna kawngah angkhata kan kal theihna tura duan a ni a. Heng te pawh hi sawrkar hian a rang lamin hmang thei se a tul hlein ka hria.

Tin, Pu Speaker, ruihhlo chungchang hi kan hre theuh a. Tunhma USA, America a muhil chung a tlangval kal kan hmuh ang chi te kha kan ramah tunah hian muhil deuh ti tiha khawlaia vak hi kan tam tawh a ni. Chuvang chuan, sawrkar ang pawhin, kohhran ang pawhin, NGO ang pawhin mutmawh-hnarmawha neiha kan chet a hun tawh a. Kan ram hi eng ang pawhin develop ila, kan thalaite an pul phuk phuk si chuan engnge sawt ang tih lai hi rilruah a lian viau a. Helai hi kan sawrkar hian theihtawpin hma la se tih hi ka rilruah a lian hle a ni.

Tin, Pu Speaker, kan ram dinhmun, kan economy infrastructure leh social life siam tha tur chuan a tam lam apiangah kal duak duak lovin, mi lawm zawng ringawt emaw, mi mal duh dan ringawt emawa thutlukna siam lovin, huaisen tak, *tlak-ngam politics* kan khelhi a va hun tawh em! Kan ram chhung zimte ah hian popularity ringawt kan ngaihtuah ang tih te pawh a hlauhawm hlein ka hria.

Pu Speaker, kan Governor thusawi hi a ropui ka ti a, “sum leh pai dinhmun siamtha tur chuan huaisen taka thutlukna harsa zawk te ka siam a ngai” a ti bawk a. Chuvang chuan,

he *Motion*rawn puluttu hian a pulut thiam bawka, a sawitu pawh hian speech a pe tha bawka; ‘a tu hi nge thiam zawka, a tu hi nge kan support ang’ tih tur khawp hian an thiam ve ve a ni. Tha ka ti hle mai, Pu Speaker. Ka lawm e.

**HON. SPEAKER** : A lawmawm e. Tunge sawi leh ang? Member zahawm tak Pi Prova Chakma ilo sawm ang.

**PI PROVA CHAKMA** : Pu Speaker, ka lawm e. Hun remchang min siamsak avangin ka lawm lutuk e.

Kan Governor Speech hi a tha a; a that rualin, keima tha tih zawng, tha ka tih ber chu *agriculture* lam hi a ni a. Amaherawhchu, kan bial, 35-West Tuipui Bial hi agriculture potential area a nih avangin, agriculture lamah hian tlemin importance ka pe bik anih chu. Agriculture hi thingtlanga chengte eizawna pawimawh ber niin, kan State - Gross Domestic Product pawh 26% a ni a, hetah hian ka bial hi kan langin ka hria a.

Tin, Agriculture-a burning issue kan neih chu hmunphiah chungchang a ni a. Hmunphiah season hi December - January a ni thin a, tunah February thla kan chuangkai tawh a. Keimahni bial chhung bikah chuan a tir lama he sawrkarin hmunphiah rate 100/- an tih kha kan lo lawm em em a. Tichuan, hun a kal zel a, “Madam, engtikah nge hmunphiah lei turin i rawn kal dawn?” tih zawhna kha ka dawng nasa em em a ni. Kan bial bikah hian hmunphiah a eizawng an tam khawp mai a, a zat ka sawi thei mai lova. Chuvangin, hmunphiah rate hi kan ngai pawimawh em em a. Sawrkar hmasaah khan tun ang hunah hian phunphiah atanga revenue lut a tam phah a, kg ah ₹130/- tea hralhin miharsate chuan sum tam tak an lalut ve a ni. Amaherawhchu tun sawrkarah hian hmunphiah rate hi ₹100/- an tih laiin, a thenkhat chuan kg ah ₹75/- pawhin lei mahse, a tam zawk chu a hralhna an hmu lo a ni. Pu Speaker, agriculture farmers te hmakhua ngaia an thlai tharchhuahte hralhna tur ruahmanna tha zawk siam tura kan ngaih laia hetiang anih si chuan, a leh pekah hian ‘kan mipuite hian sawrkar hi min ring tawh ang em’ tih te ka rilruah a awm a ni. A chhan chu, tun tuma quintal eng emaw zat hralhna tur awm lo avang hian, ‘nakum lamah hian phur takin an thawk ang em’ tih kha ka rilruah a awm a ni.

A pahnihna-ah chuan, road construction hi. Keini bial hi kawng nei chhe ber kan nih ka ring a, engtiklai pawh hian kawng chhiat avanga harsatna kan tawka reng a, kawng tha hmuh tur hi kan nei ve ngai lova. Amaherawhchu, sawrkar hmasaah pawh khan kawng chhia siam tur hi a awm reng a. Tichuan, tuna kan Governor Speech-ah hian sawrkarin kawngpui tha leh tlo siam a tum thu leh, thenawm states te nena inkalpawhna kawngpui tha siam turin theih tawp tak meuh a chhuah dawn tih kan hria a, kan phur takzet a. Keini pawh tun sawrkar zarah kawng tha kan neih ve ngei kan beisei tih kha ka han tarlang duh bawka a ni.

Tichuan, eco-tourism chungchang kha tlem han sawi ve ka duh bawk a. Kan Governor Speech-ah khan sawrkarin rural tourism a ngaipawimawh tur thu kan hmu a. Pu Speaker, I phalna in ka han chhiar chhuak lawk ang a. “Tourism hi sum lakluhna hnar tha tak a tling a, ram chhung leh pawn lam atanga khualzin mite tam tak, tam thei ang bera hipluh kan tum dawn” tih kha, tha ka ti a. Amaherawhchu, keimahni bialah hian tourist hipna tur hmun hnih - thum vel kan nei a - pakhatat chuan, chhim lama Missionary rawn luh hmasak berna khua, ‘Missionary Kai’ kan tih hi Tlabung ah hian kan nei a, he Missionary Kai hmuh tur hian tourist tam tak an rawn kal thin a ni. Khatah khan kan tel turah ka inbeisei a. A dang leh chu - Tlabung bialah hian tourist hipna tur Mizoram-a Post Office *hmasa ber* kan nei a, kha pawh kha tourism project-ah hian a tel turah kan beisei bawk a ni. Ka lawm e.

**HON. SPEAKER** : A lawmawm e. Member zahawm tak Pu Lalchhuanthanga i lo sawm ang.

**PU LALCHHUANTHANGA:** Pu Speaker, ka lawm e.

Hei Governor Speech-ah *Motion of Thanks* kan sawi mek a. Governor Speech hi tha kan ti tlang a, a lawmawm khawp mai a, kan lungrual tlang a ni. A point hrang hrangte kha kan han en pawh khan a tha hlawm vek mai a. Kei chuan ngaihpaawimawh, tha tih zual ka nei a, Sawrkarina inrenchemna leh sum leh pai dinhmun insawh nghehna a rawn uar hi a pawimawhin tha ka ti.

Kan inthlan dawn khan kan Finance Officer pakhat chuan, “Sorkar-na chan te hi in han chak a, a huphurhawm teh mai a nia; kan sum leh pai dinhmun hi a chhe lutuk a ni,” tiin min hrilh thin a. Kan sawrkarin central sawrkar atanga RBI through-a loan kan lak te, financial institution hrang hrang leiba kan neih zawng zawngte hi a tam a. Hemi piah lamah hian, contractor bill kan bat te, supplier bill kan bat te, pension hlawh kan pek theih loh te leh electric bill kan bat te, healthcare bill kan bat te leh thildang tam tak a la awm a. Heng hi kan dinhmun a ni a, chumi avanga kan Governor-in a inremchen a pawimawhzia te, kan sum leh pai dinhmun sawhngheh a tul zia te a rawn sawi hi a pawimawh ka ti khawp mai a. Hemi avanga sawrkar hmalakna - MLA te motor leisak a ti tawp te, MLA te facility thenkhat han tih tlem te leh, a theih ang anga inrenchemna atana hma a han la chho te hi a lawmawm ka ti tak zet a ni.

Tin, a dawt lehah chuan, *New National Education Policy, 2020* hi a pawimawh hle dawn a. Kan thalaite hemi education thil bakah hemi vocational education lampang chite kan sawrkarin a rawn ngaipawimawh dawn hi lawmawm ka ti a. Oxford University-a mithiamte chuan, “tun atanga kum sawm ah hian kan hriat ngai miahloh hna 30% hi a awm dawn a ni” an ti a ni. Chung kan hriat miahloh hna, kan hnathawh tur 30% hi a rawn piang dawn a ni a. Chutiang te a nih avang chuan, kan education policy te pawh hi kan her danglam a ngai dawnin a lang a.

Tin, *Bana-kaih Policy*, policy thar, hun danga kan la neih ngai miah loh thalaite tana eizawwna - skill development lam te, entrepreneurship leh self-employment te, Incentive & Capacity Building Programme te duan chhoh a ni ta te hi a lawmawm ka ti a. Kan thalaite problem hi a sang em em mai a. Term hmasa lamahte ‘thalaite hmakhua kan ngai’ kan ti a, a dik a. Amaherawhchu, sports lam ringawt maiah hian kan insawr bing deuh a, kan thalaite eizawwna tur skill development lam te hi kan ngaihthah rei em em a, “hengte avang hi a ni ang em, kan thalaite zingah ruihhlo a lo hluar tak?” tih te ngaihtuahnaah a lo thleng tel a. Chuvang chuan, kan thalaite tan skill development lam leh entrepreneurship lamah te kan sawrkarin hma a han la thar tur hi a lawmawm ka ti a, a thlakhlehawm hle a ni.

Tin, kawng hrang hranga development leh ei leh bar lama intodelh kan tumna kawnga sawrkar hmalakna te pawh a tha a. Kan sawi thin tawh angin, Mizoram hian *potential* chu kan nei tha a. Amaherawhchu, heti chung hian kan la intodelh lo em em a ni.

Tin, a tawp ber atana ka han sawi duh chu, road lampang bawk hi a ni. Kawng hi a that loh chuan, engmah a hlawhtlin theih loh. Tunah chuan kan PWD Minister hian tan lak a tum hle niin ka hria a. Term danga Chief Minister in PWD an lak hi a fuh hlei thei lo a ni. Tunah chuanin Chief Minister ni lovin, Minister tha takin PWD a chang tur hi beiseina sang tak ka nei a, a hmalak tum dante pawh a rawn ziak chhuak a, hei hi beiseina sang tak nen kan lo thlir a ni. Pu Speaker, kan Governor thusawi hi tha ka ti a, ka support e.

**HON. SPEAKER** : A lawmawm e. Tunah chuan Member zahawm tak Pu TBC Lalvenchhunga i lo sawm ang.

**PU TBC LALVENCHHUNGA:** Pu Speaker, vawiinah Hon. Governor thusawi kan han chaiho a. *Motion of Thanks* rawn pu luttu in a rawn sawi kha kan thusawi tawh zawng zawngah khan a reflect Chiang Hlein ka hria a. “*Thua sawi mai a tawh lova, a taka hmalak a ngai tawh a ni*” tih kha rilruah a rawn lian em em mai a.

Kan ngaihthlak tawh ang khan, Member ten kan pawm tlang hlein ka hria a, a vanneihthlak pawh ka ti a. ‘*Huaisenna*’ tih a lan zin zia te kan han sawiho te kha a ropui ka ti a. Sawrkarin hmalak a tumna hrang hrangte kan Member pui ten an rawn sawi tawh a, rawn thual nawn ka tum lova. Amaherawhchu, pawimawh kan tih hrang hrangte zingah khan, *pawimawh* tih bik pakhat rawn thlur ka tum dawn a ni.

Pu Speaker, i phalnain helai Hon. Governor thusawia “*Damdawi hmanga inenkawlina ang deuh bawh hian economic policy pawh hi kalpui a ngai fo a. Hun reilote chung atan a hrehawm thei e; mahse, a rei hnuah erawh chuan kan tan rah tha a chhuah thin a ni*” a tih hian rilru a tikal thui em em mai a. Tun sawrkar tharin a hmalakna tura a hmachhawpte, a hmalak meknate kan hmu a. Amaherawhchu, keimahni dinhmun kan



chian a ngai em em mai a. Member tam zawk thusawi atanga kan hriat chian chu, kan sum leh pai dinhmun, kan economic policy, ei leh bara intodelh tur te, self-sufficient (mahni intodelh) tur hrim hrima sawrkar hmalakna tura kan sum leh pai dinhmun a chhiat em avangin kumin bik hi *Year of Consolidation* atana kan sawrkarin a han puang te hi a lawmawm ka ti a. Insawhnghehna hun kumkhat ngawt mai kan han neihah hian, nimin lawka Lammual-a kan Chief Minister thusawi kha ka lo ngaithla a; kuminah hian leiba rullhna tur ringawt atan vaibelchhe 1000 chuang a kal ral dawn a ni a. Hengte avang hian sawrkar thar tan huaisen tak maia han kal pur pur a chakawm rualin, kan sum khawhralna leh hmanralnate uluk zawka ngaihtuah a ngaih thu kan Governor's speech ah hian a lang chiang em em mai bawk a.

Pu Speaker, i phalnain ka rawn quote leh duh chu. a tawp lamah khan - *'Mi thenkhat tihlawm tum avanga sum khawhral chhonzawm kan duh em ni? Ka tan chuan a chhanna leh a damdawi chu a chiang vek a ni'* a ti a. Kha khan he sawrkar kal tum dan a hril lang chiangin ka hria a. Kan harsatna, kan *mu-tan* nia lang kha a rawn sawilang fiah em emin ka hria a, chutiang chuan, sawrkar pawh hi huaisen taka kal turin ka beisei a. Heng kan han sawite ah hian kumina kan expenditure kalphung tur te, kan sum kalphung kum dang kan lo thlir ve thin angah chuan 'economic services' kan tih mai, ei leh bar intodelhna kawnga sawrkar hmalakna hi hniam lam a pan char char reng mai a. Chutih mek laiin Social Service Sector - mipui vantlang hamthatna atana kan sum leh pai hman pawh a kiam hret hret a. Chutih mek lai chuan, keimahni sawrkar inrelbawlina lian ta lutuk, 40% dawn mai a han kal chho te hi tun sawrkar thar, budget tharah hian a reflect ngei pawh ka han ringin, ka han beisei a.

Amaherawhchu, a taka han ti tur chuan 'capital expenditure' kan tih mai, a ruhrel dinna tura kan sum leh pai hman hi a tilian leh tur chuan, *puk* bawk atanga bul tan leh a ngai dawn a. Chu *puk* kan bul tanna chu, mumal zawk leh awmze nei zawk kan sawrkar thar hian ngaihtuahna thar nen a rawn chhawpchhuah ka ring a. Heng capital atana kan lakluh tam zawk hi a tak takah chuan hmasawanna ruhrel din aiin nakin lawka sum leh pai min ei-ralpuitu tur bawk dinna atana kan hman thin hi huaisen takin tuna kan sawrkar hian a rawn hmachhawn ka beisei em em bawk a.

Hun a chep ang reng viau na a, a tawpna atana thu ka han sawi duh chu - kan thusawi ngaihthlak hrang hrangte atanga lang chiang em em pakhat a awm a. Pu Speaker, i phalnain ka rawn quote leh hram duh a -

Hon. Governor in a thu bul tannaa kan harsatnate a han sawi hnuah "Amaherawhchu, *'harsatna a awm apiangin, hmachhawn dan a awm zel thin'* tih a nih kha' tia a thusawi hi, a English version zawkah phei hi chuan, *'But with every challenge, there is always an opportunity to re-think, to re-assess and make for new ideas and policies'* a ti a. Hei hian ngaihtuahna thar hmangin mumal zawka kan re-assess leh theia, ennawanna mumal tak neia, thil thar, idea thar zawk ngaihtuahna thar hlak leh policy thar hlak nena

hmachhawn he sawrkar hi a inhuamzia a rawn sawi ang hian, vawiinnia *Motion of Thanks* Governor-ina he House zahawm taka a rawn pharh hi ka pawmpuiin, lawmawm ka ti takzet a ni. Ka lawm e.

**HON. SPEAKER** : A lawmawm e. Tunah chuan, Member zahawm tak Pu Lalrinsanga Ralte i lo sawm ang.

**PU LALRINSANGA RALTE:** Pu Speaker, ka lawm e.

Vawiin ni-ah Governor's speech kan han sawiho a ni a. Ka han en thin a, a tlangpui hian tha ka ti a, ropui ka ti khawp mai a. Kan Governor in, '*Ka sawrkar chuan inrelbawlha chhawng hrang hrangah sawrkar chak, langtlang leh rinawm, harsatnate sukiang tura rang taka hma la thin leh mawhphurhna la ngam sawrkar rinawm nih tlat kan tum.*' ti a a han sawite hi a ropui tak zetin ka hria a. Heng kan Governor in a sawi ang hian, vawiin nia Mizoram-a harsatna tam tak rawn thleng, entirman - ramri hung chungchangah te, FMR chungchangah te, thlaithar leh hmunphiah chungchangah te sawrkar hian mawhphurhna la ngama, huaisen taka a kalpui hi ka beisei tak zet a ni.

Tin, Governor in sawrkar laipui atanga kan sum hmuh *post-devolution revenue deficit* a tlem tial tial thu te, private sector atanga investment hmuh kan neih tam loh thu te leh heng avang hian leiba leh sum indaihlohna nasa tak kan neih thu a han sawi te, chutiang karah '*harsatna lo awm apiangin hmachhawn dan a awm zel thin*' tih thu a han sawi te hi ropui ka ti a. He sawrkar hi mipuiin kan beisei angin kan han enchhin a, huaisen taka he sawrkar hi akala, nichina kan sawi anga sawrkarin mawh la ngama, kan harsatna leh ram mipuiten kan beiseina anga an kal hi ka duh a, chutiang tur chuan sawrkar pawh hi duhsakna ka hlan a ni.

Tin, "fiscal consolidation hi sum leh pai hmanral inhrekna hmang chauhin a thleng thei lova, a theihna apiangah tan lain, sum lakluhna lam pawh ngaihtuaha, tihpun a ngai dawn bawka ni" tih a sawi hi a tha ka ti a, a ropui ka ti a. Amaherawhchu, Pu Speaker, helaiyah hian ka rilruah ngaihtuahna pakhat a lo awm a, hetiangah '*sum lakluhna lam pawh ngaihtuaha tihpun*' tihah hian, kan sawrkar hmaa kan duh vak loh tui bill leh electric bill tihsan te, mipui harsatna tawka zawnga sum thawhchhuah kan tum hi chu ka ring lova, chutiang a ni lo turah chuan ka ngai a ni.

Tin, helaiyah hian tha tih deuh mai ka nei a. Thalaite tana professional leh vocational field hrang hranga thiamna sang zawka nei thei tura hma lak anih tur thu te, entrepreneurship leh self-employment lam dah pawimawh a ni dawn tih thu a rawn sawi te hi ropui ka ti a. Amaherawhchu, Pu Speaker, thalaite tana sawrkar leh mipuite enchhin tura kan inzawrh laia a thusawia rawn lang tura ka beisei, rawn lang lo a awm tlat mai a. Thalai eizawna tur neilote loan pung awm lo, interest tlem zawka peka sawrkarin quarantor-a tan a tum thu te hetah hian rawn sawi lang turah ka lo beisei a,

mahse kan hmu ta lova. Budget Speech ah chuan rawn lang turah ka ngai a kan House Leader pawhin a lo sawi thin a, Mizoram Development Bank din a chumi chuan kan thalai eizawna anmahnia an kal theihna tura loan a pung awm lo te, interest tlem zawk leh sorkar pawh quarantor-a a tan ngei theihna tur kha Budget Session-ah chuan a rawn lan ka beisei a ni. Helai hi a lawmawm khawp mai; kan insawi anga thalaite tana kan tlana, chutianga loan te kan kalpui theih dawn chuan, tuna kan thalai tam tak mahni inhai kaw zo lote tan a lawmawm dawn em mai tih kha ka rilruah a awm a kan sawi duh a ni.

Tin, Pu Speaker, helai hi i phalnain ka han chhiar lawk ang a - “tunhmaa kan lo awm thin tawh dan ang bawk khan kan awm zui zel mai dawn em ni; mi thenkhat tih lawm tum avanga sum tihral chhonzawm kan duh em ni; ka tan chuan a chhanna leh a damdawi chu a Chiang Vek” tih hi a ropui khawp mai. Amaherawhchu, Pu Speaker, helaihia hian ngaihtuahna pakhat ka lo nei a. He kan sawrkar hian kalphung thar neia sum leh pai renchemna kan kalpui rual hian, sawrkar hmasa lama kan duh vak loh kan lo sawi fo thin hi kan lo kalpui ve ta em ni aw, tih ka rilruah a lo awm a. Adviser to Chief Minister 2 sawrkar hmasaah a awm a, tunah 5 kan nei a; OSD ₹1/- hlawh sawrkar hmasaah 1 a awm a, tunah 2 niin ka hria a. Tin, Committee Vice Chairman te pawh *committee* a nihna anga committee-a kal mai tura ngaih a nih lai khan, office pek niin ka hria a, staff leh facility tha tak tak nen. Tin, Committee Secretary-te pawh office pek anni dawn em, tih te ka rilruah a awm a. Kan MLA tha tak tak, fit tak tak an awm laia ZIDCO, MIFCO, KVI, ZOHANCO, MYC leh a dangah te midang hnena sum tam tak sen belh ngai lova kan MLA-te an thut theih laia, an thiam leh an felna pawh hriat chuang lem lohte Board-a kan indah te hi, kan thuziah nen hian a inkalh deuh em aw, tih ngaihtuahna ka nei a. “*Mi thenkhat tihlawm tum avanga sum khawhral chhonzawm zel kan duh em ni?*” tih hi, kan duh hi a ang riauvn ka hria a. Chuvang chuan, hengte hi Governor sawi ang hian, kan sawrkar hian huaisen taka a rawn tih ngam ka ring a. A hnuai chiahah hian, Pu Speaker, a chhanna hi a awm a - “*kan hmaa hnathawh tur hi a harsa hle a ni*” tih hian a chhangin ka ring a. Chuvang chuan, midang tam tak tihlawm ngai kan lo nei ve a ni thei a, hengte hi sawrkarin (nichina kan sawi ang khan) huaisen taka a kalpui ngama, sum renchemna, sawrkar sum indaihlohna tam tak karah hian *thutlukna huaisen* a siam kan beisei zel a ni. Kan Governor thusawi hi tha ka ti a, ka rawn thlawp a ni e.

**HON. SPEAKER** : Pu C. Ngunlianchunga ilo sawm ang.

**PU C. NGUNLIANCHUNGA:** Pu Speaker, ka lawm e.

Ka hmaah khan an rawn sawi teuh tawh a; tun tuma Governor Speech hi a pui rem rem ka ti a, ‘kan zo ang em aw?’ ka ti a ni. A thu hi ropui ka ti a, ka hma chiahah khan ka sawi tum pakhat chu a rawn sawi a. A pahnihnaah “sawrkar inrelbawl danah te, a ngaih pawimawh leh a thil tumah te danglamna hmuh, mipuiin an beisei” tih a langin ka hria.

“Chu beiseina te chu tihhlawhtlin ngei a nih theih nan sawrkar chuan theihtawp a chhuah dawn a ni” a ti a, a tak thleng thei se a duhawm ka ti. He speech hi a takin thleng hram se, hetiang mipui beisei hi.

Kan hriat theuh angin, Mizoram-ah Congress party-in sawrkarna hun eng emaw chen kan kalpui tawh a, MNF pawhin a kalpui tawh a. Tuna sawrkar thar lo dinga hi la sawrkar ve lo; thil thar hmuh beiseia sawrkar thar siam a ni a. Chu tak chu vawiina kan Governor Speech-ah hian a rawn lang chiang a, hei hi a tak ram thleng thei hram hram sela Zoram tan ava tha dawn em!

Tin, a pahnihaah chuan, phek 4-na ah, “thua sawi mai a tawk lo; a taka hmalak a ngai tawh a ni. A tam thei ang ber thawkchhuak thei turin sawrkar sum ruahman leh a hmanral dante fimkhur taka ruahman leh thlirlet a ngai a ni” a ti a, hei hi a dik ka ti. Kan kaldan hi neitu rawngbawl hian kan bawl lo emaw ni aw tih mai tur hian sawrkar hi kan che thin deuhin ka hria a. Uluk taka kan ramin a mawmawh leh kan sum leh pai hmante pawh lo let leh tur lam ni lova, tute emaw hlawkna tur leh hmakhawngaih avang ringawt maia sum leh pai kan dah vak vak mai te hi a tha lo ka ti a. Kan hunlaite pawh khan, kha lamah te pawh khan kan lo thut ve hunlai te pawh a lo awm ve tawh thin a, khang lai te pawh khan kan department enkawl ve tawhah chuan theihtawpin tan kan la a, sawrkarin sum a hmuhlet theihna tur; sawrkar chu mipui ta a ni a; ‘mipui’ chu tunge? - keimahni kan ni. Chu rilru pu chuan he sawrkar hi a kal dawnin ka hria a, vawiina kan speech sawiho hi a ropui ka ti takzet zet a.

Tin, phek 8-na ah “Mizoram State Project Monitoring Committee chu 22.1.2024 khan Chief Minister kaihhruainain din a ni a” a ti a; heng te hi a ropuiin, kan mamawh a ni. Ka bialah ka sawi thin a, term hmasa lam pawh khan (kan hotu dangte’n ngaih loh lamah ngai lo se la) Sports infrastructure chungchangah PMGVK atangin kan bialah khan a ek-bengin kan beng a, kan mamawh lo; a lutuk. Building lianpui pui an sa a, tunah sawn tu nge luah dawn pawh kan hre lo. Lo ti tehreng pawh ni se, saw saw sawrkar hmasaah khan, ‘hei hi tute nge luah dawn?’ ka ti a, ‘company-in an luah chak lutuk’ tiin min chhang a. Mahse, sa zo se, an luah ka ring lo a ni. Chutiang chuan, ka bialah tho hian polytechnic building cheng tam taka sak a ni a, vawiinah chuan *ramhnuai-thlam* a ni ringawt. Khatiang chi kha vawiinah he monitoring committee hian uluk takin kan ram hi (kan ngaihtlak tawh angin) keinin kan vei loh chuan, veitu tur dang an awm lo. Chuvangin, kan mamawh, kan tana tul leh ram hmasawna tur ngaihtuaha he committee hi a kal tha ka ti a. Tunah pawh hian NH-54, Zemabawk - Tuipang laih a ni a, heng te pawh hi enpui an ngai a ni. An duh duhnaah leivung an paih ringawt mai a. Tin, kawng kawite pawh sawrkar hmasaah khan zawhna “hemi chungchangah hian PWD-in role play ve theih a nei em?” tiin ka zawt thin a, “engmah tihtheih kan nei lo” tiin min chhang a, a pawi ka ti a. Kan ramah eng company pawhin hna thawk sela, *kan ram* a ni; kan duh danin an thawk ve tur a ni. Hei, Chief Minister ho meuhin committee din a ni a, hei

hian kan ram hmangaihna nen, lainatna nen, duhsakna nen monitoring tih a pawimawh takzetin ka hria. Hei hi kan thil mamawh em em mai a ni.

A dawt lehah chuan, kan sawrkarin kawlphehtha siamchhuah chungchangah te, a hrui chungchangah te pawh zawhnaah te pawh ka zawt a; nakinah kan Power Minister khan a larawn chhang turah ngai ila, arawn chhuah hman chuan. Lunglei atanga chhimlam saw ruah a sur apiang hian kan thim ringawt mai a ni; a rei lutuk tawh. Sawng te pawh saw tihthat a ngai lutuk tawh; khua a chhiat deuh chuan, ‘Khawiva atangin...’ an ti a, chhimlam zawng zawng saw kan thim vek ringawt mai a, sawng te saw tihchangtluna, tihhmasawn a ngai lutuk a ni.

Vawiin chu Pu Speaker, a nikhatna a ni bawka, bawhpelh lutuk lo ila. (**Speaker:** A tawp berna a ni bawka, bawhpelh lutuk lo ila ..)

A tawp bera ka sawi duh chu – hei, hmasawna hna kan thawk nasa bawka, a lawmawm ka ti a. Phek 9-na ah hian, “environment tichhe zawnga hmasawna hi chu hmasawna tluantling a nih loh avangin, environment tichhe lo zawnga hmasawna hi Mizoram pawhin a tum a ni” a ti a. Hmanni deuh khan khawchhak lamah ka zin a, tuna kan sawrkar tharin ‘sawhthing lei tur’ a tih avang hian lo vat hi an tam em em mai a ni. He kan hmasawnaah hian sawhthing hi nei teuh ila kan environment a chhiat si chuan, a pawi viau ang. Tuna keimahni ho mai ni lo, thang leh thar lo la kal turte tan tuna kan ramngaw kan tichhe zo a nih chuan, (hmasawnnain a ken tel chu loh theih loh anih rualin) he *hand-holding policy* leh sawhthing lei hian kan environment hi tichhe viau dawnin ava lang em! Champhai North leh South lam te, East Tuipui te pawh va kal ve ula, kan hotute bial lamah te in va kal ang a. A lawmawm, lehlamah chuan; hna pawh an thawk nasa. Sawrkarin ‘chumi zat chuan an lei dawn a..’ tiin hna an thawk nasa. Amaherawhchu, lo an vat nasa lutuk saw; kan ramngaw khiti em ema kan tichhe zel dawn a nih chuan, khatiang lo zawng deuha chul rita, khati zawng deuha kan tih ang, kumtina insawn lo zawng deuha kal dan kha a awm em? Helai hi enchian a ngai khawpin ka hria. He hmasawna, sum kan duh luatah hian kan ram kan tichhiat vek palh ka hlau a ni.

Nichina ka sawi ang khan, NH-54 kawng kan laihna chungah hian Pu Speaker, han kal ila, kawng laihna vangin an duhna hmun apiangah... (**Speaker:** Minute 5 i nei a, minute 7 i hmang tep tawh a nia...) Aw, Pu Speaker, ka zo tep tawh a nia. Chu chuan kan ram ngaw a tichhe nasa tawh lutuk a ni. Chu pawh chu kan monitor that loh vang a ni. Monitoring Committee nena kan enpui hram hram theih hi ava tha dawn em! Pu Speaker, Hun min pek belh avangin lawmthu ka sawi e.

**HON. SPEAKER** : Pu Muanpuia sawm ila, chumi hnuah chuan Pu Robert-a kan sawm leh dawn a nia.

**PU LALMUANPUIA PUNTE:** Pu Speaker, ka lawm e. Nimina kan Governor thusawi kha a ropui ka ti khawp mai a. I veilama mite pawhin ropui an tih zia an sawi vek a. Amaherawhchu, a sawi loh te kha an sawi teuh mai a, kei chuan a sawi chin ang chauh kha ka rawn sawi ang a.

A thu rawn sawi kha agriculture behchhan ang deuh vek khan a rawn sawi a, “agriculture inngat, industry behchhan loh economy tan chuan tourism hi sum lakluhna hnar tha tak a ni ang” a tih kha. Industry te pawh kan han ti dawn thin a, mahse raw material ram dang atanga lak luh ngai hi chu a limit tlat thin. Thlai chi leh ran chawte pawh kan han ti a, kan han siam ve dawn thin a, a raw material kha vairam atanga lakluh a ngaih chuan, a hautak lutuk thin a; siam sa vairam atanga lakluh nen a man hi a inang deuh reng thin a. Chuvang chuan, agriculture product kan tih pun loh chuan khatiang kha a bualthlak thin a ni.

Kan ramah hian thlai a tha duh a, a tlangpuiin kan hre vek a. Sailo Lal hovin helai Mizoram an luah chin ringawt pawh hi, Sailo khua leh tui nilo Mizo thovin an luah chin pawh hi an thlen thlakna phe chu a rei tawh hle. Sailo Lal khua leh tui Mizo in kan luahna chin ringawt pawh kum 400 vel a ni tawh a, kumtin kan hal dur dur a, kan vat a, a lo chawr leh tur hnim buaipuiin kan riah chilh tlut tlut a, kan thlo zo seng lova, kan la ma then a ni. Chutiang, khawpa ram tha chu Pathianin min pe a, thil dang dang hi a ngai vak lo, agriculture hi a pawimawh ber mai a. Amaherawhchu, tui kan harsat avangin tuilakna atan kawlphehtha te a lo ngai a, power lama kan intodelh te pawh a ngai a. Kan power dinhmun hi (Pu Ngunlianchunga’n a rawn sawi ang khan) kan hydel power neih ve ang chhun chhun te chu fiamthu a an sawi ang deuh khan, thalah, ‘a khawh pha lo’ an ti a, furah, ‘a khawh pel’ an ti leh a. Pui tham deuh, State tana intodelhna khawp, amaherawhchu, a hautak avangin ‘intodelhna khawp, mahse tam duah lo’ tiin party anga policy kan siam lai khan project pali kan thlang chhuak a ni. Siaha bialtu in a rawn sawi Chhimtuipui pawh telh a ni a, kan policy ang khan hma kan la turah kan ngai a.

Brig. T. Sailova’n a sawi angin, lo neih te tihchangtlun dawn chuan power hi neih that a ngai a. Kan leiletah pawh tui kan neih that tawh loh thin avangin a pump-na tur khan electric neih that a ngai vek mai a ni. Chuvang chuan, electric lamah hian theih tawp chhuahin hma lak kan tum a, awmze nei deuh tham project pali ah insawr bing kan sawrkar hian a tum a ni.

Tin, ‘*Mizo identity, traditions leh values vawn nun*’ tih kha a pawimawh khawp mai a, kan education system in a ken tel a ngai a ni. English medium lamah kan insawrbing nasa rei tawh lutuk a, ‘*Ba ba, black sheep*’ tih vel kan buipui rei tawh lutuk a, kan Mizo society kan kalsanna a rei tawh. Khawlaiah aia upa zahna a awm lo, heng zawng zawng hi zirilaibu atanga bul tan that a ngai a; chutiang chuan kan sawrkarin hmalak a tum a. Kan Governor thusawiah pawh khatiang tak khan rawn tih lan a ni a. Khatiang zawnga hma kan lak a ‘*Aia upate zah thiamin, an thu te awihin zawm fo rawh, Pipute ro thil hlu*

*a ni*’ tih hla atang tea kan pipute khawsak dan history te hi kan zirlaibu atanga bul kan zir that leh vek hi a ngai a ni.

Tin, Tourism hi, a department te hi an bangbo deuh thin hian ka hria a, Minister tha tak takin an han ho thin te pawh hian a buaithlak tlat. Chalfilh Tlang chung phul nuam kan tih em em te, Lallianvuma Hmun te saw a local mi ho hian sawtiang phul ang saw chu kan lawm a ni mai a; sawtiang phul saw chu Shillong kawngah pawh chawhma thak tlan pelh tur a awm a, sawtiang en chakin khawi tourist mah an rawn kal ka ring lo. Kan rama tourist ho lokal tur hian ‘engtin nge kan hip ang’ tih ngaihtuahna hmanga hruai a ngai a ni. Kan sawrkarin hetiang te ngaihtuah turin mi thar te an ruat hi a lawmawm hlein ka hria a; hma kan sawn viau ka ring a. Kan Governor thusawi kha a tha ka ti a, ka thlawp a ni. Ka lawm e.

**HON. SPEAKER** : Member zahawm tak Pu Robert Romawia Royte ilo sawm ang.

**PU ROBERT ROMAWIA ROYTE:** Pu Speaker, ka lawm e. Vawiinah ka member-pui zahawm tak tak ten kan hmaa an sawi tawh ang khan Larsap thusawi (Governor speech) ropui tak, han sawisel em em tur pawh awm lo kan sawi hova. A rawn sawi hawngtu Baryl Vanneihsangin a rawn sawi hawng thiam baw k a, kan tui tlang a, a lawmawm hlein ka hria. Governor speech hi chu State tinah hian a tha viau zel a, sawrkar tirh lamah hian ‘futuristic speech’ an tih ang deuh reuh, sawrkarin tam tak ala awm hma hian duhtusam ram ang deuh hian tih tur hi an sawi a, an tih thin dan te pawh a ni ang e. Tunah pawh hian, ‘chumi chhung chuan’ tih emaw ang han tih lan te pawh kha ‘*The Mizoram Sustainable Investment Policy, 2024*’ tih hlawhtlin leh Cabinet-in a pass chungchang te, State Project Monitoring Committee chungchang Cabinet-in a lo rel tawh te ziah lan a ni a.

Chutih mek lai chuan, Cabinet-in a lo rel tawh SEDP sum – ‘sawhthing, hmarcha, aieng leh hmunphiah lei nan hman a ni’ tih te kha rawn lang law law selang; Cabinet meeting ‘a then lang; a then lang lo’ tih lampang kha chu eng pawh nise, kha kha chu a sawituin a sawi a ni mai a. A point zawngin sawi kan tum ang a hun ka lak rei loh nan.

‘*The Mizoram Sustainable Investment Policy, 2024*’ hi kan sawrkar thar Cabinet zahawm takin a pawma, hetia a taka hman tura a han kal chho hi a lawmawm takzet a ni. He thil hi kei pawhin a mimal tak pawha ka vei ve a ni a, kan sawrkar laiin *Empowered Committee* te hial dinin he, ‘*Mizoram Sustainable Investment Policy*’ hi nasa taka lo chai thin a ni a. Keima department enkawl thin changtu Tourism Minister zahawm tak Pi Rinpui hian a rawn chhawr tangkai nghalin ka ring a. State Institute of Hotel Management, Bung Bangla a a building sak peih tawh pawh khu he policy nghah avang hian kan sawrkar lai khan a takin a function lo a. A function mai tura engkim zir chianna te pawh peih tawh a nih lai khan, hetiang policy hi kan lo neih

chiah loh avang khan investment han ti tur khan kan department level-a hmalak kha a harsa a. Hetiang sawrkarin sawrkar hmasa thil tih an rawn chhunzawma, an rawn tihlawhtling hi a lawmawm ka ti a, kan House Leader zahawm tak leh a Cabinet te pawh kan fak duh a ni.

Tin, State Project Monitoring Committee pawh sawrkarin a siam a ni tih kan hria a, thusawinaah pawh a sawi lang a. Hei hi a idea pawh hi a tha viauin ka hria a, kan hman thiam erawh chu a ngaiin ka ring a. Hemi chungchanga he House zahawm taka sawilan ve duh chu - kan monitoring department chu awm tur (ti mai ila) department hrang hrang pawh va monitor thei tur kan siam hi a taka a hlawhtlin theih nana ka rilrua awm ve pakhat - sorkarin a construction leh heng a tih vel hi a monitor dawn niin a lang a, an thil lei etc te pawh a nih ka ring a. Bill a hun taka sawrkarin a pek theih nana a bill petu tur lam monitor tel hi a tul mang e aw tih hi ka rilruah a awm a. ‘Project a hun taka zawh loh’ han tih tam tak hi, a hun taka bill pek loh vang a ni duh ve khawp mai; keima tawn hriat ve pawh hi a awm a. Chuvang chuan, he Monitoring Committee nghakhlel taka mipui leh department hrang hrangte pawh mipuiin an lo nghah hian, sawrkarin a hun taka ‘hnathawktute thawh hlawh’ ti mai ang contract bill te pek a nih theih dan tur hi monitor ni sela a va lawmawm dawn em! Chuti a nih loh chuan, ‘engtinge a hun takah zo tura kan phut theih bik ang?’ tih lai kha rilruah a awm a, chu chu kan sawilang duh bawk a.

Tin, zofate suiikhawm duhna kan sawrkar hmasa lam Governor speech-ah te a a lo tel thin ang tho khan, a lo tel ve leh hi a lawmawm ka ti a. Chutiang a nih mek lai chuan, *Free Movement Regime* - Burma leh Mizoram inkalpawh theihna, ‘*zalen taka inkalpawh theihna*’ han tih tawp a ni te, hemi chungchanga kan sawrkar chak tak leh sawrkar tharin hma a lak dan te, hi he thusawi spirit nen hian a inkalh deuh em aw? He thusawi laia Governor speech-ah Governor-ina zofate insuiikhawm a duh thu sawichhuak tak rau rau ah chuan, zofate insuiikhawmna dang tura ramri hung te, FMR chungchanga kan sawrkarin chet a lak dan hi ‘a duap deuh em; a beitham deuh em?’ tih hi ka zawhna a ni tlat.

Tin, Pu Speaker, kam hnih khat lek kan sawizawm law law ang a. Agriculture ngaih pawimawhna lo awm leh 26% GSDP a nih a rawn sawichhuah te hi a tha khawp mai a. Agriculture ngaipawimawh sawrkar chuan engatinge SEDP kha an chhunzawm ve mai loh aw; a beneficiary tur te lo thlan laklawh kha? Agriculture ah khan 25-30% deuh thaw kha SEDP beneficiaries, agriculture-a sum hmang tur an niin ka hria a. Agriculture kan ngaih pawimawh dan hi a huap zo lo deuh em? Mitin-sawrkar, mipui-sawrkar hi kan ni lo deuh em? Engatinge sawrkar hmasa scheme kal laklawh, chhungkaw tam tak kaihhnawih si kha, a bik takin agriculture sector a mi rethei leh harsa ve tak tak, lo te pawh lo vat laklawh tawh ang chi kha engatinge kan chhuhsak mai aw? tihte hi ka zawhna a ni a Kkha lai kha a rawn sawi tel tawh si lova. Agriculture ngaih pawimawhna chin chiah kha a rawn sawi a, a ngaih pawimawhna leh a ngaih pawimawh tih



hlawhtlinna scheme SEDP kha a laklawh laia tih tawp a ni leh lawi si. Sawrkar-langtlang, sawrkar tha hi ni 60 chung hi chuan kan la hmulo deuh em? Tun atanga future atana sawi a nih chuan, thudang nisela.

Tin, a tawp nan tak tak chuan, Hachhek Bialtu ka nih angin khawthlang lamah khuan (*Agriculture & Allied Activities* atana hmun remchang te pawh a ni a,) kuhva hi kan buaipui khawp mai a, kan Home Minister-in kuhva chungchanga a hmalakna hi he House-ah hian ka fak duh a. Kan Home Minister zahawm tak Pu K. Sapdanga hi theihtawpin mipui pawhin 'kan support a ni' tih ka kan sawi lang ve duh hrim hrim a. Kuhva phur veng turin duty kan insiam thin te, keipawhin an zan thingpui inna te pawh ka thawh ve tawh thin a. (**Speaker:** Minute 7 a tawk ta e.) Tunah chuan tih ngai lovin, a kal ta lo deuhin kan hria a. FMR hlih vang zawk hi nge, ka hre chiah lova; engpawhnise, khalai kha ka sawilang duh ve hrim hrim a. Thlai 4 support kan pekah hian, *kuhva* - Mizoram-a kan economy khawih pha ber, thlai dang zawng zawng let tam tak mipuiin sum an lakluhna hi kan ngaihpaawimawhah hian engatinge a tel loh aw? Kuhva hi ngaihpaawimawh thlai ah khan tel ve thei sela ava tha dawn em?

A tawpnan tak tak, Pu Speaker; i tih atan thil tha deuh mai nichinah ka hmu chhuak. Hmeichhe tan inthiarna emaw, recess room hran emaw siam a tul em aw? Kan inthiar pawlh a, washroom chungah kan hmeichhe minister leh MLA zahawm tak takte nen kan insulpel nawk nawk a; hei hi thil tih ngai loh deuh te a ni em, ka hrechiah lova. Hetiang kan hmun changkang leh rorelna sang berah chuan kan hmeichhia te hian washroom zalen taka an khawsak theihna tur a hranin nei sela a va tha dawn em? Ka lawm e.

**HON. SPEAKER** : A lawmawm e. Prof. Lalnilawma, Minister zahawm tak i lo sawm ang.

**PROF. LALNILAWMA, HON. MINISTER:** Ka lawm e, Pu Speaker. Pathian leh Tawi Bial mipuite zarah he House zahawm takah ka han han thu ve thei ta hi a ropui ka ti a. Tun tum hi Session wawi hnih kan neihna a ni a, Budget Session ang zawng chuan wawi khatna a ni a, a ropui ka ti hle mai. Sawrkar thar kan phur a, mipui kan phur a, tuna Governor thusawi - *Motion of Thanks* kan sawiho laia langchiang tak chu, i vei lama thu, opposition lam pawhin min phurpui niin a lang a, a lawmawm hle mai. Kan han inzir chho zel a, ruling leh opposition te chu House ah kan inbei zel dawn emaw tih laiin, waviin chu thu-khat vuanin, a lawmawm zia kan han hre chho zel hi a ropui a. Anni hi kan senior te an ni a, *senior* dan te pawh an thiam a.

Kan thusawi hi han chhiar chhuah hian, a lawmawm takzet a; amaherawh chu lut thuk lutuk ka tum lova. Kan sawina eng atanga rawn lang pakhat ka rilruah a rawn lang a. Hemi ram, 'bua' kan tih chungchang hi Pu Speaker, *riltama awm kan awm laiin sustainable development hi kan sawi thei lutuk lo*, tih kha ka rilruah a lo lang a ni.

Chuvang chuan, sawhthing kan han sawi a, ‘ram a bua chak dawn a sin’ kan tih kan tih hi a la hun vak lovin ka hria. Kan policy ah khan chiang takin kan ziak a, “kum 2 - 3 te kan kal chuan *sustainable farming* lampangah kan kal ang; sawhthing chin a nih pawhin a terrace zawngin kan kalpui ang; ram tichhe lo zawngin” kan ti a, chu chu House Member zahawm takte pawh hian hretlang leh ila. Hei hi kumtluanin kan kalpui dawn lo tih kha min lo hriatsak ula. Amaherawh chu, ‘*tun dinhmunah chuan kan mamawh si a ni*’ tih laia kha. A sustainable zawng chuan kan la kal chho dawn a, hei hi ‘ruahmannaah a awm chho vek’ tih kha minlo hriatpui ula ka duh khawp mai.

Tichuan, Governor speech-ah kan hmuh angin, a sawia sawi mai ni lo, a taka kan hmuh tan hi a awm a. Hetia political field-a ka rawn luh ve hmaa kan thu khel thin, ‘thlai-thar leina hi budget-ah a dah theih a ni’ tia kan CM hova an lo sawi thin kha a lehlam zawnga thlirin, ‘hei hi chu a tih theih loh’ tia sawi a ni bawh thin a. A ni dawn teh tak e; ‘budget-ah pawh a dah theih loh a ni ang a’ tih kha keini lo rin dan kha a ni a. Politics ah chuan thu kan inchuh a, a sawi chak chak kha kan awih deuh mai a, amaherawh chu vawiinah hian a takin kan hmu ta a. ‘D-A-H’ tih hi kan budget ah pawh kan la pharh dawn a, chutah chuan a rawn lang tawh dawn a. ‘A lo theih teh na-meuh mai’ tia a lawmawm zia han tarlan pahin han sawilan ka duh a.

Chutih rualin, thali-thar kan lei a, kha kha a tawh lo. Khami thali-thar lei, a man man zawka kan siam chhoh zelna tur chu hemi kan investment - *Mizoram Sustainable Investment Policy, 2024* hi a ni. Investment rawn ti duh te an awm a, kan thlaiharte a man man zawka an rawn process thei a nih phei chuan, hei hi a in-kahpuk-chaw chho zel dawn a ni. Chuvang chuan, Pu Speaker, Governor speech a rawn lang point tam tak zingah hemi pahnih chia, tuna kan tarlan atang pawh hian he kuthnathawktute tana hma kan lak chhoh tum danah hian *pen khat - pen hnih* kan pen chho tan a ni hi lawmawm ka ti a. Chuvang chuan, he *Motion* hi nasa takin ka rawn thlawp a ni e. Ka lawm e.

**HON. SPEAKER** : Sawi tur kan la awm em? Member zahawmtak Pu Ramthanmawia i lo sawm ang.

**PU RAMTHANMAWIA** : Pu Speaker, ka lawm e. Hei vawiina kan Governor, kan Larsap thusawi hi kan ngaihthlak tawh tak ang khan, a ngaihnaawmin ka hria. Hetiang taka kan kal chuan kan sawrkar hi a lawmpuiawm ngawtin ka ring a. Han sawiselna tur em em pawh awmlo tur khawpin a mam thain ka hria a. Chung zingah chuan kan buaipui em em *ruihhlo* - kan thalaite suattu, vawiin thleng pawha a chhun zan a kan man reng, ‘No. 4 an man leh ta’ tih, hman atanga lo kal, hei hian rilru a khawih a. Hei hi kan sawrkar thar pawh hian theihtawp a chhuah tan niin kan hria a, kan lawm khawp a. Heng te hian kan ram, kan thalai, kan future turte min suat mek a. Chuvang chuan, hei hi kan zavaia kan tan rual a ngai a ni. Zoram mipui hi kan tanrual loh chuan, sum it vanga ruihhlo tawlhruk puitu, a tanpuitu zingah hian kan lo tel thin a, a pawm em

em a ni. Hei hi kan Governor-in a rawn sawi zingah hian ka ngaih pawimawh a ni, Pu Speaker. Tin, kan Governor hian a theihtawp a chhuah dawn a, a langtlang dawn a, ‘kan rinawm dawn a ni’ a tih te hi chhiar a nuam em em a ni.

Thil tam tak vawiinah hian sawi tur awm mahse, sawina hun a ni lova. Tin, kan ngaihthlak tak angin sum leh paiah kan harsa a. Chuvangin, ‘kum khat chhung sum dinhmun siamthat nan hun kan hmang dawn a ni’ tih vangin kum khat chhungah hian thil ropui tak tak kan beisei ngam dawn lo niin a lang a. Hei hi thil tul a nih avangin kei ka hrethiam khawp mai a.

Engpawh ni sela, heng kan Governor thusawia rawn lang awm taka ka lo ngaih, Zoram mipui leh Aizawl mipui pawhina kan beng kan chhit, kum 5 kal ta tun ang hun velah pawh khan Central Home Ministry in Pu Speaker, Assam Rifles sawnchhuahna tur order kha a rawn siam a. Chu chu tuna kan sawrkar thar, mipui-sawrkar hian ngaih pawimawh bera neiha, kan House Leader Delhi zin pawhin thu lawmawm te a rawn hawn kan lo beisei laiin, leh he Governor speech-a a rawn lan kan beisei lain, a lang ta miah lo mai a. Hma kan la la hman lo nge, hei hi a nghahhlelhawm khawp mai a. Thu-inchuh kan neih reng thin a nih avangin, he kan House Leader hian Assam Rifles hi an insawnchhuah loh chuan kan buai zel dawn tih kha Pu Speaker kan hria a ni.

Niminah pawh *Sual thupha-chawi tawngtai* inkhawm te pawh min tibuai duh khawpin Assam Rifles te helaiah an inluling a, kan ram, kan Aizawl ah ngei pawh. Chuvangin, a rang thei ang bera chhuak turin he mipui-sawrkar, sorkar thar chak tak hian hma a lak hi kan lo beisei che u a, chumi tur chuan keini pawh hian kan thlawp tlat dawn che u a ni. Assam Rifles hmunah ah hian sawrkar hmasain ruahmanna tam tak a nei a, vawiinah hian sawi teuh pawh a ngai lova. He hmunhma hi kan thalaite leh mizo mipuiin tangkai taka kan hman theih tur a nih avangin, helai kan Governor speech-a a rawn lang lo hi paw ka ti a. Chuti chung chuan hmalakna, hun lo kal turah kan lo beisei dawn a ni. ‘Kut ben tak tak te kan nghakhlel a ni’ tih kha ka han sawi duh bawka a ni.

Tichuan Pu Speaker, zirna chungchanga tan lak dan turte a rawn sawi hi a lawmawm hle mai a. ‘Zirna tel lo chuan mihring hi (hriatna leh finna tel lo chuan) a din khawchhuah theihloh a ni’ tih hria in zirna chungchanga pawh sawrkarin hma a la tan mek a. Chungah te pawh chuan rampumah zirtirtu indaihlohna a nasa hle dawn a. Hengah te pawh hian sawrkar hian ngaihtuahna pawh a seng ang tih kan ring a. Bial hrang hranga kan dinhmun te pawh, keini East Tuipui Bial ah ngei pawh sawrkar hnathawk nghet lo, SEDP atang te, MLA Fund atang tea kan rawih mi eng emaw zat kan neih thu te pawh kan Minister zahawmtak hnenah kan thlen a. Chuvang chuan, he zirna chungchanga kan thalaite, zirlaite tana ngaihtuahna he sawrkarin a a rawn hmang hi a lawmawm ka ti takzet zet a ni.

Pu Speaker, engpawh ni sela, vawiina kan Governor thusawi hi han hnial tur a awm lova, a mam tha em em a, han sawi pawr tur pawh a awm lova. Ka duhkawp lohna erawh chu kan sawi tak ang khan, ‘tel se’ tia kan lo beisei kha a tel ta lo erawh chu pawikan tih thu ka rawn sawi a ni e. Ka lawm e.

**HON. SPEAKER** : A lawmawm e. Tunge sawi leh ang? Aw, Pu Rintluanga Sailo, Member zahawmtak i lo sawm ang.

**PU LALRINTLUANGA SAILO:** Pu Speaker, ka lawm e. Vawiin niah he sawrkar thar Budget Session kan neihna hmasa bera kan Larsap thusawi kan han sawiho hi a lawmawm hlein ka hria a. Member dang ten an sawi ang khan, Pu Speaker, kan sawrkar tharina inrelbawlina chhawng hrang hrangah sawrkar chak, langtlang leh rinawm, harsatnate sukiang tura rang taka hmala thin leh “mawhpurhna la ngam sawrkar-rinawm nih tlat kan tum” a tih hi vawiinah hian ka sawi nawn leh duh a. ‘Tih’ atangin bul an han tan a, a ngaihnaawm hle mai a. Thawnthu ngaihnaawm tak kan chhiar ni hian ka hria a, han sawisel em em tur pawh a awmin ka hre lova.

Amaherawhchu, ka ngaihtuahnaah chuan, Pu Speaker, *Emau khaw pana khualzin pahnihte* chungchang kha mi hriatchhuah tir a. Kan Lal Isua’n a kalpui a, amah a ral tak daih hnua an thusawia kha, “kalkawnga min biak laia Pathian lehkha thute min hrilhfiah lai khan, kan thinlung kha a harh huai reng lo em ni kha” an inti a ni. Vawiinniah hian sawrkar thar, nasa taka intiam budget session hmasa bera Governor Speech kan han sawi hova. Ram mipuite khan, kha, Emau dai reha khualzin pahnihte beisei ang deuh hleka, harh deuh hawk kha kan inbeisei a. Amaherawhchu, ka hmu chiah ta lova.

Vawiina *Question Hours* ah pawh kan hmu a, vawiinah pawh hei, Governor speech-ah a lo lang leh a, phekk 6-naah – “A bultanna ah sawhthing, aieng, hmarcha leh hmunphiah te leisak anni ang a, hun kal zelah thlai tam zawk telh belh zel beisei a ni” a ti a. Amaherawhchu, zawhna kan pekah khan sawhthing te, hmunphiah te kan han sawi khan, kha kha sawrkarin lei a tum loh thu kha a chhannaah kan hmu a. “Sawhthing chu khaw tinah society te kan din ang a, chu chuan an lei ang; an tender ang” tih kha a ni a.

Chutiang bawkin kan House Leader zahawmtak khan, “manpower kan neih loh avangin leh kan indaihloh avangin, kan lei rih lo ang” a han ti leh kha a ni a. Hei hi Pu Speaker, he sawrkar din hnua Governor thusawi hmasa ber, Ni 13, December 2023 ami kha a ni a; phekk 5-naah hian chiang deuh maiin a ziaak a – “My Government will fix remunerative prices and will start procurement of ginger, turmeric, chilies and broomsticks from this financial year itself” a ti a ni. Chuvang chuan, vawiina kan Governor speech pawh hi ‘a ngaihtuahawm leh ta hle mai’ tih kha he House-ah hian ka sawi duh a ni. Thu-tha inziahsiakna bu a ang deuh hlekin ka hria a. Hetah hian, ‘tun financial year-ah kan lei ang’ tih a ni a, vawiina kan thusawia kan chhuan em em, keipawhin tha ka tih hi, ‘harsatna te sukiang tura rang taka hma la thin’ a ti a ni. Hmalakna hmasa ber chu, ‘kan

*ti leh rih lo ang'* tih kha a ni tlat mai a ni. Engtinngge kan kal ang aw tih kha min ngaihtuah chhonzawm tir deuh a. Chuvang chuan, 'a thlukah hian kan buai rei awm mang e aw' tih te min ngaihtuah tir deuh a ni. A thu phungin; ka sawi chhia a ni lova.

Tin, he budget bu buatsaih a nih lai hian, 'hlahna hian (nichina kan member zahawm tak Pu Ngunlianchunga sawi ang khan,) a phuar vel em maw ni chu aw' tih turin, vawiin Governor speech phek 3-na ah khan, "*thuthlukna harsa leh huiasen tak siam a ngaih dawn avangin*" a ti a; phek 4-na ah a repeat a, "*tunah hian thuthlukna khirh tak tak siam ngai maithei dinhmunah kan ding ta a*" a ti a. Phek 12-na ah repeat lehin "*kan State sum leh pai dinhmun siamtha tur chuan, huaisen taka thuthlukna harsa zawk pawh kan siam a ngai dawn a ni*" a ti leh a ni. Vawiinah hian kan harhchhuah takna ber nia ka hriat chu, i ding lama mite hi Pu Speaker, i vei lama an thut lai khan, kan budget kha "... a tam tawk; financial management an thiam loh vang a ni" tih kha an au hla a ni a. Sawrkar din phat atangin sum crore 80 in tum hnih ngawt kan puk ta a, "financial management thiam zawkte pawhin an puk ta a nih hi" te kan lo ti a.

He speech tha tak hi ngaihtlak nuam ka ti a, amaherawhchu, a chhungah hian thil puitling tak tur beisei theih a awmin ka hre lo. 'Rang taka hmala thin' a han tihah hian, rang taka hmalakna kan hriat chu - thla hmasa, hmasa leh maia Governor's speech lawmthu - *Motion of thanks*, kei ngei pawhin 'speech zawng zawngah chuan speech tha ber a ni' ka tih hial kha, vawiinah chuan, 'manpower kan lo nei lova, kan ti leh thei lo' tih a ni. Pu Speaker, ngaihtuahna puitling tak kan neih a thain ka hria. Corrigendum te siamin a speech-ah hianrawn telh ni sela chuan, a tha tluantling turah ka ngai. Amaherawhchu, a point hmasa ber - kut hnathawktute khawih nghal chat chat thil, sawhthingah a ni emaw, hmunphiahah a ni emaw, aiengah a ni emaw, hmarchaah a ni emaw, lei leh theih loh thu han tarlan nghal mai hi; a tihdiknarawn siam mai se, thla hmasa lawk kan session-a kan passed tawh kha a ni a. Siam that awm baw si lo; vawiinah kan thu ngai baw kha, 'kuminah chuan kan ti lo ang' kan ti leh hmuk mai te hi a mak hlein ka hria a, rin ngam a harsa hlein ka hria a ni.

Thil tha tam tak Pu Speaker, a inziak kan hria e; a bik takin tunah hian monitoring cell kan han din te hi a tha kan ti; sawrkar hmasa hmasa lehah ka bial Phaileng-ah khuan LESDE atangin building lian pui pui an siam a ni. Khu khu Pu Speaker, sawrkar pawhin min hriatsak ka duh. Ka fund-in tlawmngaiin kan sam fai thin a ni. Building tam tak a awm a, a quality monitor-tu an awm lova, enkawltu mumal pawh an awm ta meuh lo a ni. Khung te khu sawrkarin project dang kalpui lovin, 'a tula hman zel theih ang chi a ni dawn a ni' tih ka han tarlang duh a.

Chuvang chuan, vawiinah hian i dinglam a mi leh i veilam a miten kan duh ber chu, he ram hi ... (**Speaker:** I hun a tawp ta e.) Pu Speaker, vawi khat lek. He rama kut hnathawktute chawikan hi kan duh theuh a, hemi kawngah hian tih tak zetin *thuthlukna-harsa* kan House Leader-in a siam a nih pawha tlang taka harsatna a neih te pawh inhrilh

tawn zelin, he ram tan hian theihtawp chhuah chhunzawm zel hi keini, i vei lama mite hian kan inhuam tak zet a. Chumi atan chuan vawiina point ka han sawiah khan sawisel awm bawk mahse, a tlangpui chuan he Governor's speech hi a tha ka ti khawp mai a, ka thlawp a ni. Ka lawm e.

**HON. SPEAKER** : A lawmawm e. Pu PC Vanlalruata, Minister zahawm tak i lo sawm ang.

**PU PC. VANLALRUATA, HON. MINISTER:** Pu Speaker, ka lawm e. Member zahawm tak Pu Lalrintluanga Sailo din lai khan clarification ka rawn siam ang ka ti a, mahse ka han nghak leh deuh a, a dawtah hun tha tak min pek avangin ka lawm hle mai.

Tuna a rawn sawi, nichina 'kan House Leader zahawm takin a sawi a..' a rawn tih, "kan lei leh rih lo ang" tih te, 'manpower kan neih loh avangin kan lei thei lo" tih te kha, kan House Leader khan a sawi lo tih kha ka rawn sawi fiah duh a. Member-in kan hre vek a, nichin lawk mai kha a ni a, a lo hriatsual deuh a ni mai thei e; kha lai kha chu ka sawi thui duah lo ang a...(Pu Lalrintluanga Sailo: Pu Speaker, kan House leader khan 'manpower kan neih loh avangin kan lei thei lo a ni' a ti ngei a lawm, sawhthingah khan...) I hriat sual deuh a ni ang. (Pu Robert Romawia Royte: Hmunphiah a sawi...) kha chu, 'kan lei lo ang' ti lovin, RR Associates ho zawk a sawina kha a ni e. 'RR' tih hi a fuh lo tlangpui em maw ni dawn le...! (Pu Robert Romawia Royte: RR chhe-chi ah in lo buai a ni mai thei...) a ni mai thei.

Tin, member Pu Lalrintluanga Sailo khan, 'a danglamna ka hmu lem lo' a tih kha, kan chhiar Chiang lo em maw ni chu aw ka ti a. Vawiina kan Governor zahawm tak thusawiah hian kum 37 chhunga la thleng ngai lo *pahnih* kan hmu a ni. Chung zingah chuan, *State Project Monitoring* chungchang hi a ni. Project tha tak tak kan nei thin a, member-te pawhin an sawi a, a tawng-tawl a, a uiawmzia te pawh kan sawi thin a. Mahse, sawrkar thar chuan a ngaih pawimawh em emte zingah telhin, *Mizoram State Project Monitoring Committee* rang taka a din nghal hi a ni. Sawrkar kal tawh kum 37 chhung khan hetiang ngaipawimawh hi kan la nei ngai lo a nih hmel.

Kan hriat theuh angin sawrkar kal tawhah te khan lei dawh lai te a chim thin a, nikum mai pawh khan kan Lengpui Airport chei that lai a chim a nih kha! Sawrkarin monitoring a ngaih pawimawh a tulzia a tilang Chiang hle. Bill pek chhuah dan diklo tam tak a awm a, an thawh phu loa hmanhawha bill lo pek chhuah te pawh an awm a ni. Chung zingah chuan ka bial chhung Tlungvel-ah khian Eklavya School sak lai mek a awm a, an hnathawh phu lovin kan minister a contractor hnenah bill an lo pe a. Chuvang chuan, a hnathawh kal lai a khaihlak mek a, tunah khian a zawh theih hun chhung turah chuan an zo hman dawn lo phawt mai a, a pawh em em a ni. Sawrkar hmel thar lo langah chuan project monitoring committee chak tak, kan Chief Minister

zahawm tak kaihhraina hnuai a ding tur pawh hi kum 37 chhunga hmel thar kan hmuh leh kan la hmuh ngai loh a ni awm e.

A dawt leha chuan, thali-thar lei kan han ti a, chawhma khan kan sawi ho tawh a. A bikin hmunphiah chungchangah, sawrkar hmasa te khan lo ti thin se la chuan inbuatsaihna te pawh a awlsam sawt ang a, sawrkar thar pawhin a sawrkar ve leh buai chuk chuk ngai lovin thil a ti thei tur te pawh a ni a; kan buai chuk chuk phah ta a ni. Sawrkarin kan au hlaah chuan, ‘budget tharah thlaitharte pawh kan lei ang a, rate awm mumal sa in thil te pawh kan ti ang’ kan ti a, a nih rualin kut hnathawktute kan ngaih pawimawh avangin kan han ti chawp chuk chuk a. *Operational Guidelines for Agricultural Market Assurance Funds Management Board* te pawh hmanhmawh sa rumin kan han din rup rup a ni. Chutiang a nih avang chuan, sawrkar thar kan beiseina hi a sang hle mai a. Kum 37 chhunga kut hnathawktute thlai thar leina tur ruahmanna la awm ngai reng reng lo kha sawrkar tharah chuan a lo awm dawn ta a. Vawiinah pawh hian kan khel nasa hle mai; a lawmawm. Tha min tihpui ni te pawhin kan hria; sawi tur tam tak a awm ang.

Vawiinah hian Governor thusawi hi kan zavai (i veilama thute pawh) hian tha an ti tlang niin ka hria a, ka lawm hle mai a, lawmthu ka sawi e.

**HON. SPEAKER** : Tunge sawi leh ang? kan duh tawk tawh em ni? Leader of Opposition zahawm tak Pu Lalchhandama Ralte ilo sawm ang.

**PU LALCHHANDAMA RALTE, OPP. LEADER:** Pu Speaker, ka lawm e.

Kan Governor zahawm tak thusawi - *Motion of Thanks* Pi Baryl Vanneih sangin a rawn move kha uluk deuhin ka lo ngaithla a. Hun tawite chhungin fiah-fai fel takin a rawn present a, a ti tha ka ti a. Member thar tak ni mahse, he House-a a contribution tha tak ka hmuh avangin, a hmasain kan congrats duh a.

Pahnihnaah chuan, kan Governor thusawi kha a fel fai tha ka ti hle a. Amaherawhchu, Governor Speech hi kan sawi tawh thin, kan House Leader ngei pawh he lama a thut lai khan, “sawrkarin a ngaihpawimawh, priority te Governor hian a sawi thin a ni” a tih kha ka thinlungah a awm a. Chumi avang chuan, vawiin nia kan Governor thusawi kha han en hian, he sawrkar hian ram tan, hnam tan a thawh tumna nasa tak a rawn pholanna a ni a, *Thu* tisaah a chan chhoh tak tak hi beiseina nen kan lo thlir a. I dinglam leh veilam ten lungrual takin, he ram tan hian kan thawh hona turah a phurawm hlein ka hria a ni.

Phek 1-na ah khan, *sawrkar chak tak, langtlang, rinawm, mawhphurhna la ngam tur, hmasawna huapzo* nei a nih tur thu a rawn sawi a, lawmawm ka ti khawp mai a. Hmasawna, huapzo kalphung thar kan zawh hian ‘hmasawna hi a huapzo lo deuh e; flag rawng avang te kan inthlauhthla thin’ tih te a awm thin a; tun tumah chuan

*hmasawna huapzo* neih an tum a. ‘Tu chhungkua party pawh sawi lovin a kal dawn a ni’ an tih thina kha, a tak a ni dawn em, tih hi Zoram mipuiin kan lo thlir dawn a. Hei hi kan thusawi ngei, Governor pawhin, development kan kalpui chhohna turah hian fel fai langtlang, rinawm takin mawhphurhna hlen leh la ngam tur kan nihna a sawia hi a pawimawh ka ti khawp mai.

Chuti a nih rual chuan, kan Governor thusawiah hian, sawrkar kal lai tana min warning-na, kan phut zukna tur point pahnih hi in lo hmuh ka ring a. Kan Governor hi ka ngaihtuahnaah chuan, a Secretariat atang te hian ‘thil tam tak an feed ve nasa a ni ang’, tih ngaihtuahna chhan chu, pakhatnaah chuan - nichinah Member zahawm tak Pu Jejea leh Dr. K. Beichhua ten an sawi tawh – ‘wawiina kan thupuan tur hian naktuk chanchin bu a luah dawn em’ tih ngaihtuah fo lo turin, media play lo turin, lar khel lo turin sawrkar min warning ta der a ni. (thla hnih emaw chauh kan nih lain). Vawiinah hian kan Minister rualte, kan MLA rual, i ding leh i vei te hian ‘mipui kan play lutuk, kan khel lutuk em’ tih hi kan Governor hian a thusawiah hian a tarlang tel a. Chu chu kan zavai hian kan fimkhurna tur atan leh, kan thiltih, kan sawi engkim hi a tak ram thleng tur, mipuiten an ban phak tura kan sawi a tul a ni. “Media play lutuk suh u; social site-ah hian thil tam tak hi sawi pur pur suh u” min tihna te pawh a ni mai awm mang e, ka ti a. Chu chu phek 2-naah khan a lang a ni.

Kan Governor thusawi phek 3-na leh 12-naah khan warning bell ring taka hmehna a awm leh a. Chu chu - fir tak leh awmze neia sum hmang tura kal a tum thu a sawi lai khan, (Serlui bialtu MLA zahawm takin a rawn sawi tak) “Mi thenkhat tih lawm tum avanga sum khawhral chhunzawm kan ni em ni? Kei chuan a chhanna tur ka hria a ni” a ti a. Tun hnaiah *year of consolidation* te, *fiscal stabilization* te kan sawi lai hian, kan sum leh pai hman thenkhat hi ‘a tul viau em le’ tih hi Governor hian a ngaihtuahnaah a awm em ni chu aw ka ti a. Serlui bialtu in an sawi ang khan, Adviser to Chief Minister pangate leh OSD (cheng khat hlawh) thenkhatte pawh an office expense tur leh thil tam tak han en khan, (a thatna lai zawk a awm a nih chuan, thu hran ni se) kan Governor hian, “kei chu a chhanna ka hria...” a han tihah khan, helai bawrah hian eng emaw ni sum renchem tulna leh kan hman tum dan en hian, ‘hlah thawn a nei em ni chu aw’ ka ti a. Fimkhur nan kan sawrkarin hei hi kan hman a tha ka ti a.

Tin, phek 4-naah khan thu pawimawh tak tlar khat a inziak leh a – “*Thua sawi mai a tawk lova, a taka hmalak a ngai tawh a ni*” tih kha; kan Governor kha a sawi tha thak thak khawp mai. Kan zavaia kan inenna tur hei hian a sawi a ni. Phek 5-naah khan investment tam zawk kan neih theihna tura investor tam zawk kan ram economy ti tha tura lakluh a tul zia te tarlan a ni a, ka lawm khawp mai a. ‘Look East’ tih te, ‘Act East’ tih te kan sawi a. Chumi kal zelah chuan kan sawrkar hian hmachhawn tur tam tak a nei a. Rel (train) nakum lawkah a lo lut dawn; chungah chuan investor tam zawk pawh an lokal dawn a. ‘Kan sawrkarin hmalam a panna, kan economy siam nan kan ngaihtuah ang; a pawimawh’ wawiin niah hian ka tiha ka han chah ve duh chu - kan ram, kan hnam



himna ngaihpawimawh ber a tha a. Ram te pawh kan hawh tir ang a, thil tam tak kan tih tir ang. Chung hunah chuan constitutional safeguard kan neih engkimah te, kan hnam himna tur te ngaihtuah chungga investor kan lakluhna tur, investment nasa zawk kan tihna turah hian kan sawrkar hi a kal ka duh a, helaia investment tam zawk kan neih hi ka duhpui a ni.

Phek 6-naah kuthnathawktute chungchang a rawn sawi a. Kan GSDP-ah pawh 26% lai kut hnathawktute atanga kan hmuh a nih chungchang te pawh kan hmu a ni. Chumi chungchangah chuan tukin zinga kan question tawh leh, vawiin nia kan House-ah pawh sawirik tam ber *hmunphiah chungchang* kha; item dangte hi chu a hralh hun a la nih loh deuh avangin. Hmunphiah chungchangah hian kan sawrkara ka ngen nawn leh duh chu - kan Agriculture Minister pawh khan a rawn sawi a, member dang te pawhin kan sawi a, *Ni-100 chung kan hmalakna* tura ni 60 chhung kan hmalak tawhna te kan han sawi a. “Ni hnih-khat chhungin a theih loha kan ngaih, ‘DAH’ hi kan dah tawh a ni; vaibelchhe 110 kan dah tawh a ni” a ti a, kan puang zar nasa tawh khawp mai. ‘Thlathar leina tur kan dah tawh a ni’ tia kut kan ben dur dur kha, vawiin niah thlathar a taka lei tur a han awma kan han lei leh thei lo deuh tho thang tur te hi, he House-ah pawh hian a lung chhiat thlakin ka hria a. Kut hnathawktute vawiinah hian tapin an awm a, mangangin an awm a. ‘A takin kan DAH tawh’ kan tih hi chu, hawh u, i hmang ang u; priority-ah i pe tak tak ang u, tiin kan sawrkar hi ka ngen nawn awn awn a ni.

A dawt lehan phek 7 leh phek 8-naah khan, hmasawna ruhrel lian ngaihpawimawh chungchang a rawn sawi; a bik takin road infrastructure - khua leh khua piah lamah inter-state chungchang a rawn sawi kha, (kan House Leader ngei pawh hi, tuna ka bial khi a bial hlui a ni a) vawiin niah hian he House kaltlang pawha kan sawi duh lai a chu - Tripura lam te, Cachar lam te, Manipur lam te pawh kawng thenkhatah chuan kawng kan nei tha tawh; ka bial (Tuivawl) hmar tlangdungah hian Zoram kawtchhuah thar siam theihna tha em em kan nei a. NH 306 'A' New Vervek - Bagha lam kal thlak theihna tur hi tunah hian hmalak chhoh mup mup kan nei a, chak zawka kalpui ngai tak a ni a. Khawchhak lam atanga sumdawng reng rengte hi Aizawl lam rawn luh ngai lova rawn kal thlak theihna tur awlsam zawk tur te a awm a.

Tin, Seling ‘O’ Point atanga Tuivai lei kal pheia Manipur kalna tur hnai tak, sawrkar hmasa khan lui bul thleng metal-in kawng kan dah vek tawh a; engkim kan ti tawh a, lei dawh chiah tih tur a ni a. Lei han dawh tur kha tender te han tih tawh a, mahse sukuk a awm a ni. Hei hi chak zawkin min han tih sak se la, inter-state kalpawhna tur kawtchhuah thar Governor speech hi a thleng dik dawnin ka hria a. Kan leader hi khilai bialtu a nih tawh avangin, ram tana a thatna a hmuh chian ka ring a ni tih kha, hemi chungchangah hian ka han sawibelh duh a ni.

Ka chhiara min tihlim em emtu chu - *State project Monitoring Committee* din tur chuungchang leh a dinna order a lo awm a. Chuta mihring hrang hrang kan han dah dan

han en hian, ‘sawrkar hian tih tak tak a tum dawn a ni ang a’ tih ka hmu a, min ti hlim a ni. Amaherawhchu, hei hi a han kal ang a, thuneihna sang, ha hriam kan pe ngam dawn em? Chulai china chu a pawimawh dawn a. A taka hnathawk theiin a awm dawn phawt chuan, kan ram development in a thlenna tur atan hian hei hi a pawimawh dawnin ka hria a. Hemi thil kan sawrkarin a din hi tha ka ti a, ka thlawp a, lawmawm ka ti a, chhuanawm pawhin ka hria a ni.

Phek 9-naah lut i la, (tawitein ka han sawi tawh ang a) education chungchang a rawn tarlang a. *National Education Policy, 2020* tarlan hmanga “hma kan lak tur chungchang te, kan hnam, kan ram, kan khawtlang, nunphung leh ziarang mila zirna kalpui tur” tih chungchang hi ka thinlung hnehtu a nih vangin, lawmawm ka ti a. Thiamna hi kan hnam thinlung pu chungka kan neih theihna tur chhawpchhuah tur a ni hi ka thlawp khawp a ni.

Tin, phék 10-naah khan, ruihhlo (drugs) hmansual leh a kaihnhawih chungchang a rawn tarlang a. Hei hi lian zawk, na zawka attention kan pek a tul khawp mai. Development tam zawk lo kal mahse, a mihring, a hmangtu tur leh a chhawrtu turte ber kan awngrawp si chuan, ‘helai hi uar zawka tih kan tum a ni’ tiin Governor speech-ah khan rawn tarlan a nih kha, ka lawm a. A tak ngeia chu chu kan kalpui a tul ka ti a ni.

Phek 11-naah khan Mizo hnam nihphung, nun dan humhalh te, Zofate pumkhatana chungchang te a rawn sawia kha, lawmawm ka ti Cchak taka kalpui a nih ngei pawh ka duh a. State-ralmuang, remna leh muanna, inpumkhatna tha kan neih theih zelna turin, ‘*Island of Peace*’ tia miten an sawi thina hi chhunzawm zel a nih theihna tura tanah hei hi kan hmang tangkai ka duh a ni. (Pu Speaker, ka zo tep tawh a.)

Ka rilruin thil pahnih-khat - kan Governor speech hi a zawnzawng ngaih pawimawh sawi emaw, ziah emaw theih a nih loh lain, point tam tak rawn tarlan a ni a. Amaherawhchu, sawrkarina ‘*a priority te ziahna hun*’ kan tih thin avangin, tih tel loh pahnih-khat ngaih pawimawh em em ka neih si a awm a ni. Chu chu, pakhatnaah chuan - Health sector pakhatmah kan Governor speech-a a awm lo kha pawh ka ti khawp mai. Kan sawrkar hian health lam kalpui tum dan eng emaw kha puan a ni thin khan ka hria a. Mahse, vawin kan budget session-a health sector tarlan a ni miah lo mai hi a pawh ka ti a. Hmasawna engkim a kal dawn chuan a mihringte hriselna lampang hawi zawnza sawrkar kal tumna emaw, kan healthcare improve in tumna niawm in sawi te kha (a ngaihnaawm tehlul nen) ka lo hmu lo hi ka ui hle a ni.

A dawt lehah chuan, *land reform* chungchang tarlan a ni lova, kan ram leilung hausakna leh thil tam tak tih kan tumah hian, House-a i vei lama kan hotute thut laia an sawi thina kha a taka helaiah hian tarlan ngai ni tura ka ngaih, tarlan a ni lo te, kan force te tihchakna tur engkim mai han tarlan loh palh a ni te hi a pawh ka ti. Engpawhnise, ziah kim theih a ni lo a ni ang a. Kan sawrkar hotute hian thil tam tak in sawi tawh leh in

puan tawh avang hian, kan Governor hian hei hi arawn sawi ve kan lo ring thin a. Amaherawhchu, a tel kim thei lo hi a pawia ni.

A tawpna atan chuan Pu Speaker, phok 13-na, a tawpna wording-a kan zavaia kan Governor-in thu min chah kha a pawimawh ka ti. “*Nangmahni thlang tlingtute laka in bat leh mawhphurhna te hre thar leh turin ka chah a che u*” a ti a ni. Kan zavai hian kan Governor hian min thlangtu mipuite, he rorelna ina kan awm chhan te hrechiang turin min ti a. A bik takin i ding lama thute – *kalphung-thar* zuara mipuite hnenah “sawrkar kal tawhte ang nilova awm kan tum” an ti a, an sawi ang kha vawiinniah hian mipuite’n an en mek che u a, x-ray khawl lian takin an x-ray che u a, midang ai khan in laka an fir zawk dawn lehngal a ni a. Thil tam takah hi chuan, “an sawi ang kha an ni lo; a ngai ang tho kha anni” an ti leh tan deuh tawh che u a ni a. In danglam bikna *kalphung-thar* kha mipuiin an beiseia kha lo thlang ngei thei se. Chumi atan chuan i veilama mite pawhin Pu Speaker, kan theihna chin apiangah, kan sawi tawh ang khan *constructive-in* ngaihtuahna kan hmang a ni. Kan RD Minister-in a sawi kha, “Kan inhnial buai dawn emaw ka ti a, engkim a tha zawngin kan sawi”, a tih kha. Helamah hian kan thinlung hi a tha zawngin kan ngaihtuah a ni. Chutiang tur chuan he House atang hian kan ram rawngbawl thlang turin kan insawmin, ka inngen a ni. Kan Governor speech zahawm tak hi, *Motion* puluttu ina pass-pui a sawmna ang ngei khan keipawhin ‘ka thlawp’ tih ka sawi a ni e. Ka lawm e.

**HON. SPEAKER** : A lawmawm e. Tunah chuan, kan House Leader, Chief Minister zahawm tak, tul leh tha a tih ang te sawi turin kan sawm ang a, wind-up-na rawn nei ngal se a tha ang e. I lo sawm ang.

**PU LALDUHOMA, HON. CHIEF MINISTER:** Pu Speaker, windup-na kha chu *Motion* rawn neitu tih turah ngai ta ila.

Ni e, Governor speech hi ‘*sawrkar hmalak tumna tarchhuahna a ni*’ tih kan hre vek a. Hmanni lawka kan session-ah eng emaw zat a sawichhuak tawh a. Tun erawh hi chu budget session bik a ni a, ‘hmanni lawka sawi tawh hnu te sawi nawn leh thin ai kha chuan, la sawi ngai lem loh thil pawimawh dangte tun tum hi chu ka han telh ve teh ang’ a ti ni te pawhin a lang a. Tin, helaiiah hian engkim sawrkar hmalakna tur sawisen a ni lova. Tuna kan ngaimawh kan han sawi tak ang zawng zawngte pawh kha budget session kan neih chhungin department tin *Demand for Grants*-ah khan a lo lang dawn a. Khata pawha a la lang lo a nih chuan, “Hei hi engatinge in ngaih pawimawh loh?” kan la inti dawn nia.

Tin, sawrkar hmalak tumna tlangpui kan Governor-in a sawi hi tha kan ti vek a, “Governor speech zawng zawngah a tha ber a ni ang” te kan ti hial a. Chu chu he sawrkar thar a danglamna leh mipuiin beiseina an ngahna ti lang chiangtu a nih bakah, helaiia Pu Speaker, i ding leh veilama mite, i veilama mite hlei hlei hian tha an tiin, i

dinglama mite hnenah hianin beiseina an nghtat lian zawk mah mah em aw ka ti a, a huphurhawm hlein ka hria a. Amaherawhchu, anmahnite nen t̄ang t̄langin theihtawp kan chhuah t̄lang ang a, kan harsatna te kan su t̄lang turah ngai ila.

Member t̄henkhat tena kan sawichhuah, tuna kan harsatna eng eng emawte chu keini han chhan mai theih a ni lova, kan chhawm te a ni a, a tihreh dan erawh chu hun kal zelah kan ngaihtuah chho turah ngai ila. Tin, kan Governor hian tunhma lama thil lo awm tawh, ‘*kalphung-hlui*’ kan tih mai t̄hin kan chhawm ve loh tur, a chhanna pawh amah pawhin “ka Chiang em em a ni” a tih; chhawm ve lo tura min duhte a nei a, chung chu a sawichhuak baw a ni. Chung chu mimal induhsakna avanga eng emaw intihsak thin, sum leh pai hek em em si ang te kha ti ve tawh lo turin min duh a ni tih kha a Chiang a. Tin, thil sawi vak vak, thil sawi t̄euh t̄euh, a tak hmuh tur awm si lo ang te kha ti ve lo turin min chah baw a ni. Khangte kha kan thinlungah pai reng ila, a t̄hain ka ring a.

Tin, Governor speech-ah hian thil thar kan hmu a. Hei, ‘Research Mobilisation’ kan han ti a; Sawrkar hmasa khan Research Mobilisation Department an lo nei a. Keini ang ram zim, mihring tlem si ah hian department han dinna tham em niin kan hre lova. Tuna deparment awm sa t̄henkhatte phei hi chu t̄hiah leha amalgamate tak hi kan chak khawp a. Chutih laia department thar han siam belh kha thil t̄ul lem lo nia kan hriat avangin kan t̄hiat a, tunah chuan *committee* angin kan din thar a. He committee pawh hi a dinna a la rei lova, order chhuahna a la rei lova. Vawi-khat meeting kan nei tawh a, chutah chuan kan hmalakna tur t̄langpui kan sawiho a. He Research Mobilisation committee hi team-thumah la insem darh leh ila, chu chuan khawih bik theuh nei se la, chu chu a ‘general body meeting’ ti mai ang, tah khanrawn putluha, ‘chutah chuan a tul anga kalpui ni se’ tiin hma kan la dawn chauh a. Kan Vice Chairman-ah hian kan Chief Secretary hlui kan dah a, cheng 1/- hlawhin kan ruai a. Hetiang chuan a hna a hautak tehlul nen thawh duhloh awm tak zawk hi a nia. Amaherawhchu, an experience te ram tan a thlawnin min pe dawn a, kan ₹1/- hlawh ina a thawh tur hi chu a tangkai viau ang. Delhi-a rei tak tak chama bill t̄hin ang kha a ni ve dawn lo a ni.

Tichuan, he Research Mobilisation hian inrenchemna kawng, ‘*Austerity measures*’ a khawih ang a. Tin, disinvestment - sawrkar ina thil a lo tih, tul si lo, ‘*Sumthuninu*’ kan tih ang chite hi engtia pumpelh tur nge tih te a ngaihtuah baw ang. Tin, administrative reform pawh a keng lo thei lova; a chhan chu *manpower assessment* a khawih tel avangin. Khatiang zawng zawng kha arawn hma dawn a, an hma hi a zau viau dawn a ni.

Pu Speaker, thil thar hlak, Mizoram-a kan la hmuh miah loh kan hmuh chu - *Project Monitoring Committee*-hi a ni a. Hei hi kan sawrkar thara corruption tihrehna tur bulpui leh mipui sorkar a pianna tura *a-hnuk* a ni. Tah hian Vice-Chairman-ah kan senior officer, a chawlh tawh hnu pawha central sawrkar pawhin thil pawimawh tak tak,

*minister-rank* hial hial tea a chhawr zui thin kan hmang a. Secretary-ah mi tha tak mai, corruption hua a-mipui vantlang ina an ngaih rawn kan dah bawk a. A mihring atang hrim hrim pawh hian ‘he sawrkar hian corruption hi a do dawn a ni’ tih mipuiin min hriatpui theih nan a mihring pawh hi kan thlang a ni. Anni pahnih hian cheng 1/- ve ve an hlawh leh dawn a ni. Chuvang chuan, a heklo thei ang berin kal kan tum a, Board 10 chuang tul hauh loa kan ngaih kan thiat a, kha kha kan lai a na deuh hlek niin alang a. Amaherawhchu, tullo niin kan hria a, thawh pawh an neih vak kan hre lova, kan thiat a ni. Keini erawh chuan tul ngawih ngawih nia kan hriat kan ti a. Tuna kan Board Chairman te, kan Adviser te hi hna pawimawh tak tak, tangkai tak tak thawk vek anni.

Tichuan, he Project Monitoring Committee-ina a entel a duh rawtna thar te kan dawng a, a lawmawm khawp mai a. A bik takin, Member zahawm tak Pu Robert-a khan ‘bill monitoring te pawh hi rawn khawih se’ a ti a, khang te pawh kha kan lo hria ang a, a tul khawp mai reng a. Sawrkar hmasaah khan *monitoring* a awm lova, a ni la laa bill la zel theite kha an awm a. Bill thenkhat a kuma kum te a tang a, khang kha a awm tawh lohna turin khang rawtna te pawh kha kan lo ngai pawimawh turah ngai ila. Tin, he committee-ah hian party tin aiawh an tel bawk dawn ang a; recognized party chin kha a ni dawn a ni. Party-te hian an rawn ruat tawh hlawm em ka hre lova. Helaia kan member-puite thahnem ngai tak tak, helai hmuna pawha kan hmuh phak te phei hi chu an party te khan rawn ruatna chang hria se a tangkai leh zual awm mang e, kan sawi phak phei chu a ni lova.

Chutiang chuan, NGO aiawh te, MKHC aiawh te, MPF aiawhte pawh an thu bawk dawn a ni. Chung chu zoram-mipui zawng zawng aiawh kimte thutna tur *body* a ni a. Hei hian a duh duha a tirhkah theihna turin *quality control division* hi attach tur a ni bawk a. He quality control division hi vawikhat ka bial chhunga college sak chhe lutuk endik turin kan tir tawh a ni. Tichuan, technical support a nei ang a, kha khan kan project pawimawh zawng zawng hi a endik dawn a ni. Sitting kan nei ang a, tichuan, a team bik te pawh khan hma an lo chhawp ang a, ‘hei hi chu a hmunah a committee-in min tlawhpui rawh u’ an tih ang kha chu a hmunah kan tlawh ho ang a. Kan hmuh dan te kan sawiho thin ang. Tunah hian a hmuna tlawh tul tak tak contract kal lai bill lak tawh si, hna la thawk si loh kan ngah a; 30 bawr vel kan nei a ni. Hei hian kan lu a tihai a ni. Kan hun atang chuan hetiang hi a awm kan phal dawn tawh lo a ni.

Amaherawhchu, kan rochun, kan lu tihaitu eng emaw zat tunah hian kan nei. Hlawhfa tur pawh hmuzo tawh lo; hlawhfa man tur pawh pek tur nei si lo, a nuai 100 tel thawk bawk si, thawk tha bawk si lo, han terminate dawn ngawt ila sawrkar kan hlawk lo tawh bawk si, pawisa an la tawh si; han re-tender ngawt dawn ila, chhangtu tur kan hmu dawn si lo; khatiang te kha kan nei a. Chungte chu a awm tawhlohna tura hnathawktu tur chu he committee hi a ni a.

Tichuan, kan zavaiin he sawrkar thar enkawlnaah hian kan tel tlang dawn a, Mipui-sawrkar tak tak a ding dawn a ni. Contractor pawhin a huna a zawh loh chuan, pawhsei tlak a nih leh nih loh chu he committee thu hi ani dawn a ni. Kan zinga opposition member atanga aiawh lokalte thu kha ani ve tawh dawn a ni. Helai ruling tlemte thua *thu-pawhchah* kha a awm ve dawn tawh lo, he sorkar ah hian. Chutiang chuan kan kal ang a, kan ram hi a dam kan beisei a ni.

Tin, tunah hian SIT - ‘State Institute of Transformation’ an ti a; hei hi central-ina min rawn tih sak a ni a, kan ti mek a, SSM hnuaiyah hmannah khan khulama a minister-te pawh ka zuk sawipui a. *Dashboard* kan nei dawn a, kan rama department hrang hrangte hnathawh leh project pawimawh zawng zawng chu dashboard-ah chuan a lo awm ang a, chu chu Planning Department atangin an supervise ang a, Chief Minister Office atangin kan supervise dawn bawk a ni. Department zawng zawng, Minister zawng zawng, Secretary zawng zawng, Director zawng zawngte hnathawh, Delhi-a PMO office-in Minister-te zawng zawng a supervise ang khuan dashboard neiin hei hi kan ti dawn a. Cheng vaibelchhe eng emaw zat min pe tawh a, min pek belh zel dawn a; heta tang hian tan kan la tak tak dawn a. He kan SIT pawh hi tuna kan project monitoring committee hian a hman tangkai theih kan beisei a ni.

Tin, investment policy kan nei a, nichinah khan kan member pakhat khan sawrkar hmasa tih chhonzawm ang deuh khan a sawi a; kan chhonzawm lova. A la awm lova, kan siam thar a ni. He sawrkar hi kum heti chen hi UT leh State a lo ni tawh a, investment policy a lo la nei hauh lova. Reilote kan han sawrkar a, kan han zin chhuak a; India ram chhung leh foreign atangin kan rama invest duhten min dawr sup sup nghal a. Tun kan Chapchar Kut-ah te hian sawrkar hrang hrang Ambassador-te lo tel an duh a, chumi beisei chuan. Mahse Prime Minister-in a lo tel theih dawn leh dawn loh a sawi chian theih loh avangin, kan la sawm ngam lova. Hengho kan lo dawnawanna tur *dawn-thleng* kha kan sawrkarin a lo nei miah lo mai a, chuvang chuan, ‘a ngai a ni’ kan ti a, hmanhmawh takin investment policy kan siam a. Kan hmanhmawh deuh a, la siamthat leh te pawh a la ngai mai thei a.

He kan investment policy-ah hian ngaih pawimawh kan nei a; entirnan: central atanga sum awm thei apiang, sum siamna tur remchang a nih tawh phawt chuan pawh chhuah zela, 10% *state-matching share* pawh pe leh thei mang si lova kan awmna ang chi hi pumpelh hram hram ila kan ti a ni. Reilote rorelna kan han chelh chhung hian chutiang chu kan hmu teuh a, a bik takin khawthlang lamah a tam hle a ni. Cheng nuai 20-a zawh theih tur cheng nuai 80 vela DPR siam te kan hmu teuh tawh, tunah hian. Hei hi SMS 10% kan pek a ngai a, a hek em em a, kan pe leh hleithei bawk si lova; khatieng chite kha fimkhur a ngai ang kan ti a, kan investment policy-ah hian. 100% funding chi hi a awm leh a, heng erawh hi chu uar tur kan ti a.

Tin, ‘recurring expenditure hi avoid tur’ kan ti. Thil eng emaw infrastructure kan han ti ngawt a, kan han sa a, a bill an la zo a, tute emaw ipteh a lut a; kha kha kan duh chhan ni mai hian a lang a, a tawp mai a ni. Kan chhawr zui lo; ka bialah pawh chutiang chu a awm teuh. Laboratory an din a, concrete building panga-paruk, vawiinah chuan ramhnuaiyah a chang tawh; a uiawm hle. Nursing college an din a, vawiinah hian zu in nan an hmang, darthlalang zawng zawng a keh leh vek tawh. Khatiang kha a tam em em a ni. Nichinah pawh khan kan Hachhek Bialtu zahawm tak khan chutiang a tam thu min hrilh kha. Khatiang kha pumpelh kan duh a ni, keini chuan. A chhan chu, kan State sumin a maintenance pawh kan ti leh hleithei si lo. Maintenance-ah kan buai a, chutah a manpower, a enkawltu tur pawh recruitment kan ti leh thei si lo. Khatiang chi, nakina harsatna min siam thei chi angte kha pumpelh ila kan ti a ni.

Tin, investment kan tih hian, kan tualchhung entrepreneur te hmalakna tur dipdal zawngin foreigner emaw, India mi emaw lakluh loh hi kan tum a ni. Kan ramah hian kan entrepreneur-ten emaw, kan ram chhunga mi kher lo pawhin ..

**HON. SPEAKER** : Khawngaihin. Hei kan business a tawp a, tuna chhunzawm kan ti nge, hun hranah chhunzawm ang u kan ti? (*House-in chhunzawm law law a ti a..*) Aw le, chhunzawm rawh le.

**PU LALDUHOMA, HON. CHIEF MINISTER:** Mi tu pawh, (khawia mi pawh ni sela) state allocation eihek lova, State allocation hnuaia project tha kan rama an rawn hung thei a niha, a source of funding anmahniin an ngaihtuah theiha, kan tum pui ve a ngai lo a nih chuan, *kan welcome* kan ti bawka ni.

Tin, *Year of Consolidation* kan puang lo thei lova; entirnan: Pa-pakhat kha hausa viau mai sela, a nupui-fanaute hnenah ‘pawisa a awm lo’ ti tlat si sela, chawlhni tukah sa pawh lei duh lo sela, thawmhnaw leina tur pawh pe duh mang lovin, amah kha khawsa nuam viau si sela, hnam dangte nen khan eng contract emaw lian pui-pui thawk reng mai bawka sela, a chhungle’n an ngaithiam lo ang a, “ka pa, i *year of consolidation* hi kan hrethiam lo” an ti ngei ngei ang. Amaherawhchu, a pa khan an sum dinhmun chhiat zia a fate a zirtira, amah pawh kha a nungchang engkimah a inren zia an hmuha, ‘an nei lo tak tak a ni’ tih an hriat chuan, a chhung ten an thlawp ka ring. Vawiinah hian ‘kan nei lo tak tak a ni’ tih hi Zoram mipuiin min hriatpui se kan duh. Chuvang chuan, keimahni pawh kan in reduce a, kan inhrek mek a ni.

Hmanniah kan hotu pakhat a lo kal a, “carpet hi chu thlak ve em em tawh teh” min rawn ti a, “E, a la hman theih” ka ti; chutiang chuan kan inren a ni. Zoram-mipui pawh hi kum khat min nghak turin leh kan harsatna min hrethiam turin ka ngen a ni.

Tin, Minority lampang kha, Pu RM Chakma kha a vui nghal tan deuhhlekk niin ka hria a, kan duhsak-hmasak te an ni zawka a. Hmanniah khan project pathum Thenzawl

atangin ka va hawng a, kan Autonomous District pathuma mite tan vek khan a ni a, ka project hawn hmasak ber hi District Council tan a ni zawk a ni. Tin, Delhi-a Girls Hostel kha MADC lam khan anmahni hmunah sak an lo phal sak a. Amaherawhchu, sawrkar hmasa khan a *contract* nih kha an hauh a, an lo intibuai a. Chu pawh chu kan han hriat ve leh, “E, nangmahnin thawk rawh u” kan ti a, kan Mara District Council kutah a thawh hna pawh kan pe nghal a ni. Tin, MDC te hlawh kan tipung a, an zin nikhuaa accommodation leh conveyance thila an buainate pawh tunah chuan kan chingfel thawkhat tawhin kan inhria a ni. Chu chu a ni a, tha taka anni ho nen hian thawh ho kan tum a ni.

Tin, Hmunphiah chungchangah kam khat leka ka han sawi leh duh chu - Hmunphiah chungchangah hian tun leh tunah kan sawi loh te kan han insawi tir nghal zung zung a, heng hi fimkhur deuh hlek tawh ilangin. Kan agent te thiamloh a ni mai. “Kan lei thei ang, in rate ang hian” an ti a, ngaih tha takin kan awm a, an thei leh si avangin kan tuar tlang a ni ber mai, hei hi chu. Chuvang chuan, keini thiam loh pawh a ni lo, kan agent-pa thiamloh a ni ber mai. Hetiang a nih tur hi kan hre bik si lova, a lo ni ta si a; chuvangin, “sawrkar hmasaa in awmdan ang khan kumin chu lo awm leh lawk mai teh u” kan ti a ni.

Tin, *sum puk chungchang* sawi a ni a. Ni e, sawrkar hmasain sum puk zat tur a lo ruahman sa vek a, tun financial year chhunga sum puk tur zat an la puk hman loh, puk leh tura an hmachhawpa kha kan puk a ni. Chu chu phalsak chinah a ni. Keiniina pumpelh kan duh chu - sum puk phal sak chin piah lama special drawing facilities - *special wage and means* interest sang pui pui hmanga kum hnih lai kan lo intuamhlawm kha tihreh kan duh a. Kan sawrkar chhung reilo teah hian kha kha ti miah lovin tun hi kan thleng thei a ni; chu chu kan dinhmun a ni.

Tin, Koladyne khuah chungchang kha member zahawm takte khan in rawn sawi a, kan ngaipawimawh a. Amaherawhchu, kan buaina chu, tunah chuan compensate la tur an awm a, chu chu pass engkim neite enfiah vek anni a; High Court-in, ‘heng mite hi lo pe rawh u’ a tih diam tawhte an awm a ni. Forests Department lamin “kan ram a ni” an ti a, an sawi buai a, tichuan a fel thei lova; chu chu kan buaina a ni a. Forest Department hi hmundangah pawh kan development a kal hleih-theih lohna a ni a, a hreawm kan ti ang reng khawp mai. Chu chu kan thuneihna a ni tawh lova, Central Union Forest Ministry lama thuneitute thutlukna a ni a, tihngaihna vak kan hre lo a ni.

Tin, kan *hand-holding policy*-ah hian ‘kuhva te pawh telh ni se’ tih a ni a; kuhva chang lo pawh kan sum dinhmunin a zir chuan, telh a ni zel dawn a. Hmanni lawk khan *Operational Guideline for Agriculture Assurance Fund* kan pass a. Hemi fund atan hian tun budget-ah hian cheng vaibelchhe 100 chuang kan dah dawn a. Khata tang khan kuhva leh a dang reng reng kha he mi ‘*vegetable-supply chain*’ kan tih ang hmang khan,



tuna sawhthing kan tih ang zawng, a man duan lawk ang chi ni si lo khan kalpui tur a ni a, chu chu a kal dan tur a ni a.

Tin “*quarantee* leh *loan* chungchang sawilan a ni lo e” tih kha, Serlui Bialtu MLA khan a rawn sawi a. Phek 7-na kha a lo en chuan, khatah khan institutional credit te, micro credit te kan Governor khan a sawi a ni. Kha khan hei hi a kawka ni.

Tin, “Sawhthingin ram a tichhia” tih hi, Pu Muanpuia sawi ang deuh kha a ni a. Kan han vat a kan han hal a, a lo chawr leh tur tihrem tumin zan riakin kum tluanin kan thlo fai a, kan hneh lo a ni. Kan ram hi tihchhiat theih loh khawpin a tha a ni. Sawhthing hmun ngat phei chu buh hmun aiin a kum lehah thing leh mau a tha duh zawk vek a ni; chu chu a *practical*-a kan hmuh a ni. Khua leh khua inkarah han kal teh u; ram awl hlir in hmu ang. Ram hman tangkai chu kawng sir tlem te chauh a ni. Chuti em ema kan mite an riltam lai hian, kan ram hi lo khek teh hlur turah kan ngai lo; *Na-chhawkna*-a kan hman phawt a ngai. Kum hnih-khat chhung kan ti a, a sirah hian a processing nen kan kalpui dawn kan ti a, “nakinah chuan a permanent system-in kan kalpui dawn” tiin kan au kan au a. Chuvang chuan, kan ram hi a chhe hman lo ang. Vai ram te anga han hala khatia thlalera chang mai ram kha a ni ve lo.

Tichuan, SEDP chhonzawm loh kha kan la na viau a; “agriculture in uar si a, *a-agriculture* lo em mai” tih kha a ni a. SEDP tak kha *a-agriculture* loh em avanga titawp kan ni zawk a. ‘MNF-a i lo luh ve chuan...’ tih vel mai mai kha an dawn dan a nih avangin, khatiang kha chu a uiawm kan ti a. Chuvang chuan, ‘a thawk tak taktute thlai thar lei nan i hmang zawk teh ang’ kan ti a ni.

Free Movement Regime leh border fencing chungchangah hian party pakhatin PR tunhnaiah a chhuah a, ka sawi ni lo min sawi tir a, “central-a nawr tur hian kawng pawh zawh tawh suh u; huaihawt tawh suh u, Chief Minister-in a ti” te an ti a; a buaithlak thin khawp mai. Hmaniah NGO coordination committee nen kan inkawm a, “nawr reng rawh u; in thawm hi a ri reng tur a ni; thawm a ring tur a ni” tih hi ka fuihna a ni zawk. Chuvang chuan, khalai NGO coordination committee-a lo kal zawng zawngte kha ka thusawi chu min hriatpuitu anni. Amaherawhchu, ka sawi awmchhun chu, “*Lim hal* erawh hi chu ti tawh lo hram ula ka duh; a mawi lo, kristian tiha tan; mizote tiha tan; kan hnam chin dan pawh a ni lo hei chu; ‘thi rawh’ intihna a ni a, a tuartu tan a na lutuk deuh a, mizote hi chuan ching ve lo ila ka duh hle mai” ka ti a. Chu chu keima mimala *ka request-na* a ni a, anni pawhin, ‘a ni khawp mai’ an ti ve a ni. Chu chu a ni zawk a. Chuvang chuan, hemi chungchang hi chu official resolution kan rawn pulut dawn a, chutah chuan kan la sawi dawn nia.

Tin, *Assam Rifles-sawn* chungchang hi, ‘an kelsa kanna thirbel nen lam an phur phei vek tawh’ tih a nih avang khan, kan ngaih a lo tha deuh hlek a, mahse, *alo ni chiahlo* a lo ni a. Saw, a ral lehlama huan neitute kalna tura sawrkar hmasain kawngpui a lo siam

lah saw kalna tlak a ni lova, a chhe em em a, sum tam tak a ral a, a; alignment pawh a thalo hrim hrim a ni. Tihngaihna a awm tawh lo. Chuvang chuan, saw mi leh kawngpui hmasa ber inkarah, ‘a laiah sawn kawngpui i siam ang u’ tiin AR hotute kan dawr mek a. Chu chu a mar tha zawk a, a tibuai em em chuang lo bawk a, min phalsak te kan beisei a. ‘Saw mi kan tih leh hma chuan, an feh hi lo phalsak teh u’ kan ti a. “Nitin chuan kan thei lo ang; kan chan kah ni te a awm ang” tiin, *phalsak loh ni* bik karkhatah ni hnih vel a awm a ni. Phal loh ni te an nei a, chutiang chuan inremsiamna an siam a. Hman ni deuh khan Assam Rifles - General a lo kal a, Manipur nena min awptuin, an sikul ‘min lo hawn sak rawh’ a rawn ti a, ka va hawn sak a, an building ruakah sikul an lo nei a. Kalkawng a lo chhe hle a, tui an nei lova, eng an nei bawk lo; anmahniin an lo intum chawp vek a ni. Chutiang chu an dinhmun a la ni a. Kan sawrkarina kan tih tur hi ala awm nual niin a lang a, kan la enfiah em em hman lova, sawi sual te pawh a hlauhawm a. Hei hi chu kan ngaih pawimawh tlan kha a ni a, sawrkar thar chuan a rawn umzui zel turah i ngai teh ang.

Aw le, Pu Speaker, kan Governor Speech-ah kan lawm tlang a, tihpuitlin a nih loh te pawh kan hlau tlang niin ka hria a. A rawn move-tu, Nl. Baryl Baryl Vanneihsang chungah pawh lawmthu ka sawi e. Ka lawm e.

**HON. SPEAKER** : A lawmawm e, kan House Leader. Tunah chuan *Motion*-neitu MLA zahawmtak Pi Baryl Vanneihsang sawm ila, sawi tur tul tih ang angte rawn sawiin, adopt rawn dil nghal sela. Tunah i lo sawm ang u.

**PI BARYL VANNEIHSANGI** : Pu Speaker, ka lawm e.

Hei, chawhma lam, *Motion of Thanks* sawi hma khan kan business pakhat - *Zawhna & Chhanna* hun kan hmang a, thahnem kan ngaitlang a, kan boruak te pawh kha a tang deuh at at kha a ni a. Chutah a hun a zo a, minute khat pawh a karah awm lovin, *Motion of Thanks* kan han sawiho leh a, kan rilru kan ngaihtuahna te kan sawrbing lohna lamah kan han sawi ho a. Chutihruah erawh chuan he House-a Member zahawm tak takte an puitling zia leh a tul hun anga an insiamrem thiam zia te a rawn lang a. Vawiinah hian bial hrang hranga mipuite hian kan bialtu turte tak hi kan thlang niin ka hria a. An zia ka ena ka hmuh khan, an chungah pawh lawmthu ka han sawi a.

Tin, he House-zahawmna vawng nung reng chungah nakin zelah pawh kan mite, mipuite tana ro kan rel thiam hi a pawimawh dawnin ka hria. Hei, hun eng emaw lai atang khan House-a han chet that deuhna emaw, eng emaw *trend* hi a awm ve deuhin ka hria a; ka sawi sual lo turah ka ngai a. Khang kha awm tam lo sela; House-a chet that leh sawi that satliah a ni lova. “Mahni bial chhunga kan chet thata, he ram kan enkawl dana kan chet that hi a pawimawh lai; mipuitena min tehna leh keimahni pawh kan intehna tur a ni” tih laia kha ka han sawinawn leh duh a ni.

Pu Speaker, ka hriat soal loh chuan, (helai ka lo chhinchhiah danah) member zahawm tak tak 26 ten ding chungin he *Motion* an thlawpna kil hrang hrang atangin an rawn sawi a, a lawmawm hle mai a. A motion-puluttu tan pawh a thlamuanthlak a. Tichuan chulaia sawibelh ka han duh chu - Ni e, hei kan Governor address hi sawi vek sen a ni lova. Tin, khang point zawng zawng kha rawn chhan ka tum lova, a tul pawhin ka hre lova. Chulaia ka han sawi duh zawk chu - sawrkar hi famkim a awm thei lova. Keini phe chu vawikhatna a nih avangin, *panna lai te, phaina lai te kan nei dawn* tih hi a chiang reng mai a. Chulaiah chuan House-ah te leh hmun danga innuihsawh emaw, thil danga han ti mai lovin, kan panna leh phaina laiah hian min chhungkhata, min thum mawia, min bel tha turin kan member dangte pawh ka han sawm a.

Tin, chubakah chuan, keini pawhin kan tih dik loh te, kan lo hriat hmaih palh te, kan lo tih loh palh te a awm a nih pawhin, kan thiamlohna kan pawm ngam te pawh a ngai ang a. Chutianga kan inchhawm chhoh zel chuan, '*he ramah hian sawrkar tha tak, mipuite'na an rinchhan leh an ngenchhan tlak a ding ang*' tih ka ring a, Governor thusawi tihlawhtlingtu kan nih ngei pawh ka ring a ni.

Tichuan, heti laia thu member zahawm tak takte, kan vai hian kan tuh rah vek kan seng leh dawn avangin, a tuh hunah hian duhtui ila, uluk ila, thawkrim ila, ngaihsak ila, ngaihven ila ka duh hle mai a. Chutiang tur chuan ka member-puite pawh ka han sawm leh ni sela.

Tichuan, he Governor speech tha tak mai hi a taka hman a lo nih ngei theih nan ram mipuite, ram chhung, ram leh hnam hmasawna tak a lo thlen theihna turin he ka *Motion of Thanks* hi min adopt sak turin House hi ka ngen a ni. Pu Speaker, ka lawm e.

**HON. SPEAKER** : Aw le, Governor Speech chungchanga lawmthusawina Motion of Thanks – "*That the Members of Mizoram Legislative Assembly assemble in this Session are duly grateful to the Governor for the Address which had been pleased to deliver to the Assembly on the 19<sup>th</sup> February, 2024*" tih chu kan sawiho a. Adopt remti a piangin, 'Remti' ti rawh u le. Remti lo kan awm em? remti lo kan awm chuan 'Remti lo' ti rawh u le.

(*Member-te remti lo an awm lova..*)

Aw le; *Motion* kan sawiho chu lungrual takin he House hian a adopt a ni. (**Pi Baryl Vanneihangi**: Pu Speaker, ka lawm e.)

Aw le, conclusion hmasaah chuan, lawmthu han sawi ka duh ve a. Heti tak maia Governor' Speech sawihlawh leh ngaihpawimawh hlauh hi tunhmain a awm fo tawh em tih ka ngaihtuah a. Chuvangin, he sawrkar hi a active hle dawn ni te pawhin a lang a. Tin, Memberte hriat atana ka han sawi duh chu – 'kan session hi Zoram-mipuite hian an ngaihven ta hle mai' tih hi kan hriat a pawimawhin ka hria a. Kan ngaihtuahna

te, kan tawngkam te, kan hawihher te, kan chezia zawng zawngte “Mizoram mipuiten kan beisei anga lanchhuahpui hram hram kan tum dawn nia” tiin *ngenna* ka han siam duh a ni.

Tin, Member zahawm tak Pu Lalchhandama Ralte, *Leader of Opposition* kha, ‘MLA Pu Chhandama Ralte’ ti mai lo deuhin, ‘Leader of Opposition’ tiin address thei hram hram ila, kha kha ka lo ngen duh nghal bawk a.

Hetah hian attendance register ka nei ve a. Chu chu ka han report ve hrim hrim duh a. Party thenkhat chuan 100% attendance an nei a, Party thenkhat chuan NIL attendance an nei bawk a; chungte chu Member ten kan hriat duh ve hrim hrim ka ring a. Keima attendance record chu - INC hi 100% attendance an nei a, pakhat a tel a. BJP te hian NIL attendance an nei a, MNF hian attendance 6 an nei a, ZPM hian 22 an nei a ni. A awmzia chu - kan hmaa tablet awm ‘hman tangkai tur’ kan tih kha ‘kan log-in lo’ tihna a ni.

Kha ta absent te kha Member ten hriat kan duh em le? Ka han sawi law law ang e. Member absent-te a indawtin, alphabetical order in sawi mai ang aw - Pu C. Lalsawivunga; Dr. K. Beichhua; Pu K. Hrahmo; Pu Lalchhandama Ralte; Pu Lalchhuanthanga; Pu Lalduhoma; Pu Lalnghinglova Hmar; Lalrintluanga Sailo; Pu Ramthanmawia; Pu Rasik Mohan Chakma te an ni. Khangte kha ka attendance book ah chuan *absent* an ni a.

Ka han sawi duh chu - kan hma ami kha cheng tam tak senga dah a ni a, hmang tangkai ila. Lehkhaa kan chhiar tam tak kha khatah khan a awm a ni. Tin, kan thusawite ‘engtia rei nge kan sawi’ tih te pawh a lan piah lamah, thil pawimawh tak tak document te pawh a awm a ni tih kha Member-te kan in remind a.

Tin, Session hmasa lam, December session-ah khan, a bik takin senior lam, ka vei lama mite hian, “mi-thar, *first-timer* ho kha an ding pawp mai a, thil kalhmang an la hre lo te pawh a ni ang e” an ti a. Convention practice ah chuan, material - pawn lam atanga kan lakluh mi thu ziak kan chhiar dawn te, thil kan reproduce dawn te hian *Speaker remtihna* kan la thin a ni a. Vawiin khan keimahni material mah ni se, ka ding lam panga mite (an vaiin) Governor’s speech an rawn quote dawn khan, Speaker remtihna an rawn la a. Ka veilam panga mite kha la lo an awm zeuh zeuh a. Nakin zela kan hriat atan ka tih vang a ni.

Tichuan, *hun hmang rei*-ah Dr. K. Beichhua kha a champion a, minute 8 chuang a hmang a; minute 7 chuang hmangte - Pu Rasik Mohan Chakma, Pu C. Ngunlianchnunga leh Pu Robert Romawia Royte te anni a. Thil ka ngaihtuah a Dr. K. Beichhua, Pu Rasik Mohan Chakma leh Pu Ngunlianchnunga te hi a tlangpui thu hian an hun an hmang over deuh zel mai a, ‘engnge a chhan ni ang’ te ka ti a, research ka lo beia vawiin chu. Nia

ka hriat tak chu, *maiden speech* ka neiha chhimlam member-te hi kan lo duat deuh a nih pawhin, ute chuan naute chung a an tih angin, '*kan inhrethiam a niang chu*' tih ka ngenna kha an changchawi deuh emaw ni chu aw ka ti a; mahse, chu pawh chu a la ni chuang lova. A chhan chu - kha, kan House Leader pawhin a sawi a; Chhimlam a ngaih pawimawh zia chu – 'MDC hlawh pung' tih te kan ngaithla a, Delhi-ah Girls Hostel te pawh anmahni kutah hlan a ni a. Tin, project pathum 'a zinna atangin a hawng' tih kan ngaithla a ni. Chutiang tak khan a lo duhsak ve tho tho mai a. Chuvangin, khang te kha 'kan chhimlam unaute sawrkara represent an neih tam loh avangin, khanglai kha kan inhrethiam dawn nia' tih te kha kan sawi duh a.

Naktuk, Ni 22 leh tuk leh, Ni 23 khian doctor-ten helai hmunah hian *free medical check-up* memberte tan an rawn buatsaih dawn a, kan Health Minister zahawm tak Pi Rinpuii chungah pawh lawmthu kan han sawi nghal ni se, House aiawhin kan sawi a. Tin, khata check up duhte tan zingah chaw ei lova lokal tur a ni dawn a. Khata an check turte chu - lipid profile te, blood sugar te leh cholesterol te a ni dawn avangin chuan *fasting* a ngai dawn a. Naktuka check up neih tumte tan chuan zingah chaw ei lova lo kal a ngai tihna anih chu. 'Tuk lehah ka ti mai ang' tite tan chuan tuk leh in lo kal dawnah *chaw-nghei* a ngai tihna a ni a. Kan Health Minister-in duhsak takin member-te remchang min siam sak dawn a ni.

Tichuan, vawiina kan *business* chu khati khan kan zo ta a, naktuk, 22<sup>nd</sup> February (Ningani) chawhma dar 10:30 ah kan thukhawm leh dawn nia.

*Sitting is adjourned (4:24 PM)*